

LOS HECHOS DE LOS APOSTOLES

¹ Zuma Teófilo, tuqui wejrqui tsjii libro cjjirchinča tjapa Jesucristuž puntuquiztan. Jesusiž ojklaytanacami tjaajintanacami cjjirchinča, nasta tjuñquiztan,

² arajpacha quejpsquiz tjuñicama. Ima arajpacha quejpžcan Jesusižtan Espiritu Santužtan apostolonacžquin mantichicha, jaknužt kamz waquizichaja, jalla nii.

³ Jesusaqui ticziquiztan jacatatžcu tii yokquiz iya pusi tunc tjuñi žejlchicha niiz apostolonacžquiz persuna tjon tjonzjapa. Tjon tjonžcan, kjanapacha tjeezicha, “Jacatatchinča”, cjican. Nižaza jaknužt Yooz mantuquiz kamz waquizichaja, jalla nii tjaajinchicha.

⁴ Tsjii nooj niiz apostolonacžtan juntjapžcu, Jesusaqui ninacžquiz chiižinchicha, tuž cjican:

—Anača tii Jerusalén wajtquiztan ulnaquicha. Tekzicha tjewznaquicha ančhucqui, wejt Yooz Epiž chiita taku cumpliscama. Niiqui Espiritu Santo cuchanžcaquicha; jalla niicamaž tjewznaquicha. Tuquitan wejrqui anchucaquiz nii puntu paljaychinpantača.

⁵ Juan Bautistaqui kjaztan bautissipanča. Anziqui tsjii kjaž majquiztan ančhucqui Espiritu Santužtan bautistaž cjequicha. —Nuž cjichiča Jesusaqui.

*JESUCRISTUQUI ARAJPACHQUIN QUE-
JPCHICHA*

⁶ Apostolonacaqui Jesusižtan juntjapsi cjen, pewczicha, tuž cjican:

—Wejt Jiliri, ¿anzpacha amqui tii Israel wajtchiz žoñinaca ninacž quintranacžquiztan liwriyaquiya? ¿Tii žoñinaca persuna mantisjapaya?

⁷ Nekztanaqui Jesusaqui ninacžquiz kjaaziča, tuž cjican:

—Yooz Ejppankazza timpunacaqui mantiñiqui, čhjulorat tii tii watačhaja, jalla nii. Nižaza Yoozqui ančhucaquiz ana zizkatz munča, čhjulorat tii Israel žoñinaca liwriita cječhaja, jalla nii.

⁸ Pero Espiritu Santuž ančhuca kuzquiz luztan, ančhucqui tjup kuzziz cjequiča. Jalla nekztan ančhucqui wejt puntuquiztan paljayñi ojk-layaquiča Jerusalén wajt yokaran, nižaza Judea yokaran, nižaza Samaria yokaran, nižaza tjapa kjutñi. —Jalla nuž cjichiča Jesusaqui.

⁹ Nekztan apostolonacaž cheran Jesusaqui ninacž taypiquiztan tsewcchuc waytissiča. Yooz Epiž chjichtatača arajpacha. Nužquiz tsjir taypiquiz katchiča Jesusaqui. Ana iya tjenčiča.

¹⁰ Nekztanaqui tsewcchuc cheksnan, pucultan chiw zquitichiz žoñinacažtakaz jecžquichiča ninacž žcati.

¹¹ Nii pucultan anjilanacaqui tuž cjichiča:

—Galilea žoñinaca, ¿kjažtiquiztan ančhucqui tsewcchuc chekžqui? Jesusaqui ančhucaquiztan arajpacha chjichtača. Pero tsjii nooj nii Jesusapacha wilta tii muntuquiz quejpžcaquiča, jaknužt tsjir taypiquiz katčhaja, jalla nuž tsjir taypiquizzakaz jecžcaquiča. Nuž tjonaquiča. —Nuž cjichiča anjilanacaqui.

MATIASQUI ILLZTA APOSTOL CJISSICHA

¹² Jalla nektanaqui apostolonacaqui Olivos cjita curullquiztan chjijwžquiču, Jerusalén watja quejpcchiča. Jerusalén watjaqui nii curullquiztan žcatitača, jeejz tjuñquiz jaknužt judiuž lii jaru ojcz waquizičaja, jalla nužullquin ojcztača.

¹³ Jerusalén watja irantižcu apostolonacaqui alujta kjuya luzziča; tsewcta altu pisuquin alujtatača. Nii apostolonacaqui tinacatača: Pedrotiča, Jacobotača, Juantača, Andrestača, Felipitača, Tomastača, Bartolomitača, Mateotača, Jacobo cjita Alfeož majchtača, Simonatača (niiqui cananista cjita partir žoñitača), nižaza Judas cjita Jacobož majchtača. Jalla ninacatača apostolonacaqui.

¹⁴ Tjapa ninacaqui tsjii kuzziz Yoozquin mayizizjapa ajcajczñipantača. Ninacžtan chica želatča Jesusiž lajknacžtan, Jesusiž maatan, nižaza yekja maatakanacžtan. Tjappacha Yoozquin mayizican želatča.

¹⁵ Tsjii noojiqui jalla nuž chicapacha želan Pedruqui tsijtsiča, nii Yoozquin criichi žoñinacž taypiquiz. Nii oraqui tsjii patac paatuncani nužquintakalča nii criichi žoñinacaqui. Pedruqui ninacžquiz cjichiča:

¹⁶ –Jilanaca, cullaquinaca, Judasqui Jesusa tanñi žoñinaca irpichiča. Tuquitan jalla nii Judas puntuquiztan Espíritu Santuqui Davidžquiz mazinchiča, Yooz tawk liwruquiz cjijrta cjisjapa. Nižaza nii Espíritu Santuž mazintaqui cumplispantača. Jaziqui cumplissiča.

¹⁷ Judasqui učhum partiquiztantiča. Nižaza Yoozta langzñiquiz uchtatača.

18 Nii anawali paañi Judasqui Jesusa tarasunta paaztan tsjii yoka kjaychiča. Nekztan, kozzuc achchiz tjojtscu, walu pjatsi ticziča.

19 Tjapa Jerusalén wajtchiz žoñinacaqui nii Judas quintu zizza. Jalla nii quintu nonžcu, Judas kjayta yoka tjuuskatchiča, Acéldama cjican. Acéldama tjuuqui ninacž tawkquiztan “Ljoc Yoka” cjiča.

20 Judas puntuquiztan Salmos cjita liwruquiz tuž cjiirtača: “Niž kjuyaqui jaytitaj cjila. Nižaza ana jecmi nii kjuyquiz kamla”. Salmos cjita liwruquiz tuž zakaz cjiirtača: “Niž puestuquiz yekja uchta j cjiila”.

21 Pedruqui tira chiichiča, tuž cjican:

—Jalla nii Yooz takuž cjen učumnacquiztan tsjiiqui illza, Judas puesto tanzñijapa. Jaziqui nii puesto tanzñi žoñiqui tjapa wejrnačaž Jesusižtan ojklayta timpu cumpant'ichi žoñinacžquiztan illza cjiistanča.

22 Juanž bautis timpu jalla nijctanpacha Jesusa arajpacha ojkcama, jalla nii timpu cumpant'ichi žoñinacžquiztan nii žoñiqui illza cjiistanča. Nekztan nii žoñiqui wejtnacatan chicapacha cjequiča, Jesusaž jacatatta puntu paljayzjapa. —Nuž cjiichiča Pedruqui.

23 Nekztanaqui pucultan žoñi illsiča, tsjiiqui Judas puesto tanzñijapa. Tsjiiqui José cjitatača, nižaza Josiqui Barsabás cjitazakaztača. Nižaza Josiqui Justo tjuuchizzakaztača. Tsjiizuñqui Matías cjitatača.

24 Nekztan nii ajczñi žoñinacaqui mayizichiča, tuž cjican:

—Jesús Jiliri, amqui tjapa žoñinacž kuz zizza. Jaziqui tii pucultiquiztan amiž illzta apóstol tjeeznalla.

²⁵ Niiqui Judas puestuquiz uchtaž cjequiča, amquin sirwiñiž ojklayzjapa. Judasqui nii puestuqui pertichiča anawali uj paažcu. Jaziqui infiernuquin ojkchiča. Jalla nuž nižtaqui waquizichiča. —Jalla nuž mayizichiča.

²⁶ Nekztanaqui ject Jesusiž illzta, jalla nii zizjapa, zurtiassiča, nii pucultiquiztan jakziltižquiz nii zurti cayačhaja, jalla nii. Jalla nuž zurtiascu, nii zurtiqui Matiasquiz caychiča. Jalla nekztan Matiasqui nii parti tuncaman illzta apostolonacžtan juntu cjissiča. Lijitum apóstol nužquiz cjissiča.

2

YOOZ ESPIRITU SANTUQUI TJONCHA

¹ Pentecostés cjita pjijsta tjuñquiz tjapa Jerusalén žejlñi criichi žoñinacaqui juntassiča tsjii kjuyquizkaz.

² Tiripintit tsewctan tsjii chawc tjamž joražtakaz nonziča. Tjapa nii kjuya zmali kjaazkatchiča.

³ Jalla nekztanaqui uj lastakaz jeczquichiča zapa mayni ninacž juntučama t'akžta, yekja yekja. Jalla nuž zapa maynižquiz nii ujnacaqui želatča.

⁴ Jalla nuž tjonžcu Espíritu Santuqui tjapa ninacžquiz luzziča. Nekztan ninacaqui parijunaca yekja yekja taku chiichiichiča, jaknužt nii Espíritu Santuž chiikatčhaja, jalla nii.

⁵ Nii timpunacaqui Jerusalén wajtquin wacchi judío žoñinaca kamñi želatča, ninacz cuzturumpi jarupan paañi. Nii judío žoñinacaqui tjapa kjuttan ajczquichitača.

⁶ Jalla nii suyniñi jora nonžcu, žoñinacaqui jun-tassiča. Zapa mayni nii žoñinacaqui persun taku nonziča. Nekztan ana tantiichuca, čhjulut watačhaja, nii.

⁷ Jalla nižtiquiztan ninaca ancha kuz turwaysi cjissiča. Ispantichi ninacpora parlassiča, tuž cjican:

—¿Tjapa nižta čhičhiñinacaqui anaj Galilea wajtchiz žoñinacajo?

⁸ Zapa mayni učum persun takuž nonža. ¿Jaknužupan teejo? —Jalla nuž cjichiča.

⁹ Nekz želatča Partia žoñinaca, nižaza Media žoñinaca, nižaza Elam žoñinaca, nižaza Mesopotamia žoñinaca, nižaza Judea žoñinaca, nižaza Capadocia žoñinaca, nižaza Ponto žoñinaca, nižaza Asia yokchiz žoñinaca,

¹⁰ nižaza Frigia žoñinaca, nižaza Panfilia žoñinaca, nižaza Egipto žoñinaca, nižaza Africa žoñinaca, nii Afric yokaqui Cirene yokž nawjktuñtan. Nižaza Roma wajtquiztan tjonñi žoñinaca želatča. Yekjapanacaqui judío maa ejpčhiz žoñinacatača. Yekjapanacaqui ana judío maa ejpčhiz cjenami judionacz cuzturumpi paañi žoñinacapantača.

¹¹ Nižaza želatča Creta wajtchiz žoñinaca, nižaza Arabia žoñinaca. Nii žoñinacaqui parlassiča, tuž cjican:

—Wacchi watjanacchiz žoñinacala učumtanaqui. Pero zapa mayni učum persun

takunacaž nonžla. ¡Nii tjapa takunacžtan chiiñinacaqui Yooziž ispantichuca paatanaca quint'ila!

¹² Jalla nuž chiichiiñi nonžcu tjappacha ispantichiča. Kuz turwaysi cjissiča. Nekžtan pewcassiča, tuž cjican:

—Nii puntuquiztanac, ¿kjažt cjeejo?

¹³ Yekjapanacaqui iñarchiča, tuž cjican:

—Aaaa, ninacaqui licchikazza.

PEDRUQUI ZOÑINACŽQUIZ PALJAYCHICHA

¹⁴ Nekžpacha tsijtsi želatča nii tuncapan illzta apostolonaca. Jaziqui Pedruqui altu joržtan paljaychiča, tuž cjican:

—Judea yokquiz kamñi žoñinaca, nižaza Jerusalén wajtquiz žejlñi žoñinaca, wejt taku zumpachaž nonžna. Chjuluzlaja, jalla niil kjanzt'ača.

¹⁵ Ančhucqui “Tii žoñinaca licchikaz” cjican pinsiča. Pero tii žoñinacaqui anača licchi. Anzic wenzlakača.

¹⁶ Anziqui Joelž cjiirta Yooz taku cumplissa. Nii Joelqui Yooz cuntiquiztan mazinchiča, tuž cjican:

¹⁷ “Yoozqui tuž cjiča, Tii timpu tucuzinžtan wejrqui tii muntuquiz žejlñi žoñinacžquiz wejt Espíritul tjača. Wejt Espíritu Santuž kuzquiz luzziz cjen, ančhuca maatinacaqui lucmajch cjiñi tjunmata cjiñi wejt takuž parlaquiča. Nižaza Espíritu Santuž cjen tjojowaqui visionanaca cheraquiča. Nižaza chawc chawcwanacaqui wiyquin chjuuznaquiča.

18 Jalla nii timpuquiz wejt sirwiñinacžquiz luctaka cjiñi maataka cjiñi wejt Espíritu cuchanžcača. Nii Espírituž cjen, ninacaqui wejt takuž parlaquiča.

19 Tsewc arajpachquinami tii yokquizimi wejrqui ispantichuca siñalanaca tjeeznača, ljocnaca, ujnaca, tsokchi tsjirinaca, uj žketižtakaz, jalla nuž.

20 Ima Jesucristo Jiliriž tjonan, tjuñiqui zumchi cjisnaquiča. Nižaza jiizmi ljocžtakaz cjisnaquiča. Jalla nižtanaca watan, wajillaž Yooz chawc tjuñiqui tjonaquiča, Yooz wali azi tjeežni tjuñi.

21 Nii timpuquizi qui jakziltat liwriita cjisjapa Yooz Jiliržquin mayizičhaja, jalla ni qui liwriitaž cjequiča”.

Jalla nuž cjiyrchiča Joelqui.

22 ‘Israel wajtchiz žoñinaca, wejt taku nonžna. Jesusaqui Nazaret wajtchiz žoñitača. Ančhuca watjanacquiz ojklaycan Jesusaqui Yooz aztan ispantichucanacami, milajrunacami, siñalanacami, jalla ninaca tjeeziča. Nii tjeežta obranaca ančhucqui zizza. Jalla nii obranacaqui kjanapacha tjeeziča, Jesusaqui Yooz Epiž cuchanžquita žoñipankazza, jalla nii.

23 Jalla nuž pajk obranaca paachiž cjenami ančhucqui Jesusa conkatchinčhucča. Nekztanaqui ančhucqui uj paañi žoñinacžquiz Jesusa intirjichinčhucča cruzquiz ch'awczjapa. Tuquitanpacha Yooz Ejpqui jalla tižtanaca watzpan zizatča. Nižaza niž muntacama tii watzjapa mantichiča.

24 Ančhucqui Jesusa conkatchinčhucča. Yooz Ejpzti Jesusa jacatatskatchiča. Anawal ticzquiztan liwriichiča. Nii ticzqui Jesusižquiztanaqui

anapantačha atipchuca.

²⁵ Tuqui ašk watanaca David cjita jiliri qui Jesu-
siž puntu cji rchiča tuž cjan:

“Yooz Jiliri wejttan chica željñipančha. Jalla nuž
wejt kuzquiz Yoozquin zint'iñpančha.
Yoozqui wejt žew latuquiz žejlčha,
wejr yanapzjapa, nižaza wejr ana
čjulquiztanami eksnajo.

²⁶ Jalla nižtiquiztan wejt kuzqui wali cuntin-
tutčha. Chipchipcan wejt tawkžtan Yoozquin hon-
oral tjaa-učha. Ticz cjenami, Yoozquin kuzziztčha,
Yooz Ejpqui wejr jacatatskataquičha.

²⁷ Yooz Tata, amqui ticzi žoñinacžtan wejt alma
anam ecaquičha. Wejrqui am lijitum sirwiñi
žoñtqui. Jazi qui wejt curpuqui anam ecaquičha
sipulturquiz mokajo.

²⁸ Nižaza wejtquiz arajpach kamaña
tjaajinchamčha. Tii muntuquiz amtan chica
kamcan ancha cuntintul cjeečha”.

Jalla nuž Jesu siž puntuquiztan cji rchiča
Davidqui.

²⁹ Jilanaca, učhum David cjita tuquita atchi ejpž
puntuquiztan kjanapacha intintiskats pecučha.
David jiliri qui ticzičha. Nižaza tjattatačha. Anz-
cama niž sipulturuqui učhum yokquiz žejlčha.

³⁰ Davidqui illztatačha Yooz taku chiiñjapa.
Yooz Ejpqui nižquiz juramintužtan com-
promitkalčha tuž cjan: “David, tsji iqui am
majchmaatquiztan (Cristo cjita) pajk jiliri
cjequičha. Niiqui mantiz puestuquiz uchtaž
cjequičha, tii wajtchiz žoñinaca mantizjapa.” Jalla
nuž Yoozqui Davidžquiz compromitchičha.

³¹ Jalla nii zizcu, Davidqui tuquitanpacha Cristuž jacatatz puntuquiztan chiichiča, tuž cjican: “Cristuž almaqui ticzi zoñinacžtan anaž ecta cjequiča. Nižaza Jesucristuž curpumi anaž mokaquiča.” Jalla nuž Cristuž puntuquiztan chiichiča.

³² Jaziqui Yooz Ejpqui nii Jesucristo jacatatskatchiča. Jacatattan, wejrnapachača Jesucristo cherchintqui. Jaziqui tisticu cjican, nii puntu weraral chiyasača.

³³ Jesucristuqui jacatatzcu, Yooz Ejpž žew latuquiz walja honorchiz cjissiča, Yooz Ejpžtan chica mantiñi. Nižaza Yooz Epiž tuquita chiita tawk jaru Jesucristuqui Espíritu Santo zoñinacžquiz cuchanžquichiča arajpachquiztan. Nii Espíritu Santuž tjonchiž cjen tii ančhucaž chertanacami nonztanacami watchiča.

³⁴ Davidqui persun puntuquiztan ana chiichiča. Davidča tsewc arajpachquin ana ojkchiqui, Yooztan mantizjapa. Davidpachača tuž cjichiqui:

“Wejt Yooz Ejp Jiliriqui wejt Yooz Majch Jiliržquiz chiichiča: ‘Honorchiz cjisjapa, wejt žew latuquiz julzna wejtta chica mantizjapa.

³⁵ Tsjii noojiqui am quintra zoñinaca k'ala atipžtaž cjequiča. Am kjojch koztan tjecžtažtakaz cjequiča. Jalla nii oracama wejt žew latuquiz julzna’”.

³⁶ ‘Ančhucqui Jesucristo cruzquiz ch'awcchinčhucča. Pero anziqui Yooz Ejpqui tii Jesusa tsjan chawc jiliri utchiča zoñinaca liwriizjapa. Jalla nuž intintiñi waquizila tjapa

Israel wajtchiz zoñinacaqui. Ultim werarača tii takuqui. —Nuž cjican Pedruqui paljaychiča.

³⁷ Jalla nuž nonžcu nii zoñinacaqui persun kuzquiz ancha zint'ichiča. Jalla nižtiquiztan Pedružquizimi parti apostolonacžquizimi pewcziča, tuž cjican:

—Jilanaca, ¿kjažt cjisnaqui? ¿Ĉhjulut wejrnac paaqui?

³⁸ Nekztanaqui Pedruqui kjaaziča, tuž cjican:

—Ančhucqui persun uj pajžcu, kuz campiya. Nekztanaqui Jesucristuž tjuuquiz bautistaž cjee. Jalla nekztanaqui ančuca ujnaca pertuntaž cjequiča. Nižaza Yooz Espíritu Santuqui ančuca kuzquiz nužukaz luzaquiča.

³⁹ Nii compromitta Espíritu Santuqui tjaataž cjequiča ančucaquizimi ančuca maatinacžquizimi, ažkquin wajtchiz zoñinacžquizimi, nižaza tjapa učhum Yooz Jiliriž kjawžta zoñinacžquizimi. Jalla ninacžquizimi Yooz Espíritu Santo tjaataž cjequiča. —Jalla nuž kjaaziča Pedruqui.

⁴⁰ Wacchi takunacžtan Pedruqui ninacžquiz chiižinchiča, tuž cjican:

—Liwriita cjis waquiziča, Cristuž quintra uj paañi zoñinacžtan ana casticta cjisjapa.

⁴¹ Jalla nekztanaqui walja zoñinacaqui Pedruž chiita taku tjapa kuztan catokchiča. Jalla nuž catoktiquiztan tjapa ninaca bautistaž cjissiča. Nii nojiqui tsjii ĉhjep warank zoñinacaqui yapžquichiča parti Yoozquin criichi zoñinacžquin. Jalla nuž mirchiča.

⁴² Tjapa nii criichi zoñinacaqui apostolonacaž tjaajintanacžquiz walja tjapa kuztača.

Ninacaqui tsjii kuzzizpan cjissičha. Chica juntasñitača Yoozquin mayizizjapa, nižaza čjjeri lujljzapa.

CRIICHI ZOÑINACŽ KAMTA

⁴³ Apostolonacaqui walja milajrunacami siñalanacami paachiča. Jalla nuž paatiquiztan tjapa žoñinacaqui ispantichiča.

⁴⁴ Tjapa Yoozquin criichinacaquiuntu kamchiča. Nižaza tjapa ninacž cusasami tsjiquiz juntjapñitača, zapa maynižquiz tojunzjapa.

⁴⁵ Parti cusasa tuyžcu, nii paaz tojunñitača, ana želinchiz žoñinacžquiz.

⁴⁶ Zapuru timpluquiz ajczñipantača Yoozquin sirwizjapa. Nižaza criichi žoñinacž kjuyquiztan kjuya okatča,untu chjeri lujljzapa. Humilde kuzziz zuma cuntintu lujlñipantača.

⁴⁷ Nižaza Yoozquin honora tjaañipantača. Jalla nuž nii criichinacž zuma kamtiquiztan parti žoñinacaqui ninaca zuma rispitiča. Zapuru žoñinacaqui criichiča, liwriita cjisjapa. Nekztan parti criichi žoñinacžquiz juntassiča. Jaziqi Jesucristo Jiliriqi criichi žoñinaca mirkatchiča.

3

ZUCH ZOÑI CHJETINTA

¹ Tsjii noojiqui majñakak ora, Pedružtan Juanžtan pucultan timplu kjutni yawchiča. Nii oraqui Yoozquin mayiziz oratača.

² Nicju tsjii zuch žoñi želatča. Zucha nasipantača. Zapuru timpluquin chjitzatača. Hermosa cjita timplu zanquiz žejlñitača, timplu luzni žoñinacžquiztan paaz tomangzjapa.

³ Nii zuch žoñiqui Pedružtan Juanžtan timplu luzñi cheržcu, paaz tomangziča.

⁴ Nekztanaqui Pedružtan Juanžtan nii zuch žoñž kjutñi cherziča. Nekztanaqui Pedruqui cjichiča:

—Wejtnaca kjutñi cheržca.

⁵ Jalla nuž chiitiquiztan nii zuch žoñiqui “Paaz onaá” cjican cherziča.

⁶ Pedruqui cjichiča nekztanaqui:

—Anaž wejta paaz žejlča. Antis wejta Jesu-cristuž azi žejlča, jalla nižtan yanapasača. Jesucristo cjita Nazaret wajtchiz žoñž aztan amquiz cjiwča, tsijsna. Oka.

⁷ Nižaza Pedruqui nii zuch žoñž žew kjarcu tanžcu, tsijskatchiča. Nii tsijskatan nii ora-pacha niž kjojchanacaqui tsijsñi cjissiča.

⁸ Jalla nekztanaqui nii zuch žoñiqui layžcu tsijsiča, nižaza ojklayñi cjissiča. Nekztanaqui Pedružtan Juanžtan chica timplu luzziča, ojkan, laylaycan, nižaza Yooz tjuu alawazcan.

⁹ Tjapa timpluquiz žejlñi žoñinacaqui nii zuch žoñi ojklayñi cherchiča, nižaza Yooz tjuu alawazñi nonziča.

¹⁰ Nekz žejlñi žoñinacaqui nii žoñi pajchiča. Nii žoñipacha zapuru Hermosa cjita timplu zanquiz žejlñitača, paaz tomtomangžcan. Nii čhjetinta žoñi cheržcu ispantichi cjissiča.

PEDRUZ PALJAYTA

¹¹ Nii čhjetinta žoñiqui Pedružquiztan Juanžquiztan anaž eclawk cjetča. Ninaca Portal de Salomón cjita timplu kjuyquiz želatča. Jalla

nijcchuc tjapa nii timpluquiz žejlñi zoñinacaqui zati pariju juntassiĉha. Ispantichiĉha.

¹² Nekztanaqui Pedruqui nii juntasquiñi zoñinaca cherĉcu, ninacĉquiz paljaychiĉha, tuĉ cjican:

—Israel wajtquiz zoñinaca, ĉkjaĉtiquiztan anĉhucqui ispantiya? ĉkjaĉtiquiztan anĉhucqui wejrnaca chekĉjo? Wejrnacpacha anaĉha tii zoñi ĉhjetinchintqui. Anal wejtnaca aztan ojklayskati atchinĉha. Niĉaza wejrnacaĉ persuna zuma kamtiquiztan anal tii zoñi ĉhjetinchinĉha.

¹³ Antiz Yoozkaz tii zoñi ĉhjetinchiĉui. Nii Yoozqui uĉhum tuĉuita ejpnacĉ Yoozza, Abraham, Isaac, Jacobo, ninacĉ Yoozza. Jalla nii Yoozpacha niĉ Majch Jesusiĉquiz pajk honorchiz cjiskatchiĉha. Nii Jesusaĉ cjen, tii zoñiĉ žejtchiĉha. Anĉhuczti jilirinacĉquiz nii Jesusa intirjichinĉhucĉha. Nekztanaqui Pilatuĉ cutz tantiiĉtan, anĉhucqui ana cutskatz pecchinĉhucĉha. “Tiiĉui anapanĉha Yooziĉ cuchanĉquitaĉui” cjican ĉhiĉchinĉhucĉha.

¹⁴ Jesusaĉui ana ĉhjul ujchizza. Yooz Ejpĉ kuzcama kamñiĉha. Nii Jesusa cuts cjenpacha, anĉhucqui tsjii pajk ujchiz zoñi cutskatz pecchinĉhucĉha.

¹⁵ Jalla nuĉ nii ĉeti tjaañi Jesucristo conchinĉhucĉha anĉhucqui. Yooz Ejpzi Jesusa ticztiquiztan jacatatskatchiĉha. Jalla nii puntuquiztanaĉui wejrnacpachaĉha cherĉhintqui. Jaziĉui nii puntu zuma werara chiyasaĉha.

¹⁶ Tii Jesucristuĉha azzizqui. Jesucristuĉquiz tjapa kuztan cjican, wejrnacqui Jesucristuĉ aztan tii anĉhucacĉ pajta zoñi ĉhjetinchinĉha.

Jesucristužquin tjapa kuzziz cjen tii žoñiqui zumpacha žejtchiča. Jalla nuž ančhucqui tjappachaž cheržcu, nayaquiča.

17 Jaziqui jilanaca, ančhucmi ančuca jilirinacami Jesusa conchinčucča. Jalla nii ora ančhucqui čhjulut paatčhaja anaž zizatča.

18 Jalla nuž cjenami Yoozqui niž persun taku cumpliskatchiča. Tuquiqui Yoozqui tjapa niž taku chiiñi profetanacžquiz chiikatchiča, tuž cji-can, “Yooz cuchanžquita Cristuqui sufristanča”. Nii takuqui cumplissiča.

19 Jaziqui ančhucqui Yoozquin kuzziz cjee, persun uj pajžcu. Yoozquin quejpžca, ančuca ujnaca pertunta cjisjapa. Jalla nekztanaqui Yooz Jiliriqui ančuca kuznaca cuntintu cjskataquiča.

20 Nižaza Yooz Jiliriqui wilta cuchanžcaquiča Jesucristo ančhucalta uchta liwriñiqui.

21 Ima Jesucristuž wilta tjonan Yooz Ejpqui tjappacha azquichaquiča, jaknužt tuquita zuma kuzziz Yooz taku chiiñi žoñinacaž mazinčhaja, jalla niicama cumpliskataquiča. Jalla nii cumplis oracama Jesucristužlaqui tsewc arajpachquin kamspanča.

22 Moisesqui učhum tuquita ejpnacžquiz cjichiča: “Yooz Jiliriqui ančucaquiz tsjii Yooz taku chiiñi profeta cuchanžcaquiča. Nii žoñiqui ančuca wajtchiz žoñinacžquiztanpacha ulnaquiča. Jaknužt Yooz Ejpqui wejr cuchanžquitčhaja, jalla nužuzakaz tsjii cuchanžcaquiča. Ančhucqui nii Yooz Epiž cuchanžquita žoñž taku tjapa kuztan nonžna, čhjulut chiyáčhaja, jalla nii.

²³ Jakziltat ana niiz taku nonznawk cječhaj ni-iqui, Israel wajtchiz zoñinaczquiztan pjaltaž cjequiča. Nižaza walja castictaž cjequiča”. Nuž cjiča Moisesqui.

²⁴ Nižaza tii timpu puntuquiztan tjapa Yooz taku chiiñi profetanacaqui parlichipanča Samuelžquiztanpacha jecchuc.

²⁵ Nii profetanacz taku Yooz Ejpqui ančhucaltajapa chiikatchiča. Ančhucaltazakaz Yooz Ejpqui tsjii zuma taku tjaachiča učhum tuqita ejpnaczquiz. Jalla tuž cjican, Yoozqui Abrahamžquiz taku tjaachiča: “Am majchmaatiž cjen, tjapa tii muntuquiz žejlñi zoñinacztajapa favoral paa-ača wejrqui”.

²⁶ Yooz Ejpqui niiz Majch jacatatskatžcu, ančhucacuz primira cuchanzquichiča, favora paacan. Jazic tjapa ančhuc anawali paaznaca apatatspanča.

4

PEDRUŽTAN JUANŽTAN

¹ Pedružtan Juanžtan jalla nuž parlan, timplu jilirinacaqui, timplu zultatž jiliržtan saduceo parti zoñinacztan tjonchiča.

² Pedružtan Juanžtan zoñinaca tjaajnatča, tuž cjican:

—Jesusaqui ticziquiztan jacatatchiča. Jalla nuž kjanapacha tjeeža, tjapa ticzi zoñinacaqui jacatataquiča, jalla nuž. —Jalla nižta chiitiquiztan ancha žawjchiča nii jilirinacaqui.

³ Jalla nekztanaqui Pedružtan Juanžtan preso chjitztatača. Nižaza carsilquiz majctatača, jakatažcama. Nii oraqui zeziqeyatača.

⁴ Jalla nuž Pedružtan Juanžtan Yooz puntu chiichiichiz cjen, tama nonzñi žoñinacaqui tjapa kuztan Yoozquin criichiča. Luctak criichi žoñinacakaz tsjii pjijska warankatača.

⁵ Jakatažuqui Jerusalén wajtquin ajczitača wajt jilirinacami, timplu jilirinacami lii tjaajiñinacami.

⁶ Nii oraqui timplu chawc jiliritača Anasqui. Niimi ajczitača, nižaza Caifastan, Juanžtan, Alejandružtan. Nižaza tjapa timplu chawc jilirinacž famillanacami ajczitača.

⁷ Jalla nuž ajcziž cjen Pedružtan Juanžtan zji-jckatchiča. Nekztanaqui nii jilirinacž taypiquiz apantiskatžcu pewcziča, tuž cjan:

—Ančhucqui, ¿jakzilta jiliriž mantitaž cjen nižta ančhuc paažo?

⁸ Jalla nekztanaqui Espíritu Santuqui Pedružquiz tuž chiikatchiča:

—Israel wajtchiz jilirinaca, timplu jilirinaca,

⁹ wejrnacqui ančucaž yujcquiz zjijtača, tsjii wali paata zumpacha zizajo. Jaknužt tii zuch žoñi žejtchizlaja, jalla nii ziz pecaquiz niiqui, niil quint'asača.

¹⁰ Wejrnacqui ančuca yujcquiz weraral chiyacha, ančhuc nii quintu zumpacha zizajo; nižaza tjapa Israel wajtchiz žoñinaca zumpacha zizajo. Jesucristuž aztan tii žoñi čhjetinta žejlča tjapa ančuca yujcquiz tsijtchi. Ančhucqui nii Nazaret wajtchiz Jesucristo cruzquiz

ch'awcchinčhucča. Nekztanaqui Yoozqui niipacha ticziquiztan jacatatskatchičha.

¹¹ Ančhucqui kjuy pirkiñinacažtakaz nii zuma maz tjojtchiča, “Ana cusa” cjican. Jalla nii tjojtta mazqui Jesusapanča. Nii tjojtta maztti ancha cusala, isquinquiz nonžta maz irata cjis-sičha. Yoozqui cjichiča, “Tii mazza tsjan juc'ant chekanaqui”.

¹² Jesucristupankazza Liwriiñiqui. Yooz Ejpqui anaž iya jakziltami utchiča liwriiñi cjisjapa. Tii muntuquiz žejlñi žoñinacžquiztan ana iya liwriiñi žoñi žejlča. Jesucristupankaz učum liwriiñi atasacha.

¹³ Jalla nuž Pedruqui chiichiča Juanžtan. Nii pucultanaqui ana istutiñitača, campuquin kamñi žoñikazza. Jalla nuž cjenami Pedružtan Juanžtan tjup kuzziz chiichiča, ana ekscan. Jalla nii nayžcu nii jilirinacaqui ispantichiča. Nižaza pajchipan cjissičha, nii pucultanaqui Jesusižtan čica ojklaychitača, jalla nii.

¹⁴ Nekz čica nii čhjetinta žoñimi tsijtchi želatča. Jalla nižtiquiztan ana čhjul quintrami čii atchiča.

¹⁵ Jalla nekztanaqui nii čhjepultan žoñinaca ajczquiztan ulanskatchičha. Ninacaž ulantan, nii jilirinacaqui ninacpora zmali parlassičha,

¹⁶ tuž cjican:

—¿Čhjul učum tii žoñinacžtan paaquejo? Tjapa Jerusalén žoñinacaqui tinacaž paata milajru zizkalala. Tinacaqui pajk siñala tjeeziča. Anača nicchuca učumqui.

¹⁷ Tii čhiitaqui ana iya zizta cjisjapa, učumqui ninacžquiz mantiz waquiziča, ana iya Jesusiž

puntu parlajo. “Nižta parlaquiž niiqui, ančhucqui casticta cjequiča” jalla nuž chiižinz waquiziča.

¹⁸ Nekztanaqui nuž parli žeržcu, nii jilirinacaqui Pedružtan Juanžtan kjawziča. Nekztan tuž chiižinchiča:

—Jaziqui ančhucqui anaž iya parlaquiča nii Jesusiž tjuužtan. Nižaza anaž jeczquizimi tjaaj-naquiča Jesusiž puntuquiztan. —Jalla nuž mantichiča.

¹⁹ Jalla nuž mantitiquiztan Pedružtan Juanžtan kjaaziča, tuž cjican:

—Ančhucpachaž tantiyasa. ¿Chjulut walikaz Yooz yujcquiziya? ¿Ančucaž mantita caz wali cjesaya? už ¿Yooz mantita caz wali cjesaja?

²⁰ Wejrnacqui anal weriž chertanacami nonžtanacami parlis jaytasača. Jalla nuž parlispanča wejrnacqui.

²¹ Jalla nekztanaqui nii jilirinacaqui Pedružquiz Juanžquiz zuma ch'aanchiča. Pero nižtami ninacaqui cutztatača. Jalla nužquiz nii jilirinacaqui ana castiqui atchiča. Parti žoñinacami Yoozquin alawazziča, nižaza Yoozquin honora tjaachiča jalla nii milajru paatiquiztan.

²² Nii čhjetinta žoñiqui pusi tunc wata jilchiztača.

CRIICHI ŽOÑINACAQUI MAYIZICHICHA

²³ Nekztanaqui Pedružtan Juanžtan carsilquiztan cutztiquiztan niž mazinacžquin ojkiča. Tjapa ninacž ojklaitanaca quint'ichiča, jaknužt nii timplu jilirinacami wajt jilirinacami chiitčaja, jalla nii liwj quint'ichiča.

²⁴ Jalla nuž quint'itiquiztan, tjapa ninacaqui tsjii kuzziz Yoozquin mayizichiča, tuž cjican:

—Yooz Jiliri, tjapa mantiñi Jiliri. Amqui arapachami yokami, kot kjazmi, nižaza tjappacha paachamča.

²⁵ Amtan Espíritu Santužtan am David cjita sirwiñi tuž chiikatchamča:

“¿Kjažtiquiztan Yooz quintra žawjchi chiichii nacionanacchiz žoñinacaqui? ¿Kjažtiquiztan tii muntu žoñinaca ana zuma tantii?

²⁶ Nižaza tii muntuquiz chawc jilirinacaqui Yooz quintra tsijtsa, nižaza chawc jilirinacaqui Yooz Jilirž quintra nižaza niiž uchta Jesucristuž quintra parlizjapa juntassa”.

Nuž cjican cjirchiča Davidqui.

²⁷ Jalla tižta werarača. Herodestan, Poncio Pilatužtan, Israel wajtchiz žoñinacžtan, yekja wajtchiz žoñinacžtan, jalla tjapa ninacaqui tii wajtquin juntassiča wali zuma Jesusiž quintra paazjapa. Pero am Majch utchamča, tsjan chawc jiliri cjisjapa.

²⁸ Jalla nuž juntascu ninacaqui am kuzquiz pinsitacama cumplissiča. Nužquiz cjissiča. Amiž tuquitan pinsita jaru, jalla nužpacha watchiča.

²⁹ Anziqui, Yooz Jiliri, wejtnaca quintra ch'aanita taku am zizza. Jaziqui wejtnacaquiz, amiž mantita ojkñi žoñinacžquiz, zuma tjup kuz tjaažcalla, ana ekscan am taku parlajo.

³⁰ Nižaza am azi tjaažcalla, laa žoñinaca čhjetinzjapa, nižaza zuma obranacami, nižaza siñalanacami, nižaza milajrunacami paazjapa, am zuma Majch aztan. —Jalla nuž chiican Yoozquin mayizichiča.

³¹ Jalla nekztanaqui Yoozquin mayiziz žeržtan jakziquin ajczitažlaja, jalla nii kjuya

čekjinchiča. Nižaza tjapa ninacaqui Espíritu Santuž azi tanzicha ninacž kuzquiz. Jalla nižtiquiztan walja tjurt'iñi kuzziz Yooz taku parličiča.

CRIIČI ZOŇINACŽ KAMTA

³² Tjapa nii wacchi criichinacaqui tsjii kuzziztača. Nižaza ninacž pinsamintuqui tsjiipanikaztača. Jakzilta zoñit cusasanacchiz želatčaja, nii zoñinacaqui ana cusasquiztan chiiñitača, “Wejt cusasaž tiic” cjicanaqui. Antis tjapa ninacž cusasanacaqui tsjižtakaz želatča, tjapa criichi zoñinacžtajapa.

³³ Nii Jesusiž illzta apostolonacaqui Jesús Jiliriž jacatatz puntuquiztan tirapan paljayñitača, zuma atipñi tawkžtan. Zuma wali azziz tawkžtan atipñipantača. Nižaza Yoozqui ninaca walja yanapchiča.

³⁴ Ninacžquiztan anaž tsjii t'akjir zoñi želatča. Jakzilta criichi zoñizlaja yokchizimi kjuychizimi, jalla ninacaqui nii tuyžcu paaz zjicñipanikazza.

³⁵ Nii paaz zjicžcu apostolonacžquin intirjiñipanikaztača. Nižaza ninacaqui nii paazqui chicata tojžñitača ana želinchiz zoñinacžquiz.

³⁶ Nižaza tsjii José cjita levita t'akquiztan zoñi želatča, Chipre cjita isla yokchiz zoñi. Nii José cjita criichi zoñiqui yekja tjuuchizzakaztača Bernabé cjita. Jalla nuž tjuuskatchiča apostolonacaqui. Nii Bernabé tjuuqui tuž cjiča, “Zuma Kuzñi”, jalla nii.

³⁷ Nii Bernabé cjita zoñiqui tsjii yokchiztača. Nekztanaqui nii yoka tuchiča. Nii yoka tuyžcu,

paaz zjicchiča. Nekztanaqui apostolonacžquin nii paaz intirjichiča.

5

ANANIAS, NIZAZA SAFIRA UJ PAACHICHA

¹ Yekja žoñi želatča, Ananías cjita. Safira cjiti tjunchiztača. Ninacaqui persun yoka tuychizakazza.

² Nii yok tuyta paazqui t'eczcu, persunaltajapa parti čhjojchiča. Partillakaz chjitchiča apostolonacžquin, jalla nužuñ yoka tuychižtakaz. Niiž tjunqui nii t'eczta paaz zizatča.

³ Jalla nekztanaqui Pedruqui cjichiča:

—Ananías, ¿kjažtiquiztan am kuzquiz Satanás luzzita? ¿Espíritu Santužquiz tižta k'otsjapaqui? Nii yok tuyta paazqui t'ecsamča.

⁴ Ima tuycan nii yokaqui amtapantakaya, ¿ana jaa? Tuyžcu, nii yoka tuyta paazqui amtazakaztaž, ¿ana jaa? ¿Kjažtiquiztan tižta ana wali pinsichamtajo? Amqui Yoozquiz k'otchamča; ana žoñžquiz k'otchamča.

⁵ Pedruž nuž chiitiquiztan, Ananiasqui ticzi tjojtsiča. Jalla nižtiquiztan nii quintu nonchi žoñinacaqui ancha eksñi cjissiča.

⁶ Jalla nuž ticstan, tsjii kjažt tjojtjowanacaqui macjatchiča, Ananías ticzi curpu murtajzjapa. Nekztan nii tjojtjowanacaqui tjati chjitchiča.

⁷ Tsjii čhjep orquiztan, Ananías tjunqui tjonchinča. Naaža lucu ticzi quintu ana zizatča.

⁸ Nekztanaqui Pedruqui naaquiz pewcziča, tuž cjan:

—Wejtquiz maznalla. ¿Ančuca yoka tuyta paaz nužullakazkaya?

Nekztanaqui naaqui kjaaziĉha, tuŷ cjican:

—Jesalla, nuŷullapanĉha.

⁹ Nekztanaqui Pedruqui naaquiz cjichiĉha:

—Anĉhucqui Yooz Espíritu Santo incallz pecatĉha. ¿Kjaŷtiquiztan anĉhucqui pucultan nuŷ kaasjo? Nii zancucŷ tjonĉha nii am lucu tjaŷtŷquiñinacaqui. Niŷaza anziqui amzakaz chjichaquiĉha.

¹⁰ Nii orapacha Pedruŷ kjojchquiz tjojtŷcu ticzinĉha. Nii tjoŷjowanacaqui kjuya luzcu naa ticzin cherchiĉha. Niŷaza jwezcu tjati chjitchiĉha naaŷa lucŷ latuquin.

¹¹ Jalla niŷtiquiztan tjapa nii iclizziz ŷoñinacami, niŷaza nii quinto nonchi ŷoñinacami ancha eksñi cjissiĉha.

MILAJRUNACA PAATA

¹² Nii tjuñinacquiz apostolonacaqui walja siñalanacami milajrunacami paañitaĉha ŷoñinacaŷ cheran. Niŷaza tjapa criichinacaqui Portal de Salomón cjita kjuyquiz ajczñitaĉha.

¹³ Ana jakzilta ana criichi ŷoñinacami criichinacŷtan mazi pajas, ancha eksnatĉha. Jalla nuŷ cjenami ŷoñinacaqui walja rispitchiĉha criichinacŷquiz.

¹⁴ Niŷaza tsjan tsjan ŷoñinacaqui Yooz Jilirŷquin kuzziz cjissiĉha, luctaka cjiñi maataka cjiñi. Walja ŷoñinacaqui Yoozquin criichiĉha.

¹⁵ Niŷaza laa ŷoñinacami callquin jweztataĉha. Callquin tjajz zquiti chjinŷcu, t'apŷtataĉha. Niŷaza camillquiz zakaz nonŷtataĉha. Jalla nuŷ nonŷta ŷejlcan Pedruŷ tjonz tjewziĉha, tsjii

kjažta čhjetinta cjeajo. Pedruž siwsallamekaj laa žoñinacž juntuñ wat jaa, cjiñitača.

¹⁶ Nižaza nii wajt vicin watjanacquiztan walja žoñinacaqui tjontjonatča Jerusalenquin. Laanacami zajraž tantanacami zijc zijcatča. Nižaza tjapa laa žoñinacaqui čhjetintatača.

*PEDRUZTAN JUANZTAN CARSILQUIZ
CHAWJCTA*

¹⁷ Jalla nižtiquiztanaqui timplu chawc jiliriQUI saduceo parti žoñinacžtan ancha iñizichiča.

¹⁸ Jalla nuž iñizižcu, apostolonaca preso tanchiča, carsilquiz chawjczjapa.

¹⁹ Jalla nuž carsilquiz chawjctaž cjen ween tsjii Yooz Jilirž anjilaqui tjonchiča. Nižaza carsil zan chawjcz cjetsiča. Cjetžcu, apostolonaca jwes-siča tuž cjican:

²⁰ –Timpluquin oka. Jalla nicju tsijtsna. Jesu-cristuž kamaña puntuquiztan tjapa žoñinacžquiz paljayaquiča.

²¹ Jalla nii anjilaž chiita jaru, jakatažuqui wentanalla timplu ojkchiča. Timpluquin luzcu, tjaajñi kallantichiča. Jalla nii orazakaz timplu chawc jiliriQUI niž mazinacžtan parliz kjuyquiz ajcziča. Tjapa Israel wajtchiz jilirinaca kjawziča. Nižaza zultatunaca mantichiča, nii chawjcta apostolonaca zijcajo.

²² Jalla nuž carsilquin irantižcu, nii cuchanta zultatunacaqui ana čhjulumi wajtchiča. Que-jpžcu quint'ichiča,

²³ tuž cjican:

–Wejrnacqui carsilquin irantižcu, zuma chawjcta zalchinča. Nižaza ichñi zultatunacaqui

želatĉha carsil zawnctan. Nekztanaqui carsila cjetžcu, luzzinĉha. Nii kjuyltanaqui cherassinĉha anaž zinta pres žoňi želatĉha.

²⁴ Jalla nii quintu nonžcu timplu chawc jilirimi timplu zultatž jilirimi nižaza parti timplu jilirinacami, jalla tjappacha ninacaqui zuma kuz turwayzi cjissičha, ¿Kjažt cjequejo? cjican.

²⁵ Jalla nii orazakaz tsjii žoňiqui iran-tižquichiĉha, tuž cjican:

—Anĉucaž carsilquiz chawjĉta žoňinacaqui timpluquin žoňinacžquiz tjaajinĉha. —Nuž cjican quint'ichiĉha.

²⁶ Nekztanaqui nii guardiňi zultatž jiliriĉqui ojkĉiĉha zultatunacžtan. Nekztan apostolonaca zijĉĉiĉha, ana chjojritžcu. “Chjojritžtaž cjesaž niiĉqui, parti žoňinacaqui wejrnacž maztan ĉhjasasaka”, jalla nuž pinsichiĉha nii zultatunacaqui.

²⁷ Jalla nuž zijĉžcu, nii parliz kjuyquin tsijt-skatchiĉha chawc jilirinacž yujcquiz. Jalla nuž želan nii timplu chawc jiliriĉqui chiižinĉiĉha, tuž cjican:

²⁸ —Wejrnacqui anĉucaquiz ana iya parlaj cjichintala. Nižaza nii žoňž puntuquiztanaqui ana iya tjaajnaj cjichintala. Jaziĉqui, ¿ĉhju lu paachinĉhuctajo? Anĉucqui tjapa tii Jerusalén watja ĉhjipĉhinĉhucĉha anĉuca tjaajintižtan. Nižaza nii žoňi contiquiztan wejtnacaquiz uj tjojtunz pecĉhinĉhucĉha.

²⁹ Jalla nekztanaqui Pedružtan parti apostolonacžtan kjaaziĉha, tuž cjican:

—Primiraqui wejrnacqui Yooz castanĉha. Niiž jarukaz žoňimi cazasaĉha.

³⁰ Ančhucqui cruzquiz ch'awczcu Jesusa conch-inchuccha. Nekztan učhum tuquita atchi ejpž Yooz tii Jesusa jacatatskatchiicha.

³¹ Jacatatskatžcu Yoozqui nii Jesusa pajk hon-orchiz cjiskatchiicha. Niiž žew latuquiz želan, Yooz Ejpqui mantis poder tjaachiicha, Jesusa tsjan chawc jiliri cjisjapa. Nižaza Jesusača Liwriiñiqui, tii Israel wajtchiz žoñinaca kuz campiiskatajo, ninačž uj pertunta cjeyajo.

³² Jalla tii puntunacquiztan wejrnacqui zizuča. Nižaza tisticu cjican wejrnacqui nii chiyučha Espíritu Santužtanpacha. Yoozqui nii Espíritu Santo tjaacha niiž kuzcama kamñi žoñinacžquiz. —Nuž cjican cjichiicha Pedruqui.

³³ Jalla nii nonžcuqui, nii jilirinacacqui apostolonacžjapa ancha žawjchiicha. Conz pecatča.

³⁴ Pero nii jilirinacžquiztan tsjii Gamaliel cjita fariseo želatča. Nižaza lii tjaajiñi maestru-tača niiqui. Tjapa žoñinacacqui niižquiz walja rispitiñitača. Jalla nii Gamaliel cjita žoñiqui tsi-jtsiicha. Nuž tsijtscu mantichiicha apostolonaca zancu jwescajo tsjii ratu.

³⁵ Nekztan parti jilirinacžquiz tuž cjichiicha:

—Israel wajtchiz žoñinaca, ančhucqui tii žoñinacžquiztan cwitazaquiicha. Anaž čhjulumi paaz waquiziicha.

³⁶ Ančhucž cjuñzna, tsjii tuquiqui Teudas cjita žoñiqui jeczquichiicha. Nii žoñiqui “Wejrtča chekan žoñtqui”, tuž cjican ojklaychiicha. Jalla nekztanaqui pajcpic patac žoñinacacqui nii apziicha. Pero nii Teudasqui contatača. Nekztanaqui nii apzñi žoñinacacqui wichanziicha. Nužquiz niiž tjaajintaqui tjabatatača.

37 Niiž wiruñ censo tjuñinacžquiz tsjii Judas cjita žoñiqui jecžquichiča. Galilea wajtchiztača. Zoñinacaqui nii apzquichiča. Ultimquiziqui con-tazakaztača. Nekztanaqui niiž apzñinacaqui wichanzi cjissiča.

38 Jalla nižtiquiztan nižta wattanaca cjuñžcu, tii žoñinacž quintra anača čjulumi paa. Ana tinacžquiz mitis waquiziča. Tii žoñinacaqui per-sun kuzcamakat paačhaja, nuž cjenaqui anaž tjurasacha. Orallaž kataquiča.

39 Yooz kuzcamat tii žoñinacaqui paačhaja, jalla nekziqiu tinacaqui anaž tjatanchuca cjesača. Tinacaqui Yooz parti žoñinacžlaja, jalla nii quin-tra paasaž niiqui, Yooz quintraž cjesača. Jalla nižtiquiztan tii žoñinacž quintra anaj paala. — Jalla nuž cjican nii žoñinacžquin chiižinchiča Gamaliel cjita žoñiqui.

40 Nižtiquiztanaqui tjapa jilirinacaqui naazi cjissiča. Jalla nekztanaqui kjawziča apos-tonaca. Kjawžcu, ninaca wjajtchiča. Nižaza chiižinchiča ana iya parlajo nii Jesusiž pun-tuquiztan. Nekztan ninacaqui cutztatača.

41 Jalla nuž cutztan, jilirinacž yujcquiztan ulanchiča. Yoozqui jalla nuž munchiča, Jesusiž laycu sufrichi ninacaqui, jalla nuž. Jalla nuž cjenaqui ancha cuntintutača apostolonacaqui.

42 Nekztanaqui zapuru Jesucristuž puntuquiztan tira tjaajnatča, nižaza tiraž paljayatča timpluquinami kjuyquinami, “Jesusaqui Yooz cuchanžquita Cristučha” cjiñitača.

6

PAKALLAK CRIICHI JILANACA ILLZTA

¹ Nii timpuquiz Yoozquin criichinacaqui waljaž yapatča. Nuž yaptiquiztan tsjii quija žejlchiča. Griego taku chiiñi judionacaqui hebreo taku chiiñi judionacz quintra quijziča, tuž cjican:

—Wejtnaca žew maatakanaca ana cusa atintitača. Zapuru čhjeri tojzquiz upa čhjeri onantača.

² Jalla nuž quiytiquiztan nii tuncapan apostolonacaqui tjapa Yoozquin criichinaca kjawziča. Nekztanaqui tjappacha juntjapžcu ninaczquiz cjichiča:

—Wejrnacqui Yooz taku parli apatatsqui anaž waquiziča, čhjerikaz atintisjapaqui.

³ Jilanaca, pakallak žoñinaca ančhucaquiztan kjurzna. Zuma kuzziz žoñi, nižaza Yooz Espíritu Santuž irpita žoñi, jalla nižaza zuma intintazzi žoñi, nižta žoñinaca kjurzna. Nekztan ninacaqui tii čhjeri atintiz puestuquin uchta cjequiča.

⁴ Wejrnaczi Yoozquin mayiziz, nižaza Yooz taku tjaažinz tiral atintača. Nii langzquiz tiral kuz tjaa-ača.

⁵ Jalla nii parlita jaru tjappacha asiptichiča. Nekztanaqui pakallak zuma žoñinaca illztatača, čhjeri atintisjapa. Primeruqui Esteban illztatača. Estebanaqui Yoozquin tjapa kuzziztača, nižaza Yooz Espíritu Santuž irpita kamñitača. Nižaza illztatača Felipižtan, Procoružtan, Nicanoržtan, Timonžtan, Parmenastan, nižaza Nicolastan. Nicolasqui Antioquía wajtchiz žoñitača. Ima Jesucristužquiz kuzziz cjican

Nicolasqui judío cuzturumpichiztača, ana judío zoñi cjenami.

⁶ Jalla nuž illzcu nii pakallak zoñinaca apostolonacžquin chjichtatača. Nekztanaqui apostolonacaqui ninacžta mayizichiča, nižaza ninacž achquiz kjaržtan lanziča, nii puestuquiz cjeyajo.

⁷ Jalla nekztanaqui Yooz taku paljayta cjen, Jerusalén wajtquin criichi zoñinacaqui anchaž miratča. Nižaza wacchi judiuž timplu jilirinacami tjapa kuztan Yooz taku catokchiča.

ESTEBAN PRESO TANTA

⁸ Estebanaqui walja Yooz aztantača, nižaza Yooziž yanaptatača. Jalla nižtiquiztan walja milajrunacami siñalanacami paachiča zoñinacaž cheran.

⁹ Tsjii nooj tsjii kjaž judío cuzturumpi paañi zoñinacaqui Estebanžtan ch'aasi kallantichiča. Nii judío cuzturumpi paañi zoñinacaqui “Liwrita zoñi” cjitatača. Ninacžtan, tsjii kjažt Cirene wajtchiz zoñinacžtan, nižaza Alejandría wajtchiz zoñinacžtan, nižaza Cilicia wajtchiz zoñinacžtan, nižaza Asia yokquin kamñi zoñinacžtan, jalla nii zoñinacaqui Estebanžtan ch'aassiča.

¹⁰ Jalla nuž ch'aascan, Estebanžquiz ana atipi atchiča. Estebanqui Espíritu Santuž tjaajinta taku chiiñipantača.

¹¹ Jalla nižtiquiztan nii quintra zoñinacaqui toscar tisticunacaž taku kjaychiča, tuž chiican k'otajo:

—Tii Estebanqui ana wali tawkžtan Moisés quintrami nižaza Yooz quintrami chiichiča. Wejrnacqui nuž chiyanacqui nonzinpanča. —Jalla nii takunacžtan tisticunacžquiz tjaajziča.

12 Jalla nekztanaqui nii Estebanž quintra žoñinacaqui parti žoñinaczquiz walja žawjkatchičha. Zoñinacami, wajt jilirinacami, nižaza judío lii tjaajiñi maestrunacami, tjapa ninacaqui žawjchi cjissičha. Nuž žawjchi cjiscu Esteban tanchičha. Nekztanaqui Esteban tanžcu, pajk parliz kjuya chjitchičha.

13 Nižaza toscar tisticunaca apantižquichičha. Nii toscar tisticunacaqui tuž cjichičha:

—Tii žoñiqui tirapan tii Yooz timplu quintra chiiñičha, nižaza Yooz lii quintra chiiñičha. Nužupanž parliñičha.

14 Nižaza wejrnacqui nonzinčha, “Nii Jesús cjita Nazaret wajtchiz žoñiqui tii timplu pajlnaquičha”, nuž cjican tiiqui chiiñičha. Nižaza tiiqui cjiñičha, “Nii Jesusaqui Moisés tjaata cuzturrumpinaca campiyaquičha”. Nuž cjiñičha tiiqui.

15 Jalla nekztanaqui tjapa nii julzi jilirinacami Estebanž kjutñi cherzičha. Nii oraqui Estebanž yujcqui anjilž yujcžtakaz cherzičha.

7

ESTEBANQUI TJURT'ICHICHA

1 Nekztanaqui timplu chawc jiliriqúi Estebanžquiz pewczičha, tuž cjican:

—¿Ultimu nužupanza amya?

2 Nekztanaqui Estebanqui kjaazičha, tuž cjican:

—Wejt jilanaca, ejpnaca, jilirinaca, nonžna. Učhum zuma honorchiz Yoozqui učhum tuquita atchi ejp Abraham cjita žoñžquiz persuna tjeezičha. Nii oraqui Abrahamqui Mesopotamia

yokquin kamñitača. Imaž Harán yokquin kami okatča.

³ Nii oraqui Yoozqui Abrahamžquiz cjichiča: “Am yoka eca, nižaza am parintinacami eca. Jakzi yokquinam okačhaja, jalla nicju am tjaajznača”.

⁴ Jalla nižtiquiztan Abrahamqui Caldea yokquiztan ulanchiča, Harán yokquin kami ojkchiča. Nekz kaman Abrahamž ejpqui ticziča. Nekztanaqui tekzi tii učumž kamz yokquiz Abraham tjonchiča. Yoozza nii irpichiqui.

⁵ Jalla tekz kaman, Yoozqui ana čhjul yok irin-sami tjaachiča. Abrahamžtajapa persun yoka ana želatča. Jalla nuž cjenami Yoozqui taku ecchiča, tuž cjican: “Tii yoka amtapanž cjequiča. Nižaza am ticžtanaqui tii yokaqui am maatinacaž tanznaquiča”. Jalla nuž cjican Yoozqui Abrahamžquiz taku tjaachiča. Nii oraqui Abraham ana ocjalchiz cjenami, Yoozqui nuž čhiichiča.

⁶ Nižaza Yoozqui nižquiz cjichiča, “Wiruñaqu am majchmaatinacaqui yekja yokquin kamaquiča, nacjuñta žoñinacažtakaz. Nekziqui pusi patac wata kamaquiča. Jalla nii yokquin am majchmaatinacaqui yekja žoñž mantakaz paaquiča. Nižaza sufrican kamaquiča”.

⁷ Nižaza Yoozqui cjichiča: “Am majchmaatinaca sufriskatchiž cjenauqui, wejrqui nii sufriskatñi žoñinaca casticača. Nekztanaqui am majchmaatinacaqui nii yokquiztan ulanžcaquiča. Ulanžcu tii yokquiz wejr sirwaquiča”.

⁸ Nižaza Yooz Ejpqui tsjii compromiso paachiča Abrahamžtan. Nii compromis

jaru Abrahamqui persun janchiquiz chimpuskatchiĉha. Niżaza quinsakal tjuñquiztan Isaac majch nastan, Abrahamqui niĉ persun majchquiz chimpuchiĉha. Wiruñaquí Isaacqui niĉ majch Jacobžquiz chimpuchiĉha. Wiruñaquí niżazakaz Jacobqui niĉ tuncapan lucmajch maatinacžquiz chimpuchiĉha. Jacobž lucmajch maatinacžquiztan tjonĉiĉha uĉhum tuncapan t'akanaca.

9 'Nii Jacobž majchnacaqui uĉhum tuquita atchi ejpnacataĉha. Ninacaqui José cjita lajkž quintra iñiziñitaĉha. Jalla nižtiquiztan ninacž lajk tuyĉiĉha. Nekztanaqui nii tuyta lajkqui Egipto yokquin ĉjichtaĉha. Pero Yooz Ejpqui Josižtan ĉhicapachataĉha nii oraqi.

10 Nekztan sufrichi želan Yoozqui José liwriĉiĉha. Niżaza walja zizñi ĉjissiĉha. Jalla nuž cjen Faraón ĉawc jiliriĉi Josižtan cuntintutaĉha. Nekztanaqui Faraonqui José utĉiĉha, Egipto wajtĉiz žoñinaca mantiñijapa, niżaza Faraonž kjuyĉiz žoñinaca mantiñijapa.

11 'Wiruñ tsjii kjaž watquiztan tsjii mach'a žejlĉiĉha, anĉa sufrichiĉha tjapa Egipto yokquin kamñi žoñinacami, niżaza tjapa Canaán yokquin kamñi žoñinacami. Jalla nuž cjen uĉhum tuquita ejpnacaqui ana ĉhjulu lujlsmi nii timpunacac wachatĉha.

12 Pero Jacobqui tsjii quintu nonĉiĉha, Egipto yokquin trigo žejlĉi. Nuž nonžcu niĉ majchnaca ĉuchanĉiĉha. Niiž majchnacaqui uĉhum tuquita ejpnacataĉha. Jalla niitaĉha primer ojktaqui Egipto yokquinaqui.

13 Nekztanaqui pizc wilta ojkžcu, Josequi niiz jil-anaczquiz pajkatchicha. Jalla niiztiquiztan Egipto chawc jiliriqiu Josiz familia pajchicha.

14 Jalla nekztanaqui Josequi mantichicha niiz ejp Jacobo zijcajo, nizaza tjapa familianacztanpacha. Ninacaqui pakallak tunca pjijskani zofitacha.

15 Jalla nekztanaqui Jacobqui kami ojkchicha Egipto yokquin. Nekzi ticzicha Jacobqui. Nii yokquin ticzizakazza uchum tuquita atchi ejpnacaqui.

16 Wiruñaquei nii atchi ejpnacz tsjijnaca chjichtatacha Siquem cjita yokquin. Nicju tjattatacha Abrahamz kjayta yokquin. Abrahamqui nii Siquem yoka paaztan kjaychicha Hamor cjita maatinaczquiztan.

17 "Tuquitan juramintuztan Yoozqui Abrahamzquiz taku tjaachicha, tuž cjican: "Am majchmaatinaczquiz tii yoka tjaacha". Nii tjaata taku cumplis ora zcatzinžcan Israel wajtchiz zofinacaqui waljaz miratcha Egipto yokquinaqui.

18 Nii oranaca Egipto yokquinaqui tsjii chawc jiliriqiu mantiz kallantichicha, ana José pajñi.

19 Nii jiliriqiu uchum wajtchiz zofñz quontra pinsichicha. Nekztan anawal quontra paachicha uchum tuquita atchi ejpnaczquiz. Nii jiliriqiu mantichicha, Israel lucmajch maatinaca majttan zawnc uchla, ticzi cjisjapa.

20 Jalla nii timpu Moisesqui majttatacha. Ancha c'achja wawatacha niiqui. Yoozqui nii wawžtan wali cuntintutacha. Niiz maa ejpqui chjep jiiz kjuyquiz mantiñchicha.

21 Ana iya nii wawa čhjoj čhjoji atžcu, kjuyquiztan chjitchičha. Nekztanaqui Egipto chawc jilirž persun majtqui nii Moisés wawa wajtchinča. Jalla nuž wajtžcu, persun maatižtakaz uywazzinča.

22 Jalla nižtiquiztan Moisesqui tjapa nii Egipto zoñinacž tjaajintanaca zizñi cjissičha. Nižaza zuma paatiquiztanami nižaza zuma chiitiquiztanami walja rispittatača Moisesqui.

23 Niiž pusi tunc watchiz cjican Moisesqui parti Israel zoñinacžquin tsjii tjonzñi ojkz pecchiča.

24 Jalla nuž tjonzñi ojkžcu cherchiča, tsjii Egipto zoñiqui tsjii Israel zoñi wjajtatča, jalla nii cherchiča. Nii Israel zoñžtan cjatžcu kijtchiča. Nekztan nii Egipto wjajtñi zoñžquiz ayni tjepuncan conchiča.

25 Nekztanaqui Moisesqui kuzquiz zizziča, Yoozqui nii utchiča, Israel zoñinaca Egipto zoñinacž mantuquiztan liwriizjapa, jalla nii. Nižaza Moisesqui pinsichiča, Israel zoñinacaqui nižtazakaz zizziča. Pero nii Israel zoñinacazti ana nižta naaziča, Moisesqui Yooz uchta liwriiñi, jalla nii.

26 Jaka tažuqui Moisesqui tsjii pucultan Israel zoñinacžtan ch'aasñi zalchiča. Jalla nuž zalžcu, pertunaskats pecchiča, tuž cjican: “Jilanaca, pucultan ančhucqui Israel zoñinacčhucča. ¿Kjažtiquiztan ančhucpora ch'aasjo?”

27 Nekztanaqui ana wal uj paañi zoñiqui Moisés tewkziča, tuž cjican: “¿Ject am jiliri utchejo, wejrnac mantiñijapajo?”

28 Zezcu Egipto zoñi conchamča. ¿Jazic wejrzam conz pecjo?”

29 Jalla nii nonžcu Moisesqui atipassiča Madián yokquin. Jalla nicju kamchiča nacjuńta žońi cjenaqui. Nicju tjunatan zalzcu, pucultan ocjalchiz cjissiča, nii yokquin kaman.

30 'Pusi tunc watquiztan nekztan tsjii ch'ekti yokquintača Moisesqui, Sinaí cjita cur žcati. Jalla nekz želan, tsjii anjilaqui niižquin jeczquichiča, tsjii kalu ujžtan taaztažtakaz, nii taypiquiz.

31 Jalla nii cheržcu, Moisesqui ispantichiča. Jalla nii uj cheri macjatcan, nonziča Yooz Jilirž jora. Nii joraqui tuž cjichiča:

32 "Wejrqui am tuqita atchi ejpnacž Yooztča. Abrahamž Yooztča, nižaza Isaacž Yooztča, nižaza Jacobž Yooztča". Nekztanaqui Moisesqui tsucchi kjarcati kallantichiča. Iya ana cheržńi atchiča.

33 Nekztanaqui Yooz Jiliri qui cjichiča: "Am čhjata chjojknazna. Tii amiž tecžta yokaqui wejt yokača.

34 Wejrqui weriž illzta žońinacaz sufrińi cherchinča nii Egipto yokquin kamńi. Nižaza ninacaz llaquizan ninaca kjawńi nonzinča. Jalla nižtiquiztan ninaca liwrii chjijwžquichinča. Picha, ninaca liwriizjapa am cuchnača Egipto yokquin".

35 "Tuqui Israel wajtchiz žońinacaku Moisesquiz ana rispitchiča. Niižquiz cjichiča: "¿Ject am jiliri utchejo, wejrnaca mantińijapajo?" Jalla nuž cjenami Yoozqui nii Moisespacha jiliri utchiča, Israel žońinaca liwriyajo. Israel žońinaca liwriizjapa, nii taazta kalquiz jeczquichi anjilaqui Moisesquiz yanapaquiča.

³⁶ Jalla nekztanaqui Moisesqui učum tuquita atchi ejpnaca jwessiča nii Egipto yokquiztan. Ima nii yokquiztan ulanskatan milajrunacami Yooz siñalanacami paachiča, nižaza Ljoc cjita kot taypiqueiz tjakziča, jalla nuž milajru paachiča. Nekztan pusi tunc wata ch'ekti yokquin ojklaycan milajrunacami Yooz siñalanacami paachiča.

³⁷ Jalla tii Moiespacha Israel wajtchiz žoñinacžquiz cjichiča: “Yoozqui wejr cuchanžquichiča ančhuc liwriizjapa. Jalla nižta irata Yoozqui Israel žoñinacžquiztan yekja liwriiñi profeta cuchanžcaquiča. Jalla niž tjontan ančhucqui nižquiz caza”. Jalla nuž cjichiča Moisesqui.

³⁸ Nižaza Moisesqui Israel žoñinacžtan ch'ekti yokquin žejlchiča, Sinaí cjita cur latuquiz. Jalla nekz tsji anjilžtan parlichiča. Nižaza učum tuquita atchi ejpnacžquiz palt'ižinchiča. Jalla nižtiquiztan Yooz taku tanziča, tjurñi Yooz taku. Učumnacaltajapa nii tanziča. Nižaza učumnacaquiz nii taku tjaajinchiča.

³⁹ Učum tuquita ejpnacaqui Moisesquiz ana caz pecchiča. Ana pajz pecatča, Yooziž uchta jiliri, jalla nii. Egipto yokquinpanž quejps pecatča.

⁴⁰ Jalla nekztanaqui učum tuquita ejpnacaqui Aaronžquiz paljaychiča, tuž cjican: “Yooznaca paažinalla, wejtnaca tucquin chjichñijapa. Nii Moisesaqui wejrnaca ulanskatchiča Egipto yokquiztan. Pero anžiqui anal zizi atuča, čjulukat nižquiz watčhani. Cunamit curquiztan ana quejpžcačhani”.

⁴¹ Jalla nekztanaqui nii žoñinacaqui korquiztan

tsjii wac chul turu paakatchiĉha ninacĉtajapa, tsjii yooz cjisjapa. Nekztan nii paata yoozquiz wilana conchiĉha. Niĉaza ninacaĉ paata yoozquiztan ancha cuntintutaĉha.

⁴² Jalla niĉtiquiztan Yoozqui ninaca jaytichiĉha, ninacĉ persun kuzcamakaz kamajo. Jalla niĉtiquiztan persun kuzcama cĉicĉican arajpach tjuĉimi, ĉiizimi, warawaranacami sirwichiĉha. Jalla nii puntuquiztan Yooz taku chiiĉi profetanacaĉ cĉijrta liwruquiz tuĉ cĉijrtataĉha:

“Israel ŉoĉinaca, anĉhucqui pusi tunc wata ch'ekti yokquin kamcan, wilana conchinĉhucĉha.

¿Wejtquin sirwisjapa niĉta paachinĉhucjo?

⁴³ Anapanĉha. Antis Moloc cĉita ŉoĉiĉ paata yoozquin jawkchinĉhucĉha nii wilananaca. Niĉaza Renfán cĉita warawara yooztakaz cherchinĉhucĉha. Jalla nii warawar yoozquin rispitchinĉhucĉha wilana tjaacan. Niĉaza anĉhuc tuqui nii ŉoĉiĉ paata yooznaca chjitskatiĉhuctaĉha. Anĉhucpachaĉ niĉta yooznaca paachinĉhucqui, nekz sirwizjapa. Jalla niĉtiquiztan anĉhuc jwesaĉha anĉhuc kamz yokquiztan. Jalla nuĉ jwescu Babilonia cĉita yokquiztan nawjctuĉtan chjichaĉha”.

Jalla nuĉ Yooz tawk liwruquiz cĉijrtataĉha.

⁴⁴ 'Ch'ekti yokquin ojklaycan uĉhum tuquita ejpnacaqui zkiz timpluchiztaĉha. Yoozqui Moisesquiz nii timplu plano tjeeziĉha. Nekztanaqui Yooz mantita plan jaru, nii timpluqui paatataĉha. Nekziqui Yoozqui sirwitataĉha.

⁴⁵ Nii zkiz timplu uĉhum tuquita ejpnacaqui tanziĉha irinsaĉtakaz. Josueĉ irpita, uĉhum tuquita ejpnacaqui nii timplu chjitchiĉha, Canaán

yokquin luzcan. Nekz žejlñi žoñinacžquiztan nii yoka tanzicha. Yooz pacha nii žoñinaca ch-jatkatchiĉha, uĉhum tuquita ejpnacžquiz tjaaz-japa. Nii yoka tanžcu jalla nekz kamĉiĉha Davidž kamtacama.

⁴⁶ David cjita jiliriqui Yooziž ancha okžtataĉha. Jalla nižtiquiztan Davidqui tsjii timplu kjuya kjuyz pecatĉha Yooz sirwizjapa. Niiž tuquita ejp Jacobqui nii Yooz sirwichizakazza.

⁴⁷ Pero ultimquiziqui Salomón cjita Davidž majch, niĉha Yooz timplu cjican kjuyĉiqui.

⁴⁸ Jalla nuž timplu kjuyta cjenami, werar Yoozqui anaž žoñiž kjuyta kjuyquiz želasaĉha. Jalla nuž cjichizakazza tsjii Yooz taku chiiñi profet žoñiqui. Yooz puntuquiztan jalla tuž cjiirĉiĉha nii profet žoñiqui:

⁴⁹ “Wejt mantis julzza arajpachaqui. Tii yokaqui wejt kjojcha jeejzkatzjapažtakazza. ¿ĉhjuluzĉ cheechi kjuya anĉhucqui wejttajapa kjuyasajo? Jalla nuž cjiĉha Yooz Jiliriqui. ¿Jakziquint wejt jeejz yoka žejljo?

⁵⁰ Wejrtĉha tjappacha paachintqui”.

Jalla nuž Yooz puntuquiztan cjiirtataĉha.

⁵¹ Nižaza Estebanqui tira ĉiichiĉha, tuž cjican:
—Anĉhucqui ancha chojru kuzzizĉhucpanĉha, ana Yoozquin kuzzizĉhucĉha. Cjuñchizĉhucĉha pero ana Yooz taku nonzinĉhucĉha. Nižaza anĉhucqui Yooz Espiritu Santužquiz anapan caziñhucĉha. Tuquita ejpž nižtazakazza anĉhucqui.

⁵² Anĉhuca tuquita ejpnacaqui Yooz taku chiiñi profetanacžquiz ana rispitchipanĉha. Antis sufriskatchipanĉha. Nii profetanacaqui tsjii

tsjan zuma žoñiž tjonz mazinchiča. Ančuca tuquita ejpnacazti ninaca conchiča. Jaziqui nii zuma žoñiqui tjonchiča. Ančuczti nii žoñi preso tankatchinčucča, y nižaza conkatchinčucča.

⁵³ Anjilanacaqui ančucaquiz Yooz lii tjaachiča. Jalla nii tjaata lii ana cazziñčucča. —Jalla nuž Estebanqui paljaychiča.

ESTEBAN CONTA

⁵⁴ Estebanž chiita taku nonžcu, ancha žawjchiča. Nižaza Estebanž quintra izke jojchiča, ninacaz žawjchi tjeezjapa.

⁵⁵ Estebanzti Espíritu Santuž irpitapankaztača. Nekztanaqui Estebanqui arajpach kjutñi cherziča. Nekztan Yoozquiztan walja c'ajžquiñi cherchiča. Nižaza Yooz Ejpž žew latuquiz Jesusa tsijtsi cherchizakazza.

⁵⁶ Nekztan Estebanqui cjichiča:

—¡Arajpach kjutñi cheržna! Arajpacha cjetzil cheruča. Nižaza Yooz Ejpž žew latuquiz tsijtsi žejlča Jesusa Yooz Maatiqiu.

⁵⁷ Ninacazti ana nonžni yujcchiča. Cjuñi chawcziča. Nižaza altu joržtan kjawcan apura zalchiča tanzjapa.

⁵⁸ Jalla nuž tanžcu, wajtquiztan jwessiča. Nekztan wajtž tjiiquin, maztan čhajcchiča. Nii maz čhajcñi žoñinacaqui tsjii Saulo cjita tjowžquiz ninacž zquti cwižinajo ecchiča.

⁵⁹ Jalla nuž maztan čhajcan, Estebanqui Yoozquin mayizichiča, tuž cjican:

—Wejt Yooz Jesús Jiliri, wejt animu chjichalla.

⁶⁰ Jalla nekztanaqui Estebanqui quillziča. Altu joržtan kjawchiča, tuž cjican:

—Wejt Yooz Jiliri, tii žoñinaca tii ujquiztan pertu-
nalla amqui.

Jalla nuž kjawžcu, ticziča.

8

CRIICHI ZOÑINACA WICHANZI

¹ Nekztanaqui nii Saulo cjita tjowaqui Esteban conzjapaqui tjapa kuztača. Jalla nii noojpacha Yoozquin criichinacž quintra juc'anti juc'anti sufriskati kallantichiča Jerusalén wajtquiz. Jalla nižtiquiztanaqui tjapa criichi žoñinacaqui wichanziča tjapa Judea yokaran nižaza Samaria yokaran. Nii Jesusiž apostolonacazti ana wichanziča.

² Tsjii kjažultan Yoozquin zuma sirwiñinacaqui Estebanž curpu tjatziča. Nižaza ancha kaachiča nižquiztan.

³ Nekztan nii Saulo cjita žoñiqui criichinacž quintra ancha anawali paachiča. K'ala tjatanz pecchiča. Nižaza kjuyquiztan kjuya ojklay-
chiča luctaka cjiñi maataka cjiñi tanzjapa, nižaza carsilquiz chawjckatsjapa.

SAMARIA WAJTQUIN YOOZ TAKU PALJAYTA

⁴ Jakziquin nii wichanzi criichinacaqui ojektčhaja, jalla nicju liwriiñi Yooz taku paljayñitača.

⁵ Tsjii wichanzi žoñiqui Felipe cjitatača. Jalla nii žoñiqui tsjii Samaria yokquiz žejlñi watja ojkičiča. Jalla nicju Cristuž puntuquiztan pal-
jayi kallantichizakazza.

⁶ Jalla nuž paljayan žoñinacaqui walja ajcziča. Tjapa nii žoñinacaqui Felipiž paljayta taku tjapa

kuztan nonznatča. Nižaza Felipiž paata milajrunaca cheržcu, niž chiita taku tjapa kuztan catokchiča.

⁷ Walja zajraž tanta žoñinacaqui čhjetintatača. Nii laa žoñinaczquiztan zajraqui kjawcan ulanchiča. Nižaza walja zuch žoñimi cojumi čhjetintazakaztača.

⁸ Jalla nižtiquiztan tjapa nii wajtchiz žoñinacaqui cuntintutača.

⁹ Jalla nii wajtquiz tsjii Simón cjita wayt'ir žoñi želatča. Tuquitanpacha wayt'iri ojklayñi žoñitača, nii Samaria wajtchiz žoñinaca incallcan.

—Wejrtča chekan žoñtqui —cjican ojklayñitača.

¹⁰ Jalla niž taku walja nonz pecñitača. Nižaza kolta cjiñimi pakji cjiñimi tuž cjiñitača:

—Tii žoñiča walja Yooz aztanaqui. Yooztakazza tiiqui. —Nuž cjican cjiñitača.

¹¹ Ažk watanaca nii wayt'ir žoñiqui žoñinaca incallžcu, walja cazkatñitača.

¹² Jalla nekztanaqui Felipiqui tjonchiča Yooz taku paljayi. Yooz Epiž mantiz puntuquiztan nižaza Jesucristuž puntuquiztan jalla nuž paljayičiča. Jalla nuž paljaytiquiztan walja luctaka cjiñi maataka cjiñi tjapa kuztan criičiča Yooz Ejpžquin. Nekztan criitiquiztan bautistatača.

¹³ Nižaza Simonpachača criičiqui, nižaza bautistatača. Jalla nekztanaqui Felipžquiz cumpanti kallantichiča. Felipiž milajrunaca paan, walja ispantichiča nii Simonaqui.

¹⁴ Nekztanaqui Jerusalenquin žejlñi apostolonacaqui quintu nonchiča, Samaria wajtchiz žoñinaca Yooz taku catokchiča, jalla

nii. Jalla nuž nonžcu nicju tsjii pucultan cuchanžquichiča, Pedružtan Juanžtan.

¹⁵ Jalla nuž irantižcuqui, nii pucultanaqui Samaria wajtchiz criichinacžtajapa Yoozquin mayizichiča, Espíritu Santu tanznajo.

¹⁶ Tuquiqui anaž jakziltižquizimi Espíritu Santuqui luztkalča. Jesucristuž tjuužtan alajakaz bautistatakalča.

¹⁷ Jalla nekztanaqui Pedružtan Juanžtan ninacž juntun kjaržtan lanziča. Jalla nižtiquiztan Espíritu Santuqui ninacžquiz luzziča.

¹⁸ Jalla nuž kjaržtan lanztiquiztan Espíritu Santuž luzni cheržcu, Simonaqui paaz tirziča,

¹⁹ tuž cjan:

—Wejtquin zakaz nii am azi tjaalla. Jalla nekztanaqui wejrzakaz kjaržtan lanžcu žoñinacžquiz Espíritu Santo luzkatača.

²⁰ Jalla nekztanaqui Pedruqui Simonžquiz cjichiča:

—Am paazmi amtanpacha k'ala katžla. Yooz onanta Espíritu Santo anaž kjayasača paaztan. ¿Kjažtiquiztan nižta am pinsejo?

²¹ Amqui tii langzquiz anaž mitisiz waquiziča. Tii Yooztajapa langzquiz anaž amta cjesača. Yooz yujcquiziqui am kuzqui anača zuma.

²² Jalla nii am anawali pinsisnaca jayta, nižaza apatata. “Wejrqui anawali pinsichinpanča” cjan Yoozquin rocaza, am kuz pinsitanaca pertunta cjisjapa. Nekztan cunami pertunta cjis atčhani.

²³ Amqui ana zuma kuzzizamča. Anawali pinsiskaz am kuzquiz tjonča. Wejrqui am anawali int'iskatča.

24 Jalla nekztanaqui Simonaqui kjaaziča, tuž cjican:

—Wejttajapa Yooz Jiliržquin mayiziñalla, ana čjulumi tii amiž chiita takunacquiztan wejtquiz watajo.

25 Nekztanaqui nii apóstol žoñinacaqui Jesu-cristo Jilirž puntuquiztan zuma chiichiča, nižaza Yooz taku zuma parličiča. Jalla nekztanaqui Samaria yokquiz wacchi kolta watjaran liwriiñi Yooz taku paljayñi ojklayčiča. Jalla nuž ojk-layžcu quejpčiča Jerusalén watja.

FELIPZTAN ETIOPIA WAJTCHIZ ŽOŇŽTAN

26 Niiž wiruñ tsjii Yooz anjilaqui Felipžquiz cjichiča:

—Zaažna. Jerusalén wajtquiztan warchuc oka, Gaza ojkñi jiczquin.

Ch'ekti yoka nuž watča nii jiczqui.

27 Nekztanaqui Felipiqui žaažcu, ojkčiča. Nii jiczquiz ojkcan tsjii Etiopía wajtchiz žoñžtan zalčiča. Nii žoñiqui eunucutača. Nižaza jilirž cusasanaca cwitiñi žoñitača. Candace cjita žonqui tsjan chawc jiliritača Etiopía wajtquin. Jalla naa chawc jilirž mantuquiztača nii cusasanaca cwitiñi žoñiqui. Nii žoñiqui Jerusalén watja ojkchitača werar Yooz rispitsjapa.

28 Jaziqui persun watja quepi ojkčiča. Niiž persun cawall autuquiz julzi želatča, Isaiás cji-rta Yooz taku liican. Isaiastača tuquita Yooz taku chiiñi profetaqui.

29 Jalla nekztanaqui Espíritu Santuqui Felipžquiz cjichiča:

—Nii cawall autuquiz macjata.

30 Jalla nuž macjatžcu Felipiqui nonziča, nii žoñiqui Isaías cjiirta Yooz taku liñi, jalla nii. Jalla nuž nonžcu Felipiqui pewczyča, tuž cjan:

—¿Nii Yooz taku am intintiya?

31 Nii žoñiqui kjaaziča, tuž cjan:

—Anaž wejtquiz jec tjaajiñimi žejlča. ¿Jaknužt wejr intintasajo?

Nekztanaqui nii žoñiqui Felipe kjawziča, nii autu juntuñ yawzcajo, nižquiz julžinžcajo.

32 Jalla nii cjiirta Yooz taku tuž cjetča:

“Uuzažtakaz coni chjichtaž cjequiča.

Uuzaqui ch'ujukaz žejlpanča tsjii čhjipñi žoñžquiziqui, jalla nižta konz oraqui ch'ujuž cjequiča niiqui. Anaž chiyaučiča.

33 Zuma kamañchiz cjenami ombrawillta cjequiča. Ana čjul justiciami wataquiča. Niiž majchmaatquiztan, ¿jequit tii puntu watchinaca quint'izjapa želas? Tii muntuquiz niž kamz wira tuczinznaquiča”.

34 Jalla nii ližcu nii jiliriqui Felipžquiz pewczyča tuž cjan:

—¿Jecz puntuquiztan tii profetaž cjiirta chiijo? ¿Niiž persun puntuquiztankaya? už ¿yekja žoñž puntuquiztan, jaa?

35 Jalla nekztanaqui Felipiqui nii liita Yooz taku puntuquiztan tjaajñi kallantichiča. Jesucristuž puntuquiztan niiqui chiyatča. Jalla nii zuma liwriiñi taku tjaajziča.

36 Jalla nekztanaqui tsjii wijiña macjatcan, nii jiliriqui cjichiča:

—Tekz kjaz žejlča. ¿Anaj tii kjazquiz bautista cjesaya?

³⁷ Felipiqui kjaaziĉha, tuž cjican:

—Am persun tjapa kuztan criyaquiž niiqui, bautistam cjesaĉha.

Nii jiliriqui kjaaziĉha tuž cjican:

—Jesucristuqui Yooz Majchĉha, jalla nii tjapa kuztan criyuĉha.

FELIPIQUI YOOZ TAKU KJANZT'ICHICHA

³⁸ Jalla nekztanaqui nii cawall autu tsijskatchiĉha. Nekztanaqui pucultan chjijwžquichiĉha kjaz kjutņi. Nekztanaqui Felipiqui nii jiliri bautissiĉha.

³⁹ Kjazquiztan ulnan, Yooz Espiritu Santuqui Felipe chjitchiĉha. Felipiqui ana iya tjenchiĉha nii jiliržquiz. Jalla nuž cjenami nii jiliriqui tira ojkcĉiĉha cuntintu.

⁴⁰ Felipizti Azoto cjita wajtquin chjichtataĉha. Nižaza wajtquiztan watja ojklaycan, liwriiņi Yooz taku paljayņi ojkcĉiĉha, Cesarea cjita watja iran-tiscama.

9

SAULO JESUCRISTUZTAN ZALCHICHA

¹ Jalla nuž Felipe ojklayanaqui Sauluqui Yoozquin criichi žoņinaca tanzjapa nižaza conzjapa tirapan kuz tjaatĉha. Anapanž jaytiz pecatĉha. Nekztanaqui timplu chawc jiliri cherzņi ojkcĉiĉha.

² Nii chawc jiliržquiztan ortina maychiĉha. Damasco cjita watja ojcz pecatĉha. Jalla nicju ajcz kjuyaran ojklayz pecatĉha, Yooz jiczquiz luzņi žoņinaca kjurzjapa, criichi luctaka cjiņi maataka cjiņi kjurzjapa. Nii criichinaca wajtžcu preso tanz

pecatĉha, Jerusalenquin chjitzjapa. Jalla niĉta ojklayzjapa ortina maychiĉha.

³ Ortina jwescu, ojkchiĉha Damasco cjita wajt kjutĉni. Damasco Źcatilla cjen, tiripintit tsjii wali pajk kjanaqui muzpa kjanŹquichiĉha niĉŹ muytata.

⁴ Sauluqui yokquiz tjojtsiĉha. Jalla nuŹ tjojtzcu tsjii jora nonziĉha, tuŹ cjiĉni:

—Saulo, Saulo, ŹkjaŹtiquiztan am wejt quintramjo?

⁵ Nekztanaqui Sauluqui pewcziĉha, tuŹ cjican:

—Wejt Jiliri, Źject amya?

Nii tsewctan chiiĉni joraqui kjaaziĉha, tuŹ cjican:

—Wejrtĉha Jesusitqui. Amqui wejt quintram paaĉha. NuŹ paacan, ampacham quintra paaĉha. Tsjii wacaqui ar parŹ quintra llawkŹcu, persun janĉiŹ quintraŹ paaĉha. Jalla niĉta irata am persun quintram paaĉha.

⁶ Nekztanaqui Sauluqui tsucŹcu cjatinzka tjonziĉha niĉŹ curpuqui. Nekztanaqui cjichiĉha:

—Wejt Jiliri, Źĉhjulu wejr paajum cjee amya?

Yooz Jiliriqui cjichiĉha:

—ZaaŹna. Watja luzna. Jalla nicju amquiz kjana chiita cjequiĉha ĉhjulut paasalaja, jalla nii.

⁷ SauluŹtan chicapacha ojklayĉni Źoĉinacaqui anĉa tsucchiĉha. Ninacaqui nonzizakazza nii jora chiiŹquiĉni. Pero ana cherĉiĉha jecmi.

⁸ Jalla nekztanaqui Sauluqui Źaaziĉha yokquiztan. Jalla nuŹ ŹaaŹcu ĉhjujuiqui cjetziĉha, pero ana wira cheri atĉiĉha. Jalla niŹtiquiztan SauluŹ kjarcu tanŹcu Damasco watja chjitchiĉha niĉŹtan ĉica ojklayĉni Źoĉinacaqui.

⁹ Jalla nii wajtquin čhjep maj ana cherñi žejlchiča. Nižaza ana čhjeri lujlñi anaza kjaz licñi žejlchiča.

¹⁰ Jalla Damasco wajtquin tsjii Ananías cjita Yoozquin criichi žoñi želatča. Nii Ananiasquiz Yooz JiliriQUI jecžquichiča wiiQUIN, tuž cjican:

—¡Ananías!

Jalla niiqui kjaaziča, tuž cjican:

—Wejt Jiliri, tekziča wejrqui.

¹¹ NekztanaQUI Yooz JiliriQUI cjichiča:

—Zaažna. Sok'o cjita call kjutñi oka. Nekztan Judas kjuyquiz pewczna, tuž cjican: “¿Saulo, Tarso wajtchiz žoñi anaj žejlya?” Jalla nuž pewcznaQUIča. Nii SauluQUI Yoozquin mayizican želaQUIča.

¹² Tsjii wiiQUIN chjuužcan, tižta cherchiča SauluQUI. Tsjii Ananías cjita žoñiqui nižquiz luzziča. Jalla nuž luzcu kjaržtan niž juntuč lanziča wilta cherajo. Chjuužcan SauluQUI jalla nuž cherchiča.

¹³ Jalla nuž nonžcu, Ananías cjichiča:

—Wejt Jiliri, tii žoñžquiztan wacchi quintunaca nonchinča. Jerusalén wajtquiz juc'anti anawali paachiča amquin criichinacžquiz.

¹⁴ Anziqui tekzpacha tjonzizakazza. Timplu chawc jiliriž tjaata ortinchiz tjonchiča, tjapa amquin rispiti žoñinaca tanžcu preso chjitsjapa.

¹⁵ Pero Jesucristo JiliriQUI cjichiča:

—Oka amqui. Wejrqui tii žoñi illzinča, wejt puntuquiztan parlažo. Yekja nacionchiz žoñinacžquizimi nižaza ninacž jilirinacžquizimi nižaza Israel nacionchiz žoñinacžquizimi, jalla nuž wejt puntuquiztan parlaQUIča tiiqui.

16 Jalla niiqui wejt puntuquiztan parliñiž cjen ancha sufraquiča. Wejrqui nižquiz intintiskatača jalla niž sufris puntuquiztan.

17 Jalla nekztanaqui Ananiasqui ojkchiča jakz-iquin Saulo želatčhaja, jalla nicju. Saulužquin luzcu, kjaržtan niž juntuñ lanziča, tuž cjican:

—Saulo, jila, amiž jiczquiz tekz tjonan Jesusa Jiliriqui amtan zalchiča. Jalla nii Jesusa Jiliriqui wejtquin mantižquiča, am wilta cherkatajo, nižaza Espiritu Santuž am kuzquiz luzajo.

18 Nii orapacha Sauluž čhjujquiztan ch'iz cja-jpažtakaz tjojtsiča. Nekztan wilta cherñi cjis-iča. Nekztanaqui Sauluqui žaaziča, nižaza bautista cjisiča.

19 Jalla nekztanaqui čhjeri lujlžcu, wilta azi tanziča. Nekztan tsjii kjaž maj Damasco cjita wajtquin kamchiča Yoozquin criichinacžtan.

SAULUQUI JESUSIZ PUNTUQUIZTAN PALJAY-CHICHA

20 Jalla nuž kamcan Sauluqui ajcz kjuyanacquiz-iqui Jesusiž puntuquiztan paljayi kallantichiča tuž cjican:

—Jesusaqui werar Yooz Majchpanča.

21 Nii nonzñi žoñinacaqui ispantichiča, tuž cjican:

—Tii žoñiqui Jerusalén wajtquin ojklaychiča Jesucristužquin rispiti žoñinaca tani. Tekzizakaz tjonchiča Jesucristužquin criichinaca tanažlani. Nižaza preso chjichažlani, timplu jilirinacžquin intirjizjapa. Jalla nii žoñipanča, žana jaa?

22 Pero Sauluzti juc'anti tjup kuzziz Yooz taku parličiča. Juc'anti juc'anti atipni takunacžtan parličiča. Zuma kjana intintiskatchiča, Jesusa

Yooziž cuchanžquita Cristučha, jalla nii. Jalla nuž intintiskatan, nii Damasco wajtquin kamñi judionacami kuz inakaz turwaysi quirchiča.

SAULUQUI ATIPCHICHA

²³ Tsjii kjaž majquiztan nii žejlñi judío žoñinacaqui palt'ichiča Saulo conzjapa.

²⁴ Nii žoñinacaž conz palt'ita zizziča Sauluqui. Majiñami weenami wajtž zana tjewsnatča, čhjulatorat wajtquiztan ulnačhaja, jalla nii ora Saulo conzjapa.

²⁵ Pero tsjii ween nii wajtchiz criichinacaqui tsjii pajk canastiquiz yaažcu, Saulo chjijunžquichiča. Tsjii pajk alto murallaž muyuntitatača nii watjaqui. Jalla niiuntuñ chjijunchiča zawncchuc. Jalla nuž atipassiča Sauluqui.

SAULUQUI JERUSALENQUIN QUEJPCHICHA

²⁶ Sauluqui Jerusalén watja quejpžcu Yoozquin criichi žoñinacžtan ajcz pecatča. Nii criichinacazti Saulužtan ajcz eksiča. “Ana ultimu Yoozquin criichižcaa” cjican kuzquiz pinsichiča.

²⁷ Jalla nuž cjenami Bernabé cjita jilaqui Saulo chjitchiča, apostolonacžtan zalzjapa. Nekztanaqui Bernabequi apostolunacžquin mazziča, jaknužt Saulo jiczquiz ojkan Jesucristo Jiliržtan zaltčhaja, jalla nii. Nižaza jaknužt Jesucristo Jiliriqui Saulužquiz paljaychičhalaja, nii mazñi. Nižaza jaknužt Damascuquin Sauluqui Jesucristo puntuquiztan tjup kuzziz parličhaja, jalla nii mazzizakazza.

28 Nekztanaqui Sauluqui Jerusalén wajtquin ojklaychiča; nižaza hermanonacžtan kamchiča.

29 Jalla nuž žejlcan Sauluqui Jesucristuž puntuquiztan tjup kuzziz paljaychiča. Nižaza griego taku chiiñi judionacžtan ch'aascan parličiča. Nii žoñinacaqui Saulo conz pecatča.

30 Jalla nii quintu zizcu, nii parti criichinacaqui Saulo chjitchiča Cesarea cjita wajtquin. Jalla niwjctan Tarso cjita watja cuchanchiča.

31 Jalla nekztanaqui nii timpuqui walikaz želatča iclizanacami, Judea yokquin žejlñi iclizanacami, Galilea yokquin žejlñi iclizanacami, Samaria yokquin žejlñi iclizanacami. Jalla nuž tjappacha walipantača. Yoozquin criichinacami Yooz Jiliri walja tjapa kuzziz cjisnatča. Rispitñi kuzziztača. Nižaza Espíritu Santuqui ninaca kuzñitača, cuntintu kamajo. Jalla nižtiquiztan walja yapchiča Yoozquin criichinacaqui.

ENEAS CHJETINTA

32 Nižaza Pedruqui criichi žoñžquiztan žoñi tjontjonžcan ojklayatča. Nižaza Lida wajtchiz Yooz parti žoñinacžquiz tjonžni ojkchiča.

33 Jalla nicju Eneas cjita žoñžtan zalchiča. Eneasqui quinsakal wata laa zuchu želatča, tjajz ajpzquiz želatča.

34 Nekztanaqui Pedruqui niižquiz cjichiča:

—Eneas, Jesucristuqui am čhjetnaquiča. Zaažna. Am tjajz zquti zumpacha chjinžna.

Nii orapacha Eneasqui žaaziča.

35 Nekztanaqui nii Lida wajtquiz kamñi žoñinacami nižaza Sarón wajtquiz kamñi

žoñinacami nii zuch žoñi čhjetinta cherchiča. Nekztanaqui niž tuquita ejpnacž cuzturumpinaca eccu, Yooz Ejp Jiliržquin criichiča. Nižaza Yooz kamañchiz cjissiča.

DORCAS CJITI ZON JACATATSKATTA

³⁶ Jalla nii timpuzakaz Jope cjita wajtquin tsjaa Yoozquin criichi žon želatča, Tabita cjiti. Griego tawkquiz Dorcas cjiti tjuuchiztača. Naa maatak žon zuma paatanaca paacan zuma kamiñpantača, nižaza t'akjir žoñinaca okzniñtača.

³⁷ Jalla nii timpu Dorcas cjiti žonqui laa cjiscu, ticzinča. Ima tjatcan naaža curpu awjžcu, tsjii kjuyquiz tsewcta pisuquin chjichtatača.

³⁸ Jope watjaqui Lida žcatillatača. Jalla nii Lida wajtquin Pedruqui želatča. Jalla nuž zizcu nii Jope wajtchiz hermanonacaqui pucultan žoñinaca cuchanchiča Pedružquin rocajo, tuž cjican:

—Apuraj tjonla, ana enenžcu.

³⁹ Nekztanaqui Pedruqui tsijtscu ninacžtan ojkchiča. Jalla nicju irantižcu nekztan Pedruqui chjichtatača, Dorcas curpu majčža kjuyquin. Nii kjuyquin Pedružtan chica žejlcan žew maatakanacaqui kaatča. Nižaza ninacaqui Pedružquiz tjeeziča Dorcas paata zquitinaca, nii.

⁴⁰ Jalla nekztanaqui Pedruqui tjappacha nii parti žoñinaca ulanskatchiča. Ninacaž ulantiquiztan quillžcu Yoozquin mayizichiča. Naa ticzin žona curpu kjutñi cheržcu chiichiča, tuž cjican:

—Tabita, žaažna.

Jalla nižtiquiztanaqui naa ticzin žonqui čhjujcqui cjetzinča. Nekztanaqui Pedro cheržcu, julzinča.

⁴¹ Pedruqui naaža kjarcu tanziča, nekztan tsijskatchičha. Nuž tsijskatzcu Pedruqui parti jilanacami nižaza žew maatakanacami kjawziča. Nekztan Dorcas žejtchin tjeeziča.

⁴² Tjapa nii Jope wajtchiz žoñinacaqui nii quinto zizziča. Jalla nižtiquiztan walja Yoozquin cričičha.

⁴³ Pedruqui tsjii kjaž maj nii wajtquiz kamčičha, Simón cjita žoñž kjuyquiz. Nii Simonaqui zkizinaca koñz langzñitača.

10

PEDRUZTAN CORNELIUZTAN

¹ Cesarea wajtquiz tsjii Cornelio cjita žoñi želatča. Niiqui zultatž jiliritača, Italian cjita regimientoquiztan.

² Jalla nii jiliriqui niž familianacžtanpacha arajpach Yooz rispitiča. Nižaza Yoozquin mayiziča. Nižaza pori judío žoñinacžquiz walja paaztan yanapt'ičičha.

³ Tsjii noojiqui majñakak ora chjuužtažokaz tsjii Yooz anjila cherziča, kjanapacha. Nii anjilaqui nižquin tjonžquičičha tuž cjican:

—¡Cornelio!

⁴ Corneliuzti tsucchi anjilž kjutñi cherziča. Nekztan pewczyča:

—Wejt Jiliri, žchjulutaya? —cjican.

Nekztanaqui nii anjilaqui kjaaziča, tuž cjican:

—Amqui Yooz Ejpžquin mayizičamča. Nuž nayčičha Yooz Ejpqui. Nižaza am t'akjir

žoñinacžquiz yanaptanaca naychiča. Jalla nuž nayžcu, Yooz Ejpqui cuntintuča. Nižaza am cjuñža.

⁵ Jaziqui Jope wajtquin žoñinaca cuchanzca, Simona kjawzjapa. Nii Simonaqui Pedro cjitazakazza.

⁶ Pedruqui yekja Simonžtan alujtača. Nii yekja Simonaqui zkizi koñz langžñi žoñiča. Niiž kjuya pajk kot žcati žejlča. Nii Pedruž amquiz chiyauiča, čjulut am paas cječhaja, jalla nii. — Jalla nuž chiichiča nii anjilaqui.

⁷ Nii anjilaž ojektanaqui, Corneliuqui pucultan piyunanaca kjawziča. Nižaza atintiñi zultatunacžquiztan tsjii zuma cumpliñi zultatu kjawziča. Nii zultatuqui Yoozquin kuzzizzakaztača.

⁸ Nekztanaqui Corneliuqui nii kjawžta žoñinacžquiz tjapa quint'ichiča. Jalla nekztan Jope wajtquin cuchanchiča.

⁹ Niiž jaka tažuqui nii čhjepultan cuchanta žoñinaca Jope kjutñi ojkchiča. Jope watja žcatiž cjen, nii oraqui Pedruqui kjuy juntuñta patiuquin yawchiča Yoozquin mayizi. Nii oraqui taypuručača.

¹⁰ Jaziqui Pedruqui ancha čhjeri eeskatatča, lujlz pecatča. Jalla nuž čhjeri kisan, Pedruqui nii tsewcta patiuquin tsjii chjuužtažokaz cherziča.

¹¹ Jalla tuž cherziča: arajpacha cjetzi tsjii pajk mantilažtakaz chjijwžquichiča yokquin. Nii mantilaqui pajkpic punta žcuczintača.

¹² Jalla nii mantiliquiz tjapaman pajkpic kjojchanacchiz animalanacami, zkoranacami, wežlanacami želatča.

13 Nekztanaqui Pedruqui tsjii jora nonzičha, tuž cjican:

—Pedru, tsijtsna. Conžna. Lujlzna.

14 Pedruzti kjaazičha, tuž cjican:

—Wejt Jiliri, nižta anal paasačha. Nii punta animalanaca ana lulasačha. Lii quintračha. Jaziqui nižta anal lulasačha wejrqui.

15 Jalla nuž kjaaztiquiztanaqui nii joraqui wilta chiižquichičha, tuž cjican:

—Yoozqui amquiz chiichičha, “Zumačha niiqui, lujlzpapa” cjican. Jalla nii Yooziž chiita taku anam amqui nicasačha, “Ana zumačha lujlzpapa. Lii quintračha” cjicanaqui.

16 Jalla tižta čhjep wilta watchičha. Nekztanaqui nii mantilaqui arajpach kjutñi waytitačha.

17 Nekztanaqui Pedruž kuzquiz pinsichičha, tuž cjican: “Nii chjuužtakaz cherta ¿jaknužt cjii? ¿Čhjulut Yoozqui wejtquiz intintiskatž pec?” Nii orapacha Simonž kjuya pewcpewczičha Corneliuž cuchanžquita žoñinacaqui. Nekztanaqui Simonž kjuy zanquin irantichičha.

18 Irantižcu, nii žoñinacaqui altu joržtan pewczičha, tuž cjican:

—¿Simón anaj tekz alujya? Simonž tsjii tjuuqui Pedro cjitačha.

19 Pedruqui tirapanž pinsatčha nii chjuužta puntuquiztan. Jalla nuž pinsan, Espíritu Santuqui niž kuzquiz cjichičha:

—Cheržca, Pedro. Čhjepultan žoñinaca am kjurčha.

20 Tsijtsna. Chjijwžca. Ana paysnakcan ninacžtan oka. Wejrtča ninaca cuchanžquichintqui.

21 Jalla nekztanaqui Pedruqui chjijwžquichiča, nii Corneliuž cuchanžquita žoñinacžtan zali. Ninacžquiz cjichiča:

—Ančhucqui tsjii žoñi kjurča. Wejrtča nitqui. ¿Čhjulquin ančhucqui tjonchinčhuctay?

22 Nekztan ninacaqui kjaaziča, tuž cjican:

—Cornelio cjita zultatž jiliriž cuchanžquita tjonuča wejrnacqui. Niiqui walja rispitta žoñiča. Nižaza niiqui Yooz rispitiča. Tjapa judío žoñinacaqui niž zuma kamañ wira quint'iñiča. Tsjii Yooz anjilaqui nižquin mantichiča, tuž cjican: “Žoñinaca cuchna, Pedro cjitaqui tekz am kjuyquiz kjawzjapa. Pedruž chiita taku nonžna amqui”. Jalla nuž Corneliužquiz cjichiča nii Yooz anjilaqui.

23 Nekztanaqui Pedruqui kjuyquiz kjawziča atintita cjisjapa. Tsjii arama nekz tjajžinčiča. Jaka tažuqui Pedruqui ninacžtan ojkčiča. Nižaza tsjii kjaž Jope wajtchiz hermanonacaqui nižtan chica ojkčiča.

24 Niž kat tažu Cesarea watja irantichiča, Corneliuž kjuyquin. Jalla nicju Corneliuqui tjewznatča niž parintinacžtan, nižaza tsjii zuma mazinacžtan. Corneliuqui ninaca kjawziča, ninacazakaz Pedruž taku nonzjapa.

25 Pedruž kjuyquin luztan Corneliuqui nižtan zalčiča. Nekztan Pedruž yujcquiz quillziča, nii amzjapa.

26 Pedruzti tsijtskatchiča, tuž cjican:

—Tsijsna amqui. Wejrmi am irat žoñizakaztča. Anača Yooztakaztča.

²⁷ Jalla pucultan parlican, luzziča. Nii kjuyquin walja ajczi žoñinaca zalchiča.

²⁸ Pedruqui ninaczquiz cjichiča:

—Ančhucqui zizza. Tsjii judío žoñiqui yekja wajtchiz žoñžtan anaž mazi cjisnasača, anaž ninacztan ajcznasača. Nižaza yekja wajtchiz žoñž kjuyquin anaž tjonznasača. Jalla nuž judiož lii cjiča. Pero Yoozqui wejr intintiskatchičha. Anziqui čjul žoñimi Yooz partiquiz cjesača, nii. Jalla nižtiquiztan wejrqui anal chiiz waquizuča, “Nii žoñiqui ana Yooz partiquiz cjesača” cjicanaqui.

²⁹ Nekztan amiž kjawžtiquiztan wejrqui ana kjaž chiižcu tjonchinča; judionacz lii quindra cjenami ana nicchinča. Pero ziz pecučha, čkjažtiquiztan wejr kjawzinčhucta ančhucqui?

³⁰ Jalla nekztanaqui Corneliuqui kjaaziča tuž cjican:

—Ažk pajkpic tjuñi wattan tii majňakak ora wejrqui kjuyquiz želatuča, Yoozquin mayizican, nižaza ayunazcan. Jalla nuž želan, tsjii walja llijňi zquitichiz žoñiqui wejtquiz jeczquichiča.

³¹ Nižaza wejtquiz cjichiča: “Cornelio, Yoozqui am mayizita nonziča. Nižaza amiž t'akjir žoñinaczquiz okztanaca cjuňziča.

³² Jaziqui Jope wajtquin žoñinaca cuchna, Simona zijjcajo. Nižaza niž tsjii tjuuqui Pedro cjitača. Yekja Simonž kjuyquiz alujazi žejlpachača, pajk kot žcati. Nii yekja Simonaqui zkizi koňz langzňi žoñičha. Nii Pedruqui tjonžcu, amtanž parlaquiča”. Jalla nuž wejtquiz chiichiča nii anjilaqui.

³³ Jalla nuž nii chiita tawk jaru, apura cuchanchinča am kjuri. Walim tjonchamča. Jaziqui tekzi tjappacha wejrnacqui Yooz Ejpž yujcquiz žejlča. Jaknužt Yoozqui wejrnacalta amquiz cjitčhaja, jalla nii tjappacha nonz pecasuča wejrnacqui.

PEDRUZ PALJAYTA TAKUNACA

³⁴ Jalla nekztanaqui Pedruqui paljayi kallantichiča, tuž cjan:

–Jaziqui intintazuča. Ultim weraraž, Yoozqui tii muntuquiz žejlñi žoñinaca anaž yekja yekja illilla.

³⁵ Yoozquin rispitznaquiž niiqui, nižaza Yooz kuzcama kamaquiž niiqui, Yoozqui jakzilta čhjul wajtchiz žoñžquizimi asiptasača. Anziqui jalla nuž intintazuča.

³⁶ Yooz Ejpqui Israel žoñinacžquiz amigo pajassiča. Nekztan niž zuma kamañ puntu zizkatchiča. Jesucristuž cjen zuma cuntintu kuzziz cjisni atasacha, jalla nii. Jesucristuča čhjulquiztanami chekan Jiliriqi, wali azziz.

³⁷ Ančhucqui zumapanž zizza, jaknužt judío yokquiz watčhaja, jalla nii. Primero Juanqui Yooz taku mazmazziča. Nižaza žoñinaca bautissiča. Nekztanaqui Jesucristuqui niž persun Galilea yokquiz obranaca tjeežni kallantichiča.

³⁸ Jesusaqui Nazaret wajtchiz žoñitača. Yooz Ejpqui nižquiz walja Espíritu Santuž azi tjaachiča. Jalla nižtiquiztan ojklaychiča, walinaca paacan, nižaza zajraž tanta žoñinaca liwriican. Jalla nuž paachiča, Yooz Ejpžtan nižtan chicapachaž nuž cjen.

³⁹ Tjapa Jesusaž ojklaytanacami paatanacami cheržcu, jalla nii maznasača wejrnacqui,

Judea yokaran ojklaytanacami, nižaza Jerusalén watjaran ojklaytanacami. Wiruññaqi Jesusaqui cruzquiz ch'awctiquiztan conta ticziča.

⁴⁰ Jalla nuž contiquiztan čhjep majquiztan Yooz Ejpqi Jesusa jacatatskatchiča. Jacatatskatžcu Yoozqui wejtnacaquiz parizizkatchiča.

⁴¹ Jesusaqui parti žoñinacžquiziqui ana parizichiča. Antiz wejtnacaquiz alaja parizichiča. Nižaza jecnacat Yooz Ejp illztčhaja, jalla ninacžquiz parizichiča Jesusaqui. Nižaza wejrnacmi Jesusaž jacatattiquiztan nižtan juntu lulassinča, nižaza kjazmi juntu licassinča.

⁴² Nekztanaqui Yooz Ejpqi tii Jesusapacha wali Juez Jiliržquin utchiča. Juez cjen nii Jesús chawc Jiliriqui žejtñi žoñimi ticzi žoñimi juzjizaquiča. Jalla nii mazmazñijapa wejrnac cuchanžquichiča Jesusaqui.

⁴³ Nižaza tuquitanpacha Yooz taku parliñinacaqui Jesusiž puntuquiztan parlichipanča, tuž cjican: “Jakziltat nii Jesusižquiz tjapa kuztan criyačhaj niiqui ujnacquiztan pertuntaž cjequiča”.

ESPIRITU SANTUZ LUZTA

⁴⁴ Jalla nuž Pedruž chiyan, Espíritu Santuqui tjapa niž chiita taku nonzñi žoñinacžquiz luzziča.

⁴⁵ Jalla nuž cjen nii Pedružtan tjonchi judío žoñinacaqui ispantichi quirchiča, Espíritu Santuqui tjaatazakaztača ana judío žoñinacžquiziqui.

⁴⁶ Espíritu Santo tanžcu, nii žoñinacaqui yekja ana pajta taku chiichiyatča. Nižaza Yoozquin

waljaž alawatča. Jalla nižtiquiztan ispantichi cjissiča nii žejlñi judionacaqui.

⁴⁷ Nekztanaqui Pedruqui cjichiča:

—Wejtnacaquiz Espíritu Santo tjaatača. Nižaza tinacžquiz Espíritu Santo tjaatazakazza. Jaziqui tinaca bautista cjisjapa, ¿jec žoñit atajas?

⁴⁸ Jalla nekztanaqui Pedruqui mantichiča, Jesucristuž tjuuquiz tinaca bautista cjejajo. Nekztanaqui nii žoñinacaqui Pedružquiz rocchiča tsjii kjaž maj ninacžquiz kamt'ajo.

11

PEDRUZ JUDIO ŽOÑINACŽQUIZ MAZTA

¹ Nii Judea yokaran žejlñi illzta apostolonacami, jilanacami, jalla ninacaqui quintu nonchiča, yekja wajtchiz žoñinacaqui Yooz taku catokchiča, jalla nii.

² Pedruqui Jerusalén watja quejppžquichiča. Jalla nuž quejptan parti judío criichinacaqui Pedruž quintra chuchchiča,

³ tuž cjican:

—¿Kjažtiquiztan učum lii quintra amqui yekja wajtchiz žoñinacžquin tjonžni ojkchamtajo? ¿Kjažtiquiztan učum lii quintra ninacžtan lujlchamtajo?

⁴ Nekztanaqui Pedruqui nii parti judionacžquiz quint'ichiča, jaknužt watčhaja primerquiztan-pacha Corneliuž puntu, jalla nii. Tuž cjican, quint'ichiča:

⁵ —Wejrqui Jope wajtquin želatuča. Yoozquin mayizican, tsjii chjuužtažoka cherchinča, jalla tižta. Tsjii pajk mantilažtakaz tsewctan

chjijwžquichiča. Niiž pajkpic puntuquiztan žcucžintatača. Jakziquiztažlaj wejrqui, jalla nekz wejr tirichuc irantižquichiča.

⁶ Jalla nuž irantižquitanaqui zumpacha cherzinča, čhjulut nii kjuyltan žejl, cjican. Jalla nuž wejrqui cherchinča tjapaman pajkpic kjojchchiz animalanaca, k'it animalanacami, zkoranacami, wežlanacami, jalla nuž cherchinča.

⁷ Nii orazakaz tsewctan tsjii žoňž joražtakaz nonzinča. Wejtquin chiižquichiča tuž cjican: “Pedro, tsijtsna. Conžna. Nižaza lujlzna”.

⁸ Wejrzti kjaazinča, tuž cjican: “Wejt Jiliri, nižta anal paasača. Nii punta animala ana luli atasacha, am lii quintrača. Jaziqui nižta anal paasača wejrqui”.

⁹ Jalla nuž kjaaztiquiztanaqui nii joraqui wiltazakaz chiižquichiča, tuž cjican: “Yoozqui chiichiča, ‘Zumaž tiiqui lujlžjapa’ cjican. Nii Yooz zuma cjitaqui ana amqui ‘Ana lulasaž’ cjeella. Yooziž chiita taku anam nicz waquiziča, ‘Ana lulasaž. Lii quintrača’ cjicanaqui”.

¹⁰ Jalla nuž čhjep wilta watchiča, nekztanaqui nii mantilaqui waytitatača tsewcchucpacha.

¹¹ Nekztanaqui čhjepultan žoňinacaqui weriž alujta kjuyquiz irantižquichiča. Cesarea wajtquiztan cuchantatača wejr kjuri.

¹² Nižaza Espíritu Santuqui wejr mantichiča ninacžtan ana paysnakcan okajo. Nižaza sojtaltan jilanacaqui wejttan chica ojkchiča. Jalla nicju irantižcu, tjappacha wejrnacqui tsjii žoňž kjuyquiz luzazzinča.

¹³ Nižaza nii kjuychiz žoňiqui wejtnacaquiz quint'ichiča, jaknužt niiž kjuyquiz tsjii anjila

chertčhaja, jalla nii. Nii anjila tsijtsi cherchiquičha. Nižaza nii anjilaqui nižquiz tuž cjičiquičha: “Jope wajtquin žoñinaca cuchanžca, Simona kjawznajo. Niiž tsjii tjuuqui Pedro cji-tača.

¹⁴ Jalla niiqui amquiz chiyaquiča, jaknužt ammi nižaza tjapa am familianacami liwriita cječhaja, jalla nuž”.

¹⁵ Nekztanaqui wejrqui ninacžquiz parli kallantitan, Espíritu Santuqui ninacžquiz luzziča, jaknužt tuquiqui učumnacaquiz lutzčhaja, jalla nuž.

¹⁶ Jalla nekztanaqui wejrqui Jesusaž niž tuqui chiita taku cjuñzinča. Jesucristo Jiliriqui cjičičha, “Juanqui kjaztan bautisñipantača. Ančhucqui antis Espíritu Santužtan bautistaž cjequiča”.

¹⁷ Jesucristo Jiliržquiz criichiž cjen Yoozqui učumnacaquiz Espíritu Santo tjaachiča. Nižta iratapacha Yoozqui ninacžquiz Espíritu Santo tjaachiča. Jaziqui wejrqui anal Yooz quintra cjesača. —Nuž quint'ichiča Pedruqui.

¹⁸ Jalla nii quintu nonztiquiztan nii Jerusalén wajtchiz criichinacaqui ana iya chutchičha. Nužquiz ch'ujquichiča. Yoozquin alawazziča, tuž cjan:

—Nižazakaz yekja wajtchiz žoñinacaqui persun ujnaca pajžcu, nižaza persun kuznaca campiižcu, jalla nekztan ninacaqui persun ujnacquiztan pertuntazakaz cjequiča. Nižaza wiñaya Yooztan kamaquiča.

CRIICHI ŽOÑINACA WICHANZI

¹⁹ Esteban conžcuqui, yekja Yoozquin criichinaca zakaz walja tanzquin cjissičha. Jalla nuž cjen criichinacaqui yekja watjanacquin atipassičha. Fenicia, Chipre, Antioquía, jalla nii yokanac kjutñi wichanzičha. Jalla nicju liwriiñi Yooz takunaca parličičha. Judío žoñinacžquiz alaja parličičha, ana yekja žoñinacžquiziqui.

²⁰ Yekjapa criichi jilanacaqui Chipre yokquiztan nižaza Cirene yokquiztan ojkčičha. Nekztanaqui nii yokanacquiztan Antioquía watja iran-tičičha. Nekztan Antioquía wajtquin yekjapa criichinacaqui ana judío žoñinacžquiz parličizakazza Liwriiñi Jesucristo Jilirž puntu takunacquiztan.

²¹ Jesucristo Jilirž aziqúi ninacžquiztačha. Nižaza nii parlitiquiztanaqui walja žoñinacaqui tuquta cuzturumpinaca jaytižcu, Jesucristo Jiliržquin tjapa kuztan criičičha.

²² Nekztanaqui Jerusalén iclizziz criichinacaqui nii quintu nončičha. Jalla nii quintu nonžcu, Bernabé cjita žoñi cuchanchičha Antioquía watja.

²³ Jalla nicju irantižcu, Bernabequi cherčičha, jaknužt Yoozqui nezk žejlñi criichinacžquiz okztčhaja, jalla nii. Nii criichinacaqui walja cuntintutačha. Jaziqui Bernabequi tjappachquiz chiižinčičha, tuž cjan:

—Yoozquin criichinaca, zuma tjapa kuztan Yooz jicžquiz kamaquičha.

²⁴ Nižaza Bernabequi wali zuma žoñitačha. Niiqúi Espíritu Santužtan tsjii kuzziztačha. Nižaza Yoozquin tjapa kuzziztačha. Jalla nuž zuma kamcan walja žoñinaca Yoozquin macjatskatžquičičha Bernabequi.

²⁵ Jalla nekztanaqui Bernabequi Tarso watja ojkchiĉha Saulo kjuri. Saulo wajtžcu Antioquía chjitchiĉha.

²⁶ Jalla nicju tsjii wata intiru criichinacžtan žejlchiĉha. Tama žoñinacžquiz Yooz taku tjaa-jinchiĉha. Antioquía wajtquiziqui criichinacaqui cristiano tjuuchiz cjissiĉha. Tuquiqui nižta tjuuchiz ana želatĉha.

²⁷ Jalla nii timpuqui tsjii kjažultan Yooz taku parliñi žoñinacaqui Jerusalén wajtquiztan Antioquía ojkchiĉha.

²⁸ Tsjiiqui Agabo cjitataĉha. Niiqui nii ajczñi criichinacž taypiquiz tsijtsiĉha. Tsijtsan Yooz Espíritu Santuqui nii Agabo chiikatchiĉha, tuž cji-can:

—Tjapa tii yokquiz wali ĉhjer mach'a želaquiĉha.

Jalla tižta watchiĉha, Claudio cjita chawc jiliriz mantiz timpuqui.

²⁹ Jalla nižtiquiztan nii Antioquía wajtchiz criichinacaqui acuerdo luzziĉha Judea wajtchiz jilanacžquin tsjii yanapñi cuchanzjapa. Zapa mayniqui jaknužt onanchucažlaja jalla nuž onanchiĉha, nii Judea wajtchiz criichi jilanacžquin yanapzjapa.

³⁰ Nižaza nii onantanaca apaychiĉha Judea wajtchiz icliz jilirinacžquin. Bernabežtan Saulužtan nii apayanacaqui chjitchiĉha.

12

JACOBO CJITA APOSTOL CONTACHA

¹ Jalla nii timpu Herodes cjita chawc jiliriqui yekjap Yoozquin criichi žoñinaca tanchiĉha.

² Nižaza Herodesqui Jacobo conkatchičha pajk cuchillžtan. Jacobqui Juanž jilatačha.

³ Jalla nuž contiquiztanaqui judío žoñinacaqui muzpa chipchipčičha. Jalla nuž nayžcu Herodesqui Pedro preso tanchizakazza. Jalla nii oraqui ana liwaturchiz t'anta lujlz pjijstatačha.

⁴ Pedro preso tantiquiztan, carsilquiz chawctatačha. Carsilquiz pajkpic t'ak zultatunaca wijilñi uchtatačha. Zapa t'akaqui pajkpic zultatuchiztačha. Pascua pjijsta pastanalla Herodesqui Pedro jwes pinsičičha, nii Jerusalén wajtchiz žoñinaczquiz tjeezjapa.

⁵ Nuž Pedruqui tirakaz carsilquiz chawcta želatčha, zultatuž cwitita. Nii parti Yoozquin criichi jilanaca cullaquinaca nižtajapa walja tjapa kuztan Yoozquin mayizatčha.

PEDRO CARSILQUIZTAN LIWRIITA

⁶ Jaka tažuqui Herodesqui Pedro jwes pecatčha žoñinaczquiz tjeezjapa. Ima jwesani nii ween Pedruqui tjajatčha, carinžtan čejlta pucultan zultatž taypiquiz. Yekja zultatunacaqui carsil zanzquiz wijilatčha.

⁷ Jalla nii weenpacha tiripintit Yooz anjilaqui tjončičha. Nižaza nii carsil kjuyltan muzpa waljaž kjančičha. Nekztanaqui nii anjilaqui Pedruž latuquiztan lanzičha. Nuž lanžcu tjaji wajtskatchičha. Nekztanaqui Pedružquiz paljayčičha:

—Uri žaažna, —cjican.

Jalla nii orapacha Pedruž kjara čejlta carinaqui jutztoka tjojtsičha.

⁸ Nižaza nii anjilaqui cjichičha:

—Cinturuna zumpacha yajkzna. Nižaza am čhjata čhjatzna.

Jalla nuž Pedruž paan, nii anjilaqui cjichiča:

—Am irs irsna. Wejt wirquiz apžca.

⁹ Nekztanaqui Pedruqui anjilž wirquizpacha ulanchičha carsilquiztan. Nii ora Pedruqui werara ana werara, ana zuma zizi atchiča. “Chju-uznoka wejrqui” cjican pinsatča.

¹⁰ Jalla nekztanaqui primera wijilñi zultatu watchičha. Nekztanaqui nii jaru wijilñi zultatu watchizakazza. Nekztanaqui carsil zanquin irantichiča. Nekztan carsil jir chawjczqui jutztoka cjetsičha. Jalla nekztanaqui callquinpacha ulanchičha, nižaza ojkchiča. Jalla nuž cjen yekja callquin zina ectača. Anjilaqui nužquiz jutztokaz katchičha.

¹¹ Pedruqui nekztan zumpacha naaziča, carsilquiztan liwriita, nii. Nekztanaqui cjichiča:

—Ultim werara liwriitaž wejrqui. Anal chju-uznukalala. Wejt Yooz Ejp Jiliriqiui niž anjila cuchanžquichiča wejr liwriizjapa Herodes kjarquiztan, nižaza nii anawali paaz pecñi judío zoñinacž kjarquiztan.

¹² Jalla nuž pinsican, Pedruqui María kjuya ojkchiča. Naa Mariiqui Juanž maatača. Juanž tsjii tjuuqui Marcos cjitazakaztača. Jalla naaža kjuyquin walja Yoozquin criichi zoñinacaqui ajczitača, nii ora Yoozquin mayizatča.

¹³ Pedruž kjuy patio zana t'okt'okan, tsjaa tur cullaqui Rode cjiti ulanžquichinča, ject tjonchi, cjican.

14 Pedruž jora čhajzcu, ancha cuntintu zajtchinča partinacžquin mazñi, Pedručha tjonchi, cji-can. Tjatzintača, nii patio zana cjetzinz.

15 Nii quintu nonžcu, criichi žoñinacaqui cjichiča:

—¡Amqui lucurataščha!

Jalla nuž chiyan, naaqui werarapanča cjichinča. Nii partinacazti cjichiča:

—Anaž nii cjesača. Niiž animužlani anjilažlaj.

16 Pedruzti tira zanquiz t'okžinchiča. Nekztan chawjcz cjetžinchiča. Pedro cheržcu, walja tsuchi cjissiča.

17 Pero Pedruqui kjaržtan siñala utchiča nii ajczi žoñinaca ch'uj cjeajajo. Jalla nekztanaqui Pedruqui quint'ichiča, jaknužt Yoozqui nii carsilquiztan liwriitčhaja, jalla nii. Nižaza cjichiča:

—Ančhucqui nužuzakaz quint'aquiča Jacob jilžquin nižaza parti criichinacžquin. Wejr okaž, —cjichiča.

Jalla nekztanaqui Pedruqui ulanchiča, yekja kjutñi ojkzjapa.

18 Tjuñiž tewjctanalla, Pedro ana žejlñi cheržcuqui, nii wijilñi zultatunacaqui ancha tsucchiča, nižaza kuz turwayskatchiča. Pedruqui jaknužt ulantčhaja, jalla nii ana wira jaknuž zizi atchiča.

19 Nekztanaqui Herodesqui Pedro kjuri cuchanchiča. Ana wachi atchiča. Jalla nekztanaqui Herodesqui nii wijilñi zultatunacžquiz zumpacha pewcpewczičha. Jalla nuž pewc pewczcu, nii zultatunaca conajo mantichiča. Jalla niiž wiruñ Herodesqui Judea yokquiztan ojkchiča, Cesarea wajtquin želi.

HERODES TICZICHA

²⁰ Herodesqui žawjchiča Tiro Sidón wajtchiz žoñinacž quintra. Jalla nižtiquiztanaqui ninacaqui acuerdo palt'ichiča Herodes yujcquiz prisintisjapa. Nii Tiro Sidón watjanacchiz žoñinacaqui Herodes tjaata čhjeržtan kamñitakalča. Nižaza tsjii Blasto cjita žoñi želatča. Niiqui Herodes secretariotača. Jalla nii žoñinacaqui Blasto cjita secretario roct'ichiča ninacžta favora tjurt'izinajo, Herodes ana quintra cjeyajo.

²¹ Herodesqui tsjii tjuñi citchiča ninaca nekzi prisinti cjeyajo. Jalla nii cita tjuñquiziqui Herodesqui niž wali jilir zquiti cujtsiča audiencia watzjapa. Jalla nuž zquiti cujtžcu, niž mantiñi sillquin julziča. Nekztanaqui tsjii kjaž takunaca čiichiča.

²² Jalla nuž čiitiquiztanaqui nii nonzñi žoñinacaqui kjawi kallantichiča, tuž cjican:

—Tii chiiñi žoñiqui anača ina žoñi. ¡Antis yoozpanča!

²³ Jalla nuž kjawtiquiztan Herodesqui cuntintutača, nii žoñinacž kjawta taku ana nicz pecatča, “Anača wejrqui Yooztqui” cjicanaqui. Ana werar Yooz Ejpžquin honora tjaachiča. Jalla nižtiquiztan nii orapacha Yooz Ejp Jiliriqui niž anjila cuchanžquichiča, Herodes chawc laa cjisnajo. Jalla nekztanaqui nuž laacjžcu Herodesqui lak'už liwj mirta ticziča.

²⁴ Pero nii liwriñi Yooz takuqui tjapa kjutñi parlita cjissiča. Nekztanaqui tsjan tsjan žoñinacaqui tjapa kuztan nii parlita Yooz taku criichiča.

25 Bernabežtan Saulužtan nii pucultanaqui apayta onantanaca intirjižcu, Jerusalén wajtquiztan Antioquía quejpcchiča. Nižaza Juan chjichcu ojkchiča. Juanqui niž tsjii tjuuqui Marcos cjitazakaztača.

13

BERNABEZTAN SAULUŽTAN CUCHANTA

¹ Antioquía wajtchiz Yoozquin criichi zoñinacžquiztan Yooz puntu tjaajiñinaca, nižaza Yooz taku chiiñi profetanaca želatča. Jalla tinacatača: Bernabé, Saulo, Simón (Negro cjitazakaztača), Lucio (Cirene wajtchiz zoñitača), nižaza Manaén (niiqui junto pajkchiča Herodestan. Herodesqui Galilea kjuttan mantiñitača).

² Tsjii nooj Yoozquin alawazjapa ajczitača, nižaza nii ora ayunasatkalča. Jalla nuž cjen Espíritu Santuqui ninacžquiz cjichiča:

—Ančhucqui Bernabé nižaza Saulo yekja t'akžina, weriž munta trabajo paañijapa.

³ Jalla nekztanaqui Yoozquin mayizizcu, nižaza ayunascu, nii Yoozquin criichinacaqui Bernabežtan Saulužtan ninacž juntun kjaržtan lanziča. Nekztanaqui nii pucultanaqui cuchanchiča, Yooz trabajo trabajžcajo.

BERNABEZTAN SAULUŽTAN CHIPRE YOKQUIN OJKTA

⁴ Nekztanaqui Espíritu Santuž cuchanžquitan Bernabežtan Saulužtan ojkchiča Seleucia cjita watja. Jalla nicju warcu zalchiča Chipre cjita yoka ojkzjapa.

⁵ Jalla nicju irantižcu Salamina cjita watja luzičha. Jalla nicju judionacž ajcz kjuyanacquiz Yooz taku parli kallantichičha. Juan Marcos ojkchizakazza ninaca yanapi.

⁶ Tjapa nii Chipre cjita yokaran ojklaychičha. Nižtami Pafos cjita watja irantichičha. Jalla nicju tsjii judío žoňžtan zalchičha. Nii žoňiqui Barjesús cjitatačha. Nii žoňiqui laykatakalčha. Nižaza toscara chiiñitakalčha, “Wejrqui Yooz taku chichiyučha” cjiñitakalčha.

⁷ Jalla nii layka žoňiqui chawc jiliri Sergio Paulo cjita nižtan chicatakalčha. Jalla nii jiliriqui cusa zizni žoňitačha. Nii žoňiqui Yooz taku nonz pecatčha. Jalla nižtiquiztan Bernabežtan Saulužtan kjawskati cuchanchičha.

⁸ Nii layka žoňiqui ninacž quintra chiichičha, nii jiliriqui ana Yooz taku nonznajo, nižaza Yoozquin ana kuzziz cjeyajo. Nii layka žoňž tsjii tjuuqui Elimas cjitazakaztačha.

⁹ Nižaza Sauluž tsjii tjuuqui Pablo cjitazakaztačha. Nii Pabluqui Espíritu Santuž irpitapantačha. Nii layka žoňiž Yooz tawk quintra chitiquiztan, Pabluqui nii žoňž kjutni zumpacha cherzičha,

¹⁰ tuž cjican:

—Amqui anawalimčha. Incallñamčha. Amqui zajriž maatimčha. Nižaza Yooz kuz quintramčha. Amqui Yooz Ejpž taku tsjii kjutni intintiskatz pecñampančha. ¿Kjažtiquiztan nižta amjo?

¹¹ Jaziqui Yooz Ejp Jiliriqui am casticaquičha. Zuram cjequičha. Tsjii kjaž maj tii tjuñ sii anam cheraquičha.

Jalla nii orapacha zura cjissiĉha, zumchiquizpan. Ana zinta cheri atžcu, nii layka žoñiqui tsjii žoñi kjurchiĉha niž kjarcu tanžcu chjichñijapa.

¹² Jalla nižta cheržcu, nii chawc jiliriqui Yoozquin criichiĉha. Yooz taku puntu tjaajintiquiztan walja ispantichi quirchiĉha nii jiliriqui.

ANTIOQUIA OJKTA

¹³ Jalla nekztanaqui Pabluqui niž mazinacžtan warcu zalchiĉha Pafos wajtquiztan ojkzjapa. Nekztan Perge cjita watja irantichiĉha. Perge watjaqui Panfilia yokquintaĉha. Nekztan Juanqui ninaca ecchiĉha, Jerusalén watja quejpžquichiĉha.

¹⁴ Nekztanaqui ninacaqui Pergequiztan watchiĉha Antioquía watja. Antioquía watjaqui Pisidia yokquintaĉha. Jalla nicju tsjii jeejz tjuñquiz luzziĉha tsjii judionacž ajcz kjuyquiz. Nekztanaqui luzcu, julziĉha.

¹⁵ Jalla nuž želan cjirta Yooz tawk liwruqui liitataĉha, Moisés cjirta Yooz takumi, nižaza Yooz cuntiquiztan chiiñi profetanacaž cjirta takumi, jalla nii liitataĉha. Jalla nuž ližcu ajcz kjuy jilirinacaqui Bernabežquiz Pablužquiz chiyajo nuž cjichiĉha, tuž cjican:

—Jilanaca, anĉhucalta tsjii zuma taku želanaqui, anzpachaž chiya.

¹⁶ Nekztanaqui Pabluqui tsijtsiĉha. Nižaza kjara waytižcu ch'uj cjiskatchiĉha. Jalla nuž ch'uju želan, paljaychiĉha tuž cjican:

—Israel wajtchiz žoñinaca, nonžna. Nižaza werar Yooz rispitiñi žoñinaca, nonžna.

17 Israel wajtchiz žoñinacž Yoozza werar Yoozqui. Jalla nii Yoozqui učum tuquita atchi ejpnaca illziča nižquin sirwajo. Nii timpuquin Egipto yokquin tirapan kamčiča yekja wajtchiz žoñinacažtakaz. Jalla nižta želanami Yoozqui walja mirkatchiča. Wiruñaqi Yooz Ejpqui niž azi tjeezcan jwezquichiča nii yokquiztan.

18 Pusi tunc watanaca ch'ekti yokaran ojklayan, Yoozqui ninacž anawali kamzquiztan awantichiča.

19 Nii timpupacha pakallak nacionanacaqui Canaán yokquin žejlñitača. Jalla tjappacha nii yokquiz žejlñinaca tjatanchiča Yoozqui, nižaza ninacž yoka tjaachiča učum tuquita atchi ejpnacžquiz, tsjii irinsažtakaz.

20 Nekztanaqui pusi patac pjijska tuncan watanaca juezanaca utchiča učum ejpnacžquiz mantiñijapa, Samuelž timpu irantisquizcama. Samuelqui Yooz cuntiquiztan chiiñi profetatača.

21 Jalla nii Samuelž timpuquiz učum ejpnacaqui tsjii pajk jiliri maychiča ninaca irpiñijapa. Jalla nuž maytiquiztan Yoozqui Saúl illziča ninaca mantiñijapa. Nii Saúlqui Cis majchtača, nižaza Benjamín t'akquiztantača. Nii Saúlqui pusi tunc watajapa mantiñitača.

22 Nekztanaqui Yoozqui niž puestuquiztan Saúl jwessiča. Jalla nekztanaqui nii rey puestuquin David utchiča. Davidž puntuquiztan Yoozpachača tuž cjichiqui: “Wejrqui tii David cjita žoñi nayuča Isaíz majchča. Tii žoñiž cjen ancha cuntintutča. Wejt kuzcamapanikaz kamñipanča tiiqui”. Jalla nuž cjichiča Yoozqui.

23 Tsjii Davidžquiztan majchmaati ojkñiqui Je-

susa cjiŧaĉha. Tuquiqui Yoozqui taku ecchiĉha Israel wajtchiz ŧoñinaca liwriizjapa. Jalla nii taku cumplisjapa, Yoozqui tii Jesusa cuchanžquichiĉha Israel ŧoñinacžquiz.

²⁴ Ima Jesusaž Yooz langz kalltan, Juanqui tjapa Israel ŧoñinacžquiz parliñitaĉha, tuž cji-can: “Anĉhucqui persun ujnaca pajžcu, kuznacaž campiya, nekztan bautistaž cjesaĉha”.

²⁵ Juanž ticz tjuñi žcatžinzcan, Juanqui cjichiĉha: “Anĉhucqui jaknužt wejt puntuquiztan pinsiĉhaja, niiqui anaĉha niit wejrqui. Wejt wirquin tjonĉha tsjiiqui, wejtquiztan juc'ant jiliriĉha. Nii atintizjapa, anal waquizuĉha, nižaza wejrqui inakaztĉha.”

²⁶ Jilanaca, Abrahamž majchmaatinaca, nižaza Yooz rispitsñinaca, anĉhucqui nonžna. Anĉhucaltajapaž tii liwriiñi Yooz taku žejlĉha.

²⁷ Jalla nii Jerusalén wajtquiz kamñi ŧoñinacami, nižaza niž jilirinacami, jecĉhalaja Jesusaqui, nii ana zizatĉha. Zapa jeež tjuñquiz judionacž ajcz kjuyquin tuquita profetanacž cijjrta taku liiñipanĉha. Jalla nuž liyanami nii taku anaž intintazñipantaĉha. Nii ŧoñinacapachaĉha tuquita Yooz taku cumpliskatchiqui, Jesusa conta cjiskatchiĉha, nuž.

²⁸ Nii Jesusižquiz ana ĉhjul ujmi watchiĉha, nii conzjapaqui. Jalla nuž cjenami ninacaqui Pilato chawc jiliržquiztan maychiĉha, nii Jesusa conzjapa.

²⁹ Nekztanaqui Jesusiž puntuquiztan jaknužt tuquitanpacha Yooz tawk liwruquiz cijjrtatažlaja, jalla tjapa nii cijjrta takunaca cumplissiĉha. Nii taku cumplistiquiztan Jesusiž curpu cruzquiztan

apakchiča. Nekztanaqui niíž curpu tjattatača.

³⁰ Yooz Ejpzti Jesusa ticziquiztan jacatatskatchiča.

³¹ Nekztanaqui tsjii kjaž majquiztan Jesusaqui niíž mazinaczquiz tjontjonziča. Niíž mazinacaqui niížtan chica ojkchiča Galilea yokquiztan Jerusalén watja. Nižaza ninacaqui anziqúi zoñinaczquiz niíž puntuquiztan tiraž parliča.

³² Jaziqui Yoozqui učum tuqita atchi ejpnaczquiz taku ecchiča. Wejrnacqui nii cumplista takunaca zjicchinča ančucaquiz mazjapa. Jalla nii zuma mazta ančucaquiz parluča. Yoozqui učum ejpnaczquiz taku ecchiča.

³³ Učumqui nii tuqita atchi ejpnaczquiztan tjonchinča. Učumnacalta Yoozqui niíž ecta taku cumplissiča, Jesusa jacatatskatchiqui, nii. Nižaza nižtapacha segundo salmuquiz cijrtatača tuž cjican: “Amqui wejt maatumča. Tonj tjuñi žejtkatchinča”.

³⁴ Nižaza Yooz Ejpqui niíž jacatatz puntuquiztan chiičiča, tuž cjican: “Ticziquiztan am curpu jacatatskatača, ana wira sipulturquiz mojkzjapa”. Jalla nii puntuquiztan chiiča cijjrta Yooz takuqui, tuž cjican: “Yoozqui Davidžquiz taku ecchiča, jalla nii tawk jaru ančucaquiz zuma favora paasača Yoozqui”.

³⁵ Jalla nužpan chiiča tsjii salmuquiziqui, tuž cjican: “Am zuma sirwiñiž curpu ana ecta cjesača mokajo”.

³⁶ Jalla nuž werarača. Davidqui niíž timpu žejlñi zoñinaczquiz yanapchiča, jaknužt Yooz mantičaja, jalla niicama. Nekztanaqui Davidqui

ticziča niiž ejpnaca irata. Nekztan niiž ticzi curpu tjattiquiztan mojkchiča.

³⁷ Jesucristuzti Yooziž jacatatskatchiča. Niiž curpuzti ana mojkchiča.

³⁸ Jilanaca, ančhucqui tuž ziz waquiziča. Jesusiž cjen ujnaca pertuntaž cjesača. Jalla nii zuma taku ančucaquiz parluča.

³⁹ Moisés mantita lii jaru kamcanami, ana pertunta cjisni atča. Jesusižquiz macjatchi cjenacqui jalla nižtakaz tjapa ujnacami pertuntaž cjesača.

⁴⁰ Jaziqui ančhucqui cwit'aza, ana nii tuquita cjiyrta casticu sufrisjapa. Tuquitan Yooz taku parliñi profetanacacqui cjiyrchiča, tuž cjican:

⁴¹ “Nonžna, Yooztan quintrazñinaca, azzucaž ančhucqui, nižaza chjatkachucaž ančhucqui. Wejrqui Yooz Ejptča. Ančuca kamz timpuquiz wali pajk obranaca paachinča. Jalla nuž ančucaquiz quint'ichi cjenami ančhucqui ana criyasača. Jalla nižtiquiztan ispantichi cjisna, nižaza casticta cjequiča, ančhucqui Yooz quintra tjasñinaca”.

⁴² Nuž chiižcu Pabluqui niiž mazinacžtan judionacž ajcz kjuyquiztan ulanchiča. Yekjap ana judionacž ejpchiz zoñinaca želatča. Jalla ninacacqui roct'azziča, tuž cjican:

—Tii jar jeejz tjuñquiz tii puntunacquiztan wejt-nacacquiz wilta tjaaznalla.

⁴³ Nii ajcz kjuyquiz nii cultu žeržcu walja judío zoñinaca, nižaza judiož cuzturumpi paañinaca, jalla ninacacqui Pablužtan Bernabežtan chica apziča. Nii pucultanaqui zuma taku tjaachiča, tuž cjican:

—Ančhucqui Yoozquin tjapa kuztanž cjee. Nižaza tjurt'iñi kuzziz cjee.

⁴⁴ Jalla nii wiruñta jeejz tjuñquiziqui joz tjapa nii wajtchiz žoñinacaqui ajcziča Yooz taku nonzjapa.

⁴⁵ Jalla nuž ajczi cheržcu, nii judío žoñinacaqui iñizichiča. Nekztanaqui Pabluž quintra chi-ichiča, niž taku ana walkatzjapa. Nižaza Pablo iñarchiča.

⁴⁶ Nekztanaqui Pablužtan Bernabežtan ana ekscu chiichiča, tuž cjican:

—Ančhucqui judío žoñinacčhucča. Nižtiquiztan ančhucaquiz primeraqui tii liwriiñi Yooz taku chiistanča. Ančhuczti tii Yooz taku anaž nonz pecča. Nižaza Yooziž tjaata wiñaya žeti anaž risiwz pecča, jalla nuž tantiichinčhucča ančhucqui. Jalla nižtiquiztan anziqui ana judío ejpchiz žoñinacžquiz tii Yooz taku paljayača.

⁴⁷ Jalla nuž mantichiča Yooz Ejp Jiliriqi, tuž cjican:

“Wejrqui ančhucaquiz utchinča, tjapa nacionanacquin žoñinacžquiz wejt puntu kjanzt'ajo. Ančhucaž cjen tjapa kjuttan tii muntuquiz yok tjiiquin kamñi žoñinacami liwriitaž cjequiča”.

⁴⁸ Jalla nuž nonžcu, nii ana judío ejpchiz žoñinacaqui ancha chipchiča. Nižaza Yooz tawk puntuquiztan, tuž cjichiča: “Tii Yooz takuqui zumapanča”. Jakziltat arajpachquin wiñaya kamzjapa Yoozqui illzaja, tjapa ninacaqui nii parlita Yooz taku criichiča.

⁴⁹ Tjapa yokaran Jesucristo Jilirž puntuqui parlitatača.

⁵⁰ Judío žoňinacazti quintra aptazziča. Nekztan ninacaqui tsjii kjaž rispitta judío cuzturumpi paaňi maatakanacžtan, nižaza tsjii kjaž wali zuma rispitta wajt jilirinacžtan palt'ichiča. Nii judío žoňinacaz cjen ninacaqui Pabluž nižaza Bernabež quintra aptazzizakazza, nii yokquiztan chjatkatz-cama.

⁵¹ Jalla nižtiquiztan Pablužtan Bernabežtan ninacž kjojchquiztan zcatchi pulpu tsajtsiča. Jalla nii tsajtstaqui tsjii siňalažtakaztača nii wajtchiz žoňinacž quintrajapa. Nii yokquiztan ulanžcu, Iconio cjita watja ojkčiča.

⁵² Pero nii Yooz taku catokňi žoňinacaqui ancha cuntintutača. Nižaza Espíritu Santuž irpitapanž cjissiča.

14

ICONIO WATJA OJKTA

¹ Iconio cjita wajtquin kamcan Pablužtan Bernabežtan luzziča nii judionacž ajcz kjuyquin. Nekztan Jesucristuž puntuquiztan parlitiquiztan, walja judío žoňinacžtan, nižaza ana judío žoňinacžtan, walja ninacaqui Yoozquin criichiča.

² Pero nii ana criichi judío žoňinacazti ana criiz pecchipantača. Nekztan ninacaqui parti žoňinaca Yoozquin criichinacž quintra aptazziča, nižaza criichinacž quintra pinsiskatchiča, “Nii Yoozquin criichi žoňinacaqui anawalipanča” cij-canaqui.

³ Jalla nižtiquiztan Pablužtan Bernabežtan ažk tjuňi kamčiča nii wajtquin. Nižaza zuma tjurt'íňi kuzziz paljayčiča. Nižaza Jesucristo Jiliržquin tjapa kuzziztača. Jalla nižtiquiztan

Jesucristuqui azi tjaachiĉha, siĉalanacami milajrunacami paajo. Jalla nuĉ paatiquiztan kjanapacha tjeeĉtataĉha, Yooz okĉni takuqui weraraĉha, jalla nii.

⁴ Nii wajtchiz ŉoĉinacaqui pizc partiĉuin t'akziĉha. Parti ŉoĉinacazti judio ŉoĉinacĉquin apuyĉiĉha. Parti ŉoĉinacazti apostolonacĉquin apuyĉiĉha.

⁵ Jalla nekztanaqui judio ŉoĉinacaqui parti ŉoĉinacĉtan, niĉaza nii wajt jilirinacĉtan, tsjii parla asiptichiĉha Pablo Bernabé ch'aanizjapa, niĉaza ninaca maztan ĉhajczjapa.

⁶ Pabluĉtan Bernabeĉtan jalla nii quintu zizcu, atipassiĉha. Listra wajt kjutni ojkĉiĉha. Niĉaza Derbe wajt kjutni ojkchizakazza. Nii pizc watjanacaqui Licaonia cjita yokuintaĉha.

⁷ Tjapa nii Licaonia yokaran zuma liwriiĉni Yooz taku parliĉiĉha.

PABLO MAZTAN CHAJCTA

⁸ Nii Listra wajtquin tsjii zuch ŉoĉi ŉelatĉha. Majttiquiztanpacha niĉtapantaĉha, wira ana ojklayniĉaĉha. Jalla nicju julzi ŉelatĉha.

⁹ Nii zuch ŉoĉiĉqui Pabluĉ chiita taku nonziĉha. Nii ŉoĉiĉqui “Pabluqui wejr ĉhjetnasaĉ jaz” cjican pinsiĉiĉha. Niĉaza Pabluqui niĉĉ kuzquiz nayĉiĉha, Yoozquin tjapa kuzziz cjeta, jalla nii.

¹⁰ Jalla niĉtiquiztan Pabluqui niĉĉquiz zuma chekĉcu, altu jorĉtan chiĉĉinĉiĉha, tuĉ cjican:

—Sok'opacha tsijtsna, am persun kjojĉtan.

Jalla niĉta chiitiquiztanaqui nii zuch ŉoĉiĉqui tsjii layzcu tsijtsiĉha, nekztan ojklayi kallantichiĉha.

11 Jalla nii Pabluž paata cheržcu, žoñinacaqui walja kjawi kallantichiča. Licaonia tawkquiztan kjawchiča tuž cjican:

—Yooznacaqui žoñižtakaz tsewctan chjijwžquichiča učumnacaquiz.

12 Nii žoñinacaqui cjetča, Bernabequi Júpiter cjita yoozza. Pabluqui parliñipantača, jalla nuž cjen nii žoñinacaqui cjichiča, Pabluqui Mercurio cjita yoozza.

13 Wajt tjiiquin Júpiter yooz timpluquiz želatča. Nii timplu fabriqueruqui wac turunaca nižaza pjajkjallanaca zjicchiča, wajt zanquiz, jalla nezk. Nii fabriqueržtan nii wajtchiz žoñinacžtan Pablužquiz Bernabežquiz sirwiz pecatča Yooztakaz. Wac turunacžtan wilana ljokt'iz pecatča.

14 Nekztanaqui Pablužtan Bernabežtan jalla ninaacaqui nižta paa-awc cjen naaziča. Jalla nuž naažcu persun zquiti wjajrsiča, anal nii pecuča cjican. Nižaza nii žoñinacž taypiquin kjawcan luzcu, altu joržtan chiichiča, tuž cjican:

15 —Žoñinaca, ¿kjažtiquiztan wejtnacaltajapa tižta paajo? Wejrnacqui ančuca irata žoñizakaztča. Ančucqui jalla tižta paaz cuzturumpinaca jaytiz waquiziča. Inapanikazza tii ančuc cuzturumpinacaqui. Werar žejtñi Yoozza tjapa kuztanqui sirwizqui. Jalla nuž cjican ančucaquiz mazñi tjonchinča. Nii werar Yoozqui paachiča arajpacha, yokanaca, kotanaca, nižaza tjapa žejlñinaca paachiča.

16 Tuqui timpuqui žoñinacaqui persun kuzcama ojklayñitača. Jalla nuž ojklayan Yoozqui ana kjaž

cjiñitača.

¹⁷ Yoozqui chijñi apayžquiča, zuma zkala pookajo. Nižaza Yooz cjen wali čjjeri žejlča, učumnaca lujlžapami, nižaza cuntintu kamžapami. Jalla nuž zumanaca tjača Yoozqui. Nižtiquiztan žoñinacaqui Yooz pajz waquiziča.

¹⁸ Jalla nuž chiyanami nii wajtchiz žoñinacaqui tira wilana conawkkaz cjetča, Pablužquiz Bernabežquiz sirwizjapa. Ch'aman tii custurumpinacquiztan apatatskatchiča. Ultimquiziqui nižtami ana wilana conchiča.

¹⁹ Jalla nekztanaqui tsjii kjaž judionacaqui tjončiča Antioquía wajtquiztan, nižaza Iconio wajtquiztan. Jalla nii tjonchi žoñinacaqui nii wajtchiz žoñinacžquiz kazzinčiča Pablužquintra. Nekztanaqui maztan Pablo muzpa čhajcčiča. Nekztan nii čhajcñi žoñinacaqui, “Ticziča” cjican Pablo wajtž tjiya joočiča.

²⁰ Wajtž tjiiquin ectaž cjen jalla nekzi criichinacaqui ajcziča Pabluž muytata. Jalla nuž želan, Pabluqui žaaziča. Nekztan wajtquin wilta luzziča. Nekztanaqui jaka tažuqui Bernabežtan Pablužtan ojkčiča Derbe cjita wajt kjutñi.

²¹ Jalla nicju zuma liwriiñi Yooz taku paljayčiča. Jalla nuž paljayan walja žoñinacaqui Yooz taku criičiča. Nekztanaqui Listra Iconio Antioquía nii watjanac kjutñi quejpčiča.

²² Jalla nii watjanacquin Pablužtan Bernabežtan Yoozquin criichi žoñinaca tjurt'iñi kuzziz cjisjapa walja chiižinčiča, tuž cjican:

–Yoozquin kuzzizpankaz tira kamaquiča. Yooz mantuquiz kamchiž cjen, tii muntuquiz

anča sufrispanča učumnacaqui.

²³ Nižaza zapa iclizquin jilirinaca nombrichiča. Nekztanaqui Yoozquin mayizizcu ayunazcu Pabluqui nii nombritanaca Yoozquin cumpjiichiča. Nii nombrita jilirinacaqui Yoozquin tjapa kuzziztača.

PABLUZTAN BERNABEZTAN ANTIOQUIA QUEJPCHICHA

²⁴ Jalla nekztanaqui Pabluqui Bernabežtan Pisia cjeta yokaran watchiča. Nekztanaqui Panfilia cjeta yokquin irantichiča.

²⁵ Jalla nicju Perge wajtquin Yooz taku paljaychiča. Nekztanaqui Atalia cjeta wajt kjutñi ojkchiča.

²⁶ Jalla nicju warcu zalchiča, Antioquía ojkzjapa. Tuquiqui ima okan, Antioquía wajtchiz criichinacaqui Pablužtan Bernabežtan, nii pucultan Yoozquin cumpjiichiča Yooz taku paljayajo. Jalla nuž Yooz taku paljayz trabajo žeržcu, Antioquía watja quejpchiča.

²⁷ Jalla nicju irantižcu, Pabluqui Bernabežtan nii wajtchiz criichinaca juntaskatchiča. Nekztan nii criichinacžquiz quint'ichiča, tjapa Yooz aztan paatanaca. Nižaza quint'ichiča, jaknužt yekja wajtchiz žoñinacaqui Yoozquin criichiča; nižaza Yooz jiczquiz luzziča.

²⁸ Nižaza ažk tjuñinaca Pablužtan Bernabežtan nicju žejlchiča criichinacžtan.

15

JERUSALENQUIN AJCZTA PUNTU

1 Jalla nii timpuqui tsjii kjaž žoñinacaqui Judeaquiztan Antioquía ojkchiča. Jalla nicju ninacaqui Yoozquin criichinacžquin tjaajñi kallantichiča, tuž cjican:

—Moisés mantita cuzturumpinaca paastanča, liwriita cjisjapa.

2 Pablužtan Bernabežtan nižta tjaajiñi žoñinacžtan walja ch'ayi ch'ayi parličiča nii cuzturumpi paaz puntuquiztan. Ultimquiziqui Pablužtan Bernabežtan yekjap criichinacžtan nombrita cjissiča, Jerusalén watja ojkzjapa. Jalla nicju nii parlita puntuquiztan wilta parlaquiča apostolonacžtan nižaza icliz jilirinacžtan.

3 Jalla nijapa nii Antioquía criichinacaqui ninaca cuchanchiča. Jalla nuž ojkcan, Fenicia yokaran Samaria yokaran watchiča. Jalla nuž wajtcjan Pablužtan Bernabežtan quint'ichiča, jaknužt yekja nacionchiz žoñinacaqui ninacž tuquita cuzturumpinaca jaytičhaja, nižaza jaknužt Yoozquin kuzziz cjistčhaja, jalla nii quint'ichiča. Jalla nii quintu nonžcu žoñinacaqui “Ancha cuzala” cjican cjichiča.

4 Pablužtan Bernabežtan Jerusalén watja irantitan, nii wajtchiz criichinacami apostolonacami nii icliz jilirinacami tjapa juntu Pablužtan Bernabežtan risiwchiča. Jalla nekztanaqui Pabluqui Bernabežtan quint'ichiča jaknužt ninacaqui Yooz aztan paatčhaja, jalla nii.

5 Nekztanaqui yekjap fariseo partiquiztan criichinacaqui tsijtsiča, tuž cjican:

—Nii yekja nacionchiz criichinacaqui judionacž chimpuz custurumpi jalla nii paastanča. Nižaza Moisés mantita liicama kamla.

⁶ Jalla nekztanaqui apostolonacami icliz jilirinacami ajcziča jalla nii puntu parlizjapa.

⁷ Jalla nuž azkpacha ch'ayi ch'ayi parližcu, Pedruqui tsijtsiča, tuž cjican:

—Jilanaca, ančhucqui tižta zizza. Tuquiqui Yoozqui ančucaquiztan wejr illzipanla, yekja nacionchiz žoñinacžquiz nii zuma liwriiñi Yooz taku paljayajo, ninaca nii liwriiñi taku criyajo.

⁸ Nižaza Yooz Ejpqui tjapa žoñinacž kuz zuma zizza. Nii yekja nacionchiz žoñinaca criiñi kuzziz cjen, Yoozqui ninacžquiz Espíritu Santo luzkatchiča. Jaknužt učumnacaquiz Espíritu Santo luzkattčhaja jalla nužuzakaz. Nižaza Espíritu Santo tjaacan, Yoozqui tjeeziča, yekja nacionchiz criichinaca persun maati cunta ricujchizakazza, jalla nii.

⁹ Yoozqui ninacžtan učumnacatan ana pjalpalziča. Yoozquin tjapa kuz cjen ninacaqui kuz campiichiča. Nižaza Yoozqui ninaca pertunchiča, zuma kuzziz cjeayajo.

¹⁰ Jaziqui Yooz Ejpqui nižta munchiča. Ančhucqui Yooz quintraj cjequiž niiqui, casticta cjequiča. Ančhucqui nii yekja wajtchiz criichinaca učum cuzturumpi tjuz pecča, tsjii liczi kuzižtakaz. Učumpachaž nii cuzturumpinaca ana tjapa payi atchiča, nižaza učum tuquita atchi ejpnacžquiztanpacha ana tjapa payi atchiča. Jaziqui, ¿kjažtiquiztan nižta ninaca paakatž pecjo?

¹¹ Nii cuzturumpi paañiž cjen anaž jakziltami ujnacquiztan liwriita cjesača. Jesucristo JiliriQUI okžni kuzziz cjen žoñinacž laycu ticziča. Jalla nižtiquiztan Jesucristužquin criichiž cjen

učhumnacami ninacami ujnacquiztan liwriita cjesača.

¹² Jalla nuž Pedruž chiitiquiztan tjappacha ch'uju cjissiča. Nekztanaqui Pablužtan Bernabežtan ninaca quint'ichiča, jaknužt yekja nacionanacaran ojklaycan Yooz aztan siñalanacami milajrunacami paatčhaja, jalla nii.

¹³ Jalla nuž quint'i žeržtan, Jacoboqui cjichiča: —Jilanaca, nonžna.

¹⁴ Simón Pedruqui učhumnacaquiz quint'ichiča jaknužt tuquiqui Yoozqui persun maati cunta ana judío žoñinaca ricujchižlaja, jalla nii.

¹⁵ Nižaza Yooz taku parliñi profetanacž cjiirta tawk jaručha niiqui. Cjiirta Yooz takuqui tuž cjiča:

¹⁶ “Tii wattanaqui quejpžcača. Davidž kjuyquiztan ojknī žoñinacaqui pajlzi kjuyažtakaz žejlča. Jaziqui Davidž pajlzi kjuyaqui wital kjuyača. Wital waytača, ew žoñinaca cjisjapa.

¹⁷ Jalla nekztanaqui tjapaman nacionchiz žoñinacaqui Yooz Ejp Jilirž kamaña pecaquiča. Jakziltat Yooz kjawztažlaja, jalla nii žoñinacaqui Yoozquin tjonaquiča.

¹⁸ Jalla nuž cjichiča Yooz JiliriQUI tuqui timpuquiztanpacha, žoñinacž zizajo”.

¹⁹ “Jalla nižtiquiztan wejr cjiwčha. Nii ana judío žoñinacaqui ana molistis waquiziča. Ninacaqui ninacž tuquita cuzturumpinaca jaytichiča, Yooz kuzcama kamzjapa. Jalla nuž cjenaqui ana kjaž cjis waquiziča, nii učhum cuzturumpinaca paaz puntuquiztan.

²⁰ Tiikaz učhumqui ninacžquin cijrasača, tuž cjican: “Zoñiž paata yoozquin wilana jawkta chjizwi anača lujlsqui. Nižaza anača adulteri-uquiz ojklayzqui. Nižaza jora zkenzcu conta animal chjizwimi anača lujlsqui. Nižaza čjul animal ljocmi anača lujlsqui”. Jalla niikaz cumplistanča nii yekja wajtchiz criichinacaqui.

²¹ Tuquitanpacha zapa wajtquiziqui Moisés liiqui parlitatača. Nižaza zapa ajcz kjuyquiz litatača zapa jeejz tjuñquiziqui.

²² Jalla nekztanaqui apostolonacami icliz jilirinacžtan nižaza tjapa criichinacžtan palt'ichiča, tsjii tsjii ninacžquiztan illzjapa. Nekztan Judas illztatača, niž tsjii tjuuqui Barsabás cjitazakaztača. Nižaza Silas illztazakaztača. Jalla nii pucultanaqui walja zuma jilanaca cjitatača niž mazi jilanacžquiztan. Nekztanaqui nii ilzta žoñinacaqui Pablužtan Bernabežtan cuchantatača Antioquía wajtquin, nii cuzturumpi paaz parlita puntu mazjapa.

²³ Jalla ninacžtan tsjii carta apaychiča. Nii cartiquiz tuž cjichiča:

“Wejtnaca jilanaca, wejrnacqui Jesusiž illzta apostolonactča, nižaza icliz jilirinactča, nižaza Yoozquin criichinactča. Wejrnacqui ančucaquin tsaanznuča. Ančucqui ana judío žoñinacčucča. Antioquía wajtchiz žoñčucča, nižaza Siria yokquin kamiñčucča, nižaza Cilicia yokquin kaminčuczakazza.

²⁴ Wejrnacqui tsjii quintu zizzinča. Tekztan tsjii kjaž žoñinacaqui ančucaquin ojktkalča, ana jec jiliriž mantita ojkiča. Jalla ninacaž chiita taku ančuca kuz turwayskatčani. Ninacaqui

cjičhani, “Judionacž chimpuz cuzturumpi paastanča. Nižaza tjapa Moisés liiqui cumplistanča”. Jalla nuž chiižcu, paysnakñi kuzziz cjissinčucžlani.

²⁵ Jalla nii quintu zizcu, nii puntuquiztan wejrnacqui zuma palt'ichinča. Nekztanaqui wejrnacqui kazzinča, tsjii pucultan wejtnacaquiztan illzjapa. Nii pucultanaqui illztatača ančhuccherzñi okajo. Ninacaqui Pablužtan Bernabežtan chica okaquiča. Nii Pablo Bernabé, jalla ninacaqui ancha zuma pecta jilanacača.

²⁶ Nii Pablužtan Bernabežtan Jesucristo Jilirž mantita ojklaycan joz conkatchiča.

²⁷ Nižtiquiztan wejrnacqui Judastan nižaza Silžtan cuchanchinča, ančhucatan tii puntu parlizjapa. Nižaza ančhucaquiz tjapa tii puntuquiztan paljayaquiča.

²⁸ Wejtnacquizimi Espíritu Santužquizimi walikaztača tinacaqui. Wejrnacqui ančhucaquiz anaž tsjii liczi kuzi tjuz waquizasacha, anaž wejtnac liczi cuzturumpi paakatz waquizasacha. Jalla tiikaz paakatz waquiziča.

²⁹ Zoñiž paata yoozquiz wilana jawkta chjizwi anača lujlsqui. Nižaza čjul animal ljocmi anača lujlsqui. Nižaza jora zkenzcu conta animal chjizwimi anača lujlsqui. Anača adulteriquiz ojklayzqui, luctaka cjiñimi maataka cjiñimi. Zuma lucutiñipan kamsa. Jalla nuž kamaquiž niiqui, walikaz cjequiča ančhucqui. ¡Zumakaz ojklaya!” Jalla nuž cijirtatača nii cartaqi.

³⁰ Nekztanaqui nii cuchanta žoñinacaqui cartižtan ojkičiča Antioquía watja. Jalla nicju irantižcu, tjapa nii wajtchiz criichi žoñinaca jun-

tazziča. Nekztan nii carta intirjichiča.

³¹ Jalla nii carta ližcu, nii jilanacaqui walja chipchiča, nii zuma takunaca cjiržquitaž cjen.

³² Nižaza nii Judastan Silžtan Yooz taku paljayničača. Jalla nuž paljaycan walja žoñinacžquiz kuzziča. Nižaza nii criichinacaqui tjurt'iñi kuzziz cjiskatchiča ninacž tawkžtan.

³³ Jalla tsjii kjaž tjuñinaca nicju kamchiča, Judastan Silžtan. Nekztanaqui ninaca cuchanžquiñi jilanacžquin quejz pecatča. Jalla nuž peccan parti criichinacaqui cjichiča:

—Yooz Ejpžtan ančhucqui zumakaz okalla.

³⁴ Jalla nekztanaqui Judasqui ojkchiča. Ultimquiziqui Silasqui eclis tantiichiča.

³⁵ Nižaza Pabluqui Bernabežtan Antioquía wajtquin eclichizakazza. Nekztanaqui parti jilanacžtan Yooz taku walja tjaajnatča ana criichi žoñinacžquiz, nižaza liwriiñi Yooz taku paljayatča.

PABLUQUI WILTA YOOZ TAKU PALJAYI OJKCHA

³⁶ Jalla niiž wiruñ Pabluqui Bernabežquiz paljaychiča, tuž cjan:

—Wiltaz jaziqui ojklalla. Jakzi watjanacquin učhumqui liwriiñi Yooz taku parlitažlaja, jalla nii jilanacžquin tjontjonžquilalla. Jaknužt kamčhaja jalla niičhum cheržquilalla.

³⁷ Bernabequi Juan chjitz pecatča. Juanž tsjii tjuuqui Marcos cjitazakaztača.

³⁸ Niiž tuquiqui Panfilia wajtquin žejlcan, Marcosaqui Pablužquiztan Bernabežquiztan quepi zarakchiča. Ana iya chica ojklaychiča Yooz

taku parlican. Jaziqui Pabluqui Marcos ana chjitz pecatča.

³⁹ Jalla nižtiquiztan Pablužtan Bernabežtan ch'aassiča. Nekztanaqui jaljtichiča. Bernabequi Marcos chjitzcu tsjii warcu luzziča Chipre kjutñi ojkzjapa.

⁴⁰ Pabluzti Silas cjita zoñi illziča nižtan chica ojkñijapa. Nii žejlñi jilanacaqui Pablužtan Silžtan Yoozquin cumpjiichiča, Yooz zuma yanapajo.

⁴¹ Nekztan ninaca Siria yok kjutñi ojkchiča. Siria yokaran nižaza Cilicia yokaran ojklaychiča, iclizquiztan icliza ojklaychiča, criichi jilanaca tjurt'iñi kuzziz cjeyajo.

16

TIMOTEOQUI PABLO CUMPANT'ICHICHA

¹ Nekztanaqui Pablužtan Silžtan iran-tižquichiča Derbe Listra cjita watjanacquiz. Jalla nicju tsjii Yoozquin criichi zoñžquiz zalchiča, Timoteo cjita. Niiž maaqui judío žontača, Yoozquin criiñtača. Niiž ejpqui griego zoñitača.

² Nižaza Listra wajtchiz criichi zoñinacami Timoteo rispitchiča. Iconio wajtchiz zoñinacaqui Timoteo rispitchizakazza.

³ Nekztanaqui Pabluqui Timoteo kjutzñi pecatča. Jalla nižtiquiztan Pabluqui judionacž cuzturumpi jaru Timoteo chimpuskatchiča, nii yokaran kamñi judionacaž ana quintra chiyajo. Timoteož ejpqui griego zoñitača, anatača judío. Jalla nuž cjen Timoteoqui ana chimpuchiztača, judionacaž irata. Jalla nii zizziča nii yokaran kamñi judionacaqui.

4 Nekztanaqui tjapa watjanaca ojklaycan, Pabluqui niž mazinacžtan Jerusalén parlita quintu mazziča. Apostolonacami Jerusalén icliz jilirinacami, jalla ninacaž chiita taku quint'ichiča tjapa Yoozquin criichi jilanacžquiz.

5 Jalla nižtiquiztanaqui niiran žejlři criichinacaqui Yoozquin walja tjapa kuzziz cjissiča. Nižaza zapuru Yooz jiczquiz luzatča iya žoñinacaqui. Jalla nižtiquiztan tsjanž yapatča Yoozquin criichi jilanacaqui.

PABLUZ CHJUUZTA

6 Jalla nekztanaqui Espíritu Santuqui Pablužquizimi niž mazinacžquizimi atajčiča, ana Asia yokaran Yooz taku parliři ojklayajo. Jalla nižtiquiztan ninacaqui Frigia, nižaza Galacia cjita yokanacaran ojklayčiča.

7 Jalla nuž ojklayžcu, Misia cjita lintiquin irantichiča. Jalla niwjctan Bitinia yokquin luzquiz pecatača. Jalla nuž pinsan Jesucristužtan Espíritu Santužtan nii yoka luz ana munchiča.

8 Jalla nižtiquiztan Bitinia yokquin ana luziča. Antis Misia yokquin watžcu, Troas cjita watja irantichiča. Jalla nii watjaqui pajk kot tjiiquiz želatča.

9 Jalla nicju tsjii ween Yoozqui Pablo chjuuzkatchiča. Chjuuzcan jalla tuž Pabluqui cherčiča, tsjii Macedonia wajtchiz žoñi cherčiča. Tsijsi želatča. Nižaza rocatča, tuž cjican: “Macedonia yok kjutři kajkžcalla amqui. Yanapt'alla”.

¹⁰ Jalla nuž wiiquin chjuužcuqui Pabluqui tjaczicha Macedonia ojkzjapa. Nižazakaz wejrnacmi tjaczinča Pablužtan ojkzjapa. Ultimupanž Yoozqui wejrnaca kjawziča, nawjk ojklajajo liwriiñi taku paljayajo.

*PABLUZTAN SILZTAN FILIPOS CJITA
WAJTQUIN OJKTA*

¹¹ Jalla nekztanaqui Troas wajtquin tsjii warcu zalazzinča. Nekz luzcu ojkchinča. Nii pajk kot taypiquiz tsjii kolta yoka želatča, Samotracia cjita. Jalla nii tirichuc ojkchinča. Niiž jaka tažuqui Neápolis cjita watja irantichinča.

¹² Jalla nekztan ojkchinča Filipos cjita watja. Nii watjaqui tuquitanpacha romano cjita wajtchiz zoñinacaž julztatača. Jalla Macedonia yokquin nii watjaqui tsjan chekan pakjitača yekja watjanacquiztanaqui. Jalla nicju tsjii kjaž maj kamchinča.

¹³ Tsjii jeejz tjuñquiz wajtquiztan ulanchinča, nižaza puj atquin. Jalla nicju zoñinacaqui ajczñitača, Yoozquin mayizi. Jalla nuž žejlcan wejrnacqui julzinča. Nekztanaqui liwriiñi Yooz taku palt'ican, nii ajczi maatakanacžquiz paljaychinča.

¹⁴ Tsjaa maatakqui Lidia cjititača. Naaqui Tiatira cjita wajtchiz žontača. Nižaza naaqui fin murat telanaca tuiñtača. Naa žonqui Yoozquin walja kuz tjaachintača. Jalla nuž cjen, Yoozqui naaža kuzquiz Pabluž chiita taku catokskatchiča.

¹⁵ Jalla nižtiquiztan naa žonqui bautistatača naaža familianacžtanpacha. Nekztanaqui wejt-nacaquiz roct'ichinča, tuž cjican:

—Ančhucqui ultimupan wejrqui Jesucristužquin criichinčhataqui cjičhaj niiqui, wejt kjuyquin tjonžcalla alujazjapa. —Nuž roctiquiztan naaža kjuyquiz wejrnacqui alujazzinča.

¹⁶ Tsjii noojiqui wilta Yoozquin mayiziz yokquin ojkcan, wejrnacqui tsjaa zajriž tanti turatan zalchinča. Naa turqui ariwiñi zizzintača. Naaqui patrunž manta payiñtača. Jalla nižtiquiztan walja paaz ganiñtača naaža patrunžjapa.

¹⁷ Naa turqui Pablužquiz nižaza wejtnacaquiz apžni kallantichinča. Jalla nuž apzcan kjawiñtača, tuž cjian:

—Tii žoñinacaqui arajpach Yooz sirwiñiča. Nižaza ančhucacquiz liwriiñi Yooz taku paljayñiča. —Jalla nuž kjawcan chiichinča.

¹⁸ Zapuru nižta kjawcan wejtnacaquiz apžniñtača. Jalla nižtiquiztan Pabluqui naažajapa tsjii zkoluc žawjznawcž cjetča. Jalla nuž cjen naaža kjutni quejpžcu cherziča. Nižaza naa tanñi zajrižquiz chiichiča, tuž cjian:

—Zajra, Jesucristuž tjuuquiz am ulna cjiwča taa turaquiztan.

Jalla nii orapacha nii zajraqui naa turaquiztan ulanchiča.

¹⁹ Jalla nižtiquiztan naa tura patrunanacaqui naaža ariwiñiquiztan ana iya paaz gani atchiča. Jalla nuž cjetča nii patrunanacaqui. Jalla nižtiquiztan ninacaqui Pablužtan Silžtan tanchiča. Nekztanaqui pajk plazquin chjitchiča nii wajt pajk jilirinacž yujcquin.

20 Juez jilirinacžquin prisintiskatchičha, tuž cji-can:

—Tii judío žoñinacaqui učhum žoñinaca aptjapčha.

21 Nižaza ninacž tsjemat cuzturumpinaca tjaa-jinčha. Jalla nii cuzturumpinaca učhumqui anaž catokz waquizičha. Nižaza ana niicama kamz waquizičha. Lii quintračha. Učhumnacaqui roman žoñinacčhumčha.

22 Jalla nuž chiitiquiztan nii wajtchiz žoñinacaqui Pabluž nižaza Silž quintra tjojtčičha. Nižaza nii juez jilirinacaqui mantičičha, ninacž kujtta zquiti chjojkžinajo, nekztan paržtan wjajtajo.

23 Jalla nuž walja wjajtžcu, carsilquiz chawjčičha. Nižaza nii carsila itzñi žoñi mantičičha, ninaca zuma wijilajo.

24 Jalla nuž mantitiquiztan, nii carsila itzñi žoñiqui ninaca carsil kjuyl majcčičha, nawjk c'utzjati. Jalla nekzi pajk mazu madera želatčha, niiqui žoñi castics maderapantačha. Nii maderquiz ninacž kjojcha majcžinčičha.

25 Jalla nuž cjenami chica arama Pablužtan Silžtanaqui Yoozquin mayizican želatčha. Nižaza Yooz wirsu itscan želatčha. Jalla nuž mayizan, nuž itsan, nii parti carsilquiz chawjčeta žoñinacaqui nonzičha.

26 Jalla nekztanaqui tiripintit tsjii tembloraž tjonchi. Nekztan nii carsil yokanacami pirkanacami liwj chekjinskatchičha. Jalla nuž chekjintiquiztanaqui tjapa nii carsil zananacami justokaz cjetsičha. Nižaza nii preso žoñinacž čhejlta carinanacami justokaz jersičha.

²⁷ Jalla nižta watžcu, carsil itzñi žoñiqui tjaji wajtsičha. Nii carsil zananaca cjetsi cheržcu, “Pris žoñinacaqui atipchiž caa” nuž cjican pinsičiċha. Jalla nuž pinsiscu, niž pajk cuchillu jwessiċha, cuchillžtan persuna conzjapa.

²⁸ Nekztanaqui Pabluqui kjawchiċha, tuž cjican:

—Anam persunpacha ċhjojrichaquiċha. Tjapa chawjcta pris žoñinacami tekz žejlċha.

²⁹ Jalla nekztanaqui nii carsila itzñi žoñiqui micha tjeesnaj cjichiċha. Nekztanaqui carsil kjutñi zati pariju luzziċha, walja tsucchi chekjincan. Nekztan Pabluž Silž kjojchquiz tuzi t'oksiċha.

³⁰ Nekztanaqui zancu jwescu, pewcziċha, tuž cjican:

—Jilanaca, wejr liwriita cjisjapa, ċhjulut wejr paaz waquizasaya?

³¹ Pablužtan Silžtanaqui kjaaziċha, tuž cjican:

—Jesucristo Jiliržquiz tjapa kuztan criya. Jalla nuž cjenacui liwriita cjequiċha am familianacžtanpacha.

³² Jalla nekztanaqui Pablo Silasqui nižquizimi niž kjuy familianacžquizimi Yooz taku paljaychiċha.

³³ Nii weenpacha nii carsila itzñi žoñiqui ninacž ċhjojri awjžinchiċha. Jalla nekztanaqui niimi tjapa familianacami bautista cjiŋsiċha.

³⁴ Nekztanaqui nii carsila itzñi žoñiqui Pablužtan Silžtan jalla ninaca ċhjitchiċha persun kjuya. Niiž kjuyquin ċhjeri tjaachiċha. Nii žoñiqui familianacžtanpacha walja cuntintutaċha Yoozquin criižcu.

³⁵ Nii wenziqui juez jilirinacaqui zultat policianaca mantichiča carsilquin, Pablužtan Silžtan cutz ortinžtan cuchanchiča.

³⁶ Ninacaž carsilquin irantitan, nii carsila itzñi zoñiqui Pablužquiz cjichiča:

—Nii juez jilirinacaqui wejtquin ortina apayžquichiča, ančhuc cutznajo. Nižtiquiztan ančhucqui jazic liwriiž okaquiča.

³⁷ Pabluzti nii zultat policianaczquiz paljay-chiča, tuž cjican:

—Wejrnacqui roman parti zoñinactča. Tjapa tii wajtquiz žejlñinacz yujcquiz wejrnaca wja-jtchiča, ana wejtnacaquiz zumpacha pewczcu. Nekztanaqui inapacha wejrnac carsilquiz majcchiča. ¿Jaziqui ančhucqui wejrnaca chjojzaka cuts pecya? ¡Anaž cjesača! Antiz ninacaj persuna wejrnac tii carsilquiztan jwesi tjonla.

³⁸ Nekztanaqui nii policianacaqui ojkžcu nii juez jilirinaczquiz tjapa nii puntuquiztan quint'ichiča. Pablužtan Silžtan roman parti zoñinacquiztan, jalla nii quintu zizcu, ancha tsucchi cjissiča.

³⁹ Jalla nižtiquiztan pertuna mayizi ojkchiča. Nekztanaqui nii jilirinacaqui tjonžcu jwessiča. Nekztan Pablužquizimi Silžquizimi rocchiča, tuž cjican:

—Tii wajtquiztanž ulna.

⁴⁰ Jalla nekztanaqui carsilquiztan ulanžcu Pablužtan Silžtan Lidia kjuya ojkchiča. Jalla nekztanaqui criichi jilanaca cheržcu, “Tjurt'iñi kuzziz cjee ančhucqui” cjican chiižinchiča. Nekztanaqui ojkchiča.

17

*ZOÑINACAŽ APTJAPZTA TESALONICA
WAJTQUIN*

¹ Jalla nekztanaqui wilta ojkchiča, Pablužtan Silžtanaqui. Anfópolis nižaza Apolonia jalla nii yokanaca watchiča. Nekztanaqui Tesalónica cjita pajk watja irantichiča. Jalla nekzi tsjii judionacž ajcz kjuya želatča.

² Nii wajtquin Pabluqui nii acjz kjuyquin ojkchiča, niž cuzturumpi jaru. Tsjii čhjep jeejz tjuñinacquiziqui Pabluqui nii ajczñi žoñinacžquiz paljaychiča, nii tuquitan cjijrta Yooz tawk jaru.

³ Yooz tawkquiztan tjaajinchiča Jesucristuž puntuquiztan, tuž cjican:

—Jesucristuqui sufrispantača, niž ticzcama. Niiž ticziquiztan jacatatspantača. Nii Jesusapachača Yooziž cuchanzquita Cristuqui. Jalla nuž ančucaquiz paljayuča.

⁴ Jalla nii paljaytiquiztan yekjap judionacaqui Jesucristužquin criichiča. Nekztanaqui ninacaqui Pablužtan Silžtan juntu cjissiča. Nižaza walja griego parti žoñinacaqui Jesucristužquiz criichizakazza. Tuquiqui Yooz Ejpkaz sirwichiča. Nižaza walja rispitta maatakanacaqui Jesucristužquin criichizakazza.

⁵ Jalla nuž cjen ana criiñi judionacaqui ancha iñiziñi cjissiča. Nekztanaqui nii ana criiñinacaqui yekjap ñejo kuzziz žoñinaca juntjapchiča, Pabluž Silž quintra parlizjapa. Nekztanaqui ninacaqui juc'anti žoñinaca juntichiča. Nii žoñinaca juntiču, žoñinaca aptjapchiča Pabluž Silž quintra. Nekztanaqui tjapa nii quintra aptjapzñi

žoñinacaqui Jasonž kjuya ojkchiča. Jalla nuž ojkžcu, nii kjuya muyuntichiča, Pablo Silas kjurcan. Nii pucultan žoñinaca jwes pecatča, parti žoñinacžquiz intirjizjapa.

⁶ Pero Jasonž kjuyquiz Pablo Silas ana watchiča. Nižtiquiztanaqui nii quintra žoñinaca Jasón tanchiča, nižaza yekjap nekz žejlñi jilanacžtan. Nekztanaqui nii criichinacaqui chjichtatača wajt jilirinacž yujcquin. Nii jilirinacž yujcquiz želan, nii quintra žoñinacaqui altu joržtan čiichiča, tuž cjican:

—Tii žoñinacaqui jakziquin ojektčhaja, nekz žejlñi žoñinacž kuz turwayskatča. Jalla tinacaqui tekz tjonchizakazza, ana wal kamaña quejpskatzjapa.

⁷ Jasonqui niž kjuyquiz Pablo Silas alujchitakalča. Nižaza tinacaqui cjiča, yekja chawc jiliri žejlča, Jesusa cjita. Nužukaz cjiča tinacaqui. Jalla nuž cjenacqui niiqui ancha učhum lii quintrača, nižaza učhum roman chawc jilirž quintrača. —Nuž cjican quintra čiichiča.

⁸ Jalla nuž nonžcu, tjapa nii wajtchiz žoñinacami jilirinacami walja žawjchiča.

⁹ Ultimquiziqui Jasonqui niž mazi-nacžtanpacha tsjii wali printa tjaachiča, ninaca cutta cjeyajo.

PABLUZTAN SILZTAN KAMTA BEREA CJITA WAJTQUIN

¹⁰ Jalla nii nooj weenpacha criichi jilanacaqui Pablužquiz Silžquiz nii wajtquiztan ulanskatchiča. Nekztan Berea cjita watja ojkchiča. Jalla nicju irantižcu, judionacž ajcz kjuya luzziča.

¹¹ Jalla nii judionacaqui tsjan zuma kuzziztača nii Tesalonic wajtchiz judionacžquiztan. Tjapa kuztan Yooz taku catokñitača. Nižaza zapuru ninacaqui tuquita cjirra Yooz taku ližcu ližcu zumpacha tantiichiča, nii Pabluž Silas chiita taku, werara ana werara, jalla nii zizjapa.

¹² Jalla nižtiquiztan walja nii judionacaqui Jesucristužquin criichiča. Nižaza walja griego parti žoñinacaqui criichizakazza, rispitta luctakanacami maatakanacami criichizakazza.

¹³ Jalla nekztanaqui nii Tesalónica wajtchiz judionacaqui nonziča, Pabluqui Berea wajtquin Yooz taku paljayñi ojkchiča. Jalla nii quintu zizcu, Berea watja ojkchiča. Jalla nicju ninacaqui žoñinaca žawjwaž zjijcanchiča, Pabluž quintra.

¹⁴ Jalla nuž cjen nii criichi jilanacaqui ana enen-skatžcu Pablo cuchanžquichiča pajk kot kjutñi. Silžtan Timoteožtan, jalla ninacazti Berea wajtquiz eclichitača.

¹⁵ Nekztanaqui Pablužtan cumpant'ini žoñinacaqui Pablo chjitchiča Atenas cjita watja. Jalla nekztanaqui quejpžquichiča tii takunacžtan: “Silžtan Timoteožtan, jalla ninacaqui Pablužquin apura irantiz waquiziča”, cjican.

PABLUZ KAMTA ATENAS CJITA WAJTQUIN

¹⁶ Nekztan Pabluqui Silas Timoteo tjewsnatča. Atenas cjita wajtquiz žejlcan, wacchi žoñiž paata yooznaca cherchiča. Nii wajtquiziqui jakzimi žoñiž paata yooznacapanikaz želatča. Jalla nuž cheržcu niž kuzquiz ancha sint'ichiča.

17 Jalla nižtiquiztan Pabluqui judionacž ajcz kjuyquin paljaychiča. Judionacžquizimi Yooz rispitni žoñinacžquizimi paljaychiča. Nižaza zapuru pajk plazquin paljaychiča, ojklayni žoñinacžquiz.

18 Jalla nii plazquiz tsjii istutiiñinaca želatča. Parti nii istutiiñinacaqui Epicúreos t'akquiztantača. Parti nii istutiiñinacazti Estoicos cjita t'akquiztantača. Jalla ninacaqui Pablužquiz paljaychiča. Nekztanaqui yekjap istutiiñinacazti cjichiča:

—¿Jaknužkat tii žoñic chiičhani, waljaž chiiča pero? ¿Čhjulut intintiskatz pecjo?

Yekjap istutiiñinacazti cjichiča:

—Niiča yekja yooznacž puntuquiztan paljayniqui.

Pabluqui Jesusiž puntuquiztan nižaza ticzquiztan jacatatz puntuquiztan chiichiča. Jalla nuž chiiťiquiztan nii istutiiñinacaqui nižta chiichiča.

19 Nekztanaqui nii istutiiñinacaqui Pablo chjitchiča tsjii Areópago cjita yokquin. Jalla nicju ajczniťača parlizjapa. Nekztan Pablužquiz chiičiča tuž cjan:

—Nawjctan amqui tsjii ew tjaajintanaca zjičchamča. Jalla nii ew taku ziz pecuča wejrnacqui.

20 Amqui tsjemat istrañchuc takunaca chiiča. Kjažť cjii nii takunacaya, jalla nii intintaz pecuča wejrnacqui.

21 Nii Atenas wajťchiz žoñinacaqui nižaza nii parti wajťquin kamni žoñinacaqui čhjul ew takunacami nonzkaz pecatča. Nižaza čhjul ew taku-

nacami chiiz kaz pecatča. Jalla nii ew takunac-quizkaz ninacž kuz tjaañitača.

²² Jalla nii Areópago yokquin Pabluqui ninacž taypiquin tsijtsiča. Jalla nuž tsijtsu, tuž cjichiča:

—Atenas wajtchiz žoñinaca, ančhucqui wacchi yooznaca rispitiñchucča, jalla niil cheruča.

²³ Tii wajtquiz ojklaycan, wejrqui ančuca silunaca cherchinča. Nižaza tsjii silquin cherchinča tuž cjiirta: “Tii siluqui ana pajta Yooz sirwiz-japača”. Nii ana pajta Yooz ančhucqui rispitiča, ana pajžcupacha. Jalla nii ana pajta Yooz puntuquiztan chiyuča.

²⁴ Nii Yoozqui tii muntu paachiča, nižaza tjapa tii muntuquiz žejlñi cusasanaca. Jaziqúi arajpachquinami yokquizimiž mantiča. Nii Yoozqui žoñinacž kjuyta timplunacquiz ana kamča.

²⁵ Anaž čjulumi pecča, žoñiž sirwita paataqui. Niipachaž zapa maynižquiz žeti tjaača, nižaza quera atquiztan jeejsjapa tjaača, nižaza tjap-pacha tjaača žoñinacžquiz.

²⁶ Tsjii lucutiñi žoñžquiztan tjapa tii muntuquiz žejlñi žoñinaca tjonkatchiča Yoozqui, tjapa kjutñi tii muntuquiz kamajo. Nižaza žoñinacž žejtz timpumi ticz timpumi, jalla nii Yoozpachaž mantiča. Nižaza jakziquin tsjii žoñiqui kamslaja, jalla niimi zakaz mantiča Yoozqui.

²⁷ Jalla nuž mantichiča Yoozqui, žoñinaca nii kjurajo, nižaza wachajo. Ultimupanča Yoozqui učumnacaquiztan anaž ažkquin žejlča.

²⁸ Yooziž cjen učumqui žejtča, nižaza ojk-layča. Jalla nižtazakaz yekjap ančucaquiztan

cjiŕchiĉha, tuŕ cĵican: “Yooziŕ paataĉha uĉhumqui”.

²⁹ Nekztanaqui uĉhumqui Yooz paatiquiztan, uĉhumlaqui anaŕ pinsis waquiziĉha, tuŕ cĵican: “Ultim Yoozza ŕoňiŕ paataqui, korquiztan, paazquiztan, mazquiztan, jalla niŕta ŕoňiŕ paataqui”.

³⁰ Tuqui timpuqui ŕoňinacaqui Yooz puntuquiztan ana zumpacha zizziĉha. Jalla nuŕ cĵen Yoozqui ŕoňinacŕ uj awantichiĉha. Anziqui tjapa tii jazta ŕoňinacŕquiz mantichiĉha, tuŕ cĵican: “Persun uj pajŕcu, kuzza campiya”.

³¹ Nekztanaqui Yoozqui tsĵii tjuňi utchiĉha, tjapa tii muntuquiz ŕejlňi ŕoňinaca werara pjalzjapa. Tsĵii Yooziŕ illzta ŕoňiqui tjapa ŕoňinaca pjalaquiĉha, Yooz Ejpŕ cuntiquiztan. Yoozqui nii illzta ŕoňi ticziquiztan jacatatskatchiĉha. Jalla niŕtiquiztan Yoozqui kĵanapacha tjeziĉha, nii ŕoňiqui illztataĉha pjalňijapa, jalla nii. Jaziqui niŕŕquin criya. –Nuŕ paljaychiĉha Pabluqui.

³² Jalla nii ticziquiztan jacatatchi quintu nonŕcu, yekjapanacaqui tjassiĉha. Yekjapanacazti cĵichiĉha:

–Tii jarquin tii amiŕ chiita puntuquiztan wilta nonznaĉhani.

³³ Jalla nekztanaqui Pabluqui ninacŕquiztan oĵkchiĉha.

³⁴ Yekjapanacazti Pabluŕquiz apziĉha, niŕŕ taku criŕcu. Ninacŕquiztan tinaca ŕelatĉha: Dionisiotaĉha tsĵiiqui, niŕzaza niiqui Areópago cĵita t'akquiztantaĉha. Niŕzaza Dámaris cĵiti tsĵaa maatak ŕonqui criichintaĉha. Niŕzaza tsĵii kĵaŕ iya ŕoňinacaqui criichiĉha.

18

PABLUZ KAMTA CORINTO CJITA WAJTQUIN

¹ Wiruñaqui Pabluqui Atenas wajtquiztan ulanchičha. Corinto cjita watja ojkchiča.

² Jalla nicju tsjii judío zoñžtan zalchiča. Nii zoñiqui Aquila cjitatača. Ponto yokquiztan tjonchitača. Niiž tuquiqui Claudio cjita chawc jiliriqiu mantichiča tjapa judío zoñinaca Roma wajtquiztan ulnajo. Jalla nižtiquiztan Aquilaqui Italia yokquiztan ulanspantača, niž tjunatanpacha, Priscila cjiti. Ninacžquin Pabluqui tjonzñi ojkchiča.

³ Pablužtan ninacžtan tsjii oficiuchiztača, tultu kjuya paañitača. Jalla nižtiquiztan Pabluqui ninacžtan kamchiča junto nii tultu kjuya langzjapa.

⁴ Zapa jeejz tjuñquiz Pabluqui judionacž acjz kjuya ojkñitača. Jalla nicju judionacžquiz Yooz taku paljayñitača, nižaza ana judío zoñinacžquizimi. Zuma razunchiz tawkžtan paljaychipanča ninacaž zumpacha intintazñi cjisnajo.

⁵ Nekztan Silžtan Timoteožtan Macedonia yokquiztan irantižquichiča. Nekztanaqui Pabluqui Yooz takupanž paljayatča. Yekja langzñijapa timpu ana želatča. Nižaza Pabluqui judío zoñinacžquiz kjanacama intintiskatchičha, Jesusaqui ninacaž tjewžta Cristučha, jalla nii.

⁶ Nii judío zoñinacazti quintra cjissičha Pablužjapa. Nižaza niiž quintra anawalinaca chiichiča. Jalla nižta niiž quintra chiitiquiztan

Pabluqui niž zquti tsajttsajtsinchiča, ninacž quintra tsjii siñala cjeyajo. Nižaza cjichiča:

—Ančhucqui infiernuquinž tjojttaž cjequiča, liwriiñi Yooz taku ana nonzinčucča, nekztan. Jalla nuž castictaž cjen, ana wejtquiz uj tjojt-nasača. Ančhucqui kuzinpan Yooz taku ana criiz pecča. Tonjtan nawjccchuc wejrqui yekja wajtchiz zoñinacžquin okača, ninacžquin liwriiñi Yooz taku paljayžcača.

⁷ Nekztanaqui nii ajcz kjuyquiztan ulanžcu tsjii Justo cjita zoñž kjuya ojkchiča. Nii zoñiqui Yooz sirwiñitača, nižaza ajcz kjuy latuquiz kjuychiztača. Jalla nekz žejlñitača.

⁸ Nii ajcz kjuy jiliriQUI Crispo cjitatača. NiiQUI niž familianacžtanpacha Jesucristužquin criichiča. Nižaza walja Corinto wajtchiz zoñinacaqui Yooz taku nonžcu criichiča. Nekztanaqui bautista cjissiča.

⁹ Jalla nekztanaqui tsjii ween Yooz JiliriQUI Pablo chjuuzkatchiča. Nii chjuužtiquiztan YoozQUI Pablužquiz cjichiča:

—Ana eksna amqui. Tirapan Yooz taku parla. Yooz taku paljayñi langzquiztan ana jayta.

¹⁰ Wejrqui amtan chicapachača. Anaž jakzil-tami amquiz tani atasača, ana wali paazjapaqui. Nižaza tii chawc wajtquiz muzpa zoñinacaqui wejtquin criyaquiča.

¹¹ Jalla nuž chjuuzcu Pabluqui nii Corinto wajtquiz tsjii wata tirschiz kamchiča, Yooz taku tjaajincan.

¹² Jalla niž wiruñ judío zoñinacaqui Pabluž quintra tsjii kuzziz ajczyča. Nekztanaqui Pablo

tanžcu, chawc jilirž yujcquin chjitchiĉha. Gali3n cjitataĉha nii Acay yok jiliriĉui.

¹³ Jalla nuŹ chjichcu, nii chawc jilirŹquiz cjichiĉha:

—Tii Źoñiĉui uĉhumnaca lii quintraŹ ojklayĉha. Tiiĉui ŹoñinacŹquiz ana wal tawkŹtan intintiskatĉha, niŹ Yooz sirwizjapa. Pero niŹ Yooz sirwizĉui uĉhumnaca lii quintraĉha.

¹⁴ PabluŹ chiyawc cjen Gali3n cjita jiliriĉui judionacŹquiz paljayĉiĉha, tuŹ cjican:

—Judio Źoñinaca, tii Źoñiĉui ana wejtnaca lii quintra paachiĉha. NiŹaza ana chawc uj paachiĉha. Tsjii anawali paatasatĉha, nekztan anĉucaŹ quiĉta razuna nonŹtasaĉha.

¹⁵ Tii asuntuĉui anĉuca takucamakazla; niŹaza ŹoñŹ tjuu puntuquiztan parlakazla; niŹaza anĉuca liiquiztankazla. Jaziĉui anĉucporaf parlasa; niŹaza anĉucporaf kjaŹmi arreglasa. Wejrĉui anal tii anĉuca lii puntuquiztan arreglis Źeluĉha.

¹⁶ Jalla nekztanaĉui nii jiliriĉui nii Źoñinaca tjirkatchiĉha niŹ oficinquiztan.

¹⁷ Nii ajcz kjuya jiliriĉui S3stenes cjitataĉha. Jalla niiĉha quiĉĉui. Jalla nuŹ nii jilirŹ tjirkatiquiztan, tjapa nii wajtchiz Źoñinacaĉui nii quiĉni ŹoñŹtan kichi tansiĉha, jalla nekzpacha, nii jilirŹ yujcquizpacha. Nii Gali3n cjita jilirizti nuŹ kich-jasanami ana importĉiĉha.

PABLUQUI ANTIOQUIA QUEJPCHICHA

¹⁸ Nekztanaĉui Pabluĉui iyapan kamĉiĉha. Nekztan nii criichi jilanacŹquiz “Okuĉha” cjican ulanchiĉha. Nekztanaĉui tsjii warcu

zali ojkchiĉha, Siria yoka ojkzjapa. Priscilatan Aquilžtan chica ojkchiĉha. Cencrea cjita wajtquiz, ima warcuquiz luzcan, Pabluqui niŕ ach chara k'ala murchiĉha, tsjii compromitta cuzturumpi cumplisjapa.

¹⁹ Nekztanaqui warcuquiz ojkžcu, Efeso cjita watja irantichiĉha. Jalla nicju Pabluqui Priscilatan Aquilžtan, jalla ninaca ecchiĉha. Nekztan Pabluqui judionacž ajcz kjuya ojkchiĉha. Jalla nicju nii ajczñi judionacžtan parlichĉha.

²⁰ Nekztanaqui nii judionacaqui Pablo roct'ichiĉha, iya tsjii kjaž majžtan kamt'ajo. Pabluzti ana munchiĉha.

²¹ Jalla nekztan ima ninacžquiztan ojkcan, Pabluqui cjichiĉha:

—Jerusalén watja irantistanĉha, pjiŕsta paazjapa. Pero Yooz munanaqui wejrqui quejpžcaĉha anĉhucatan wilta zali.

Jalla nuž chiižcu, warcuquiz luzziĉha. Nekztanaqui Efeso wajtquiztan ojkchiĉha.

²² Nekztanaqui Cesarea cjita watja irantižcu, Pabluqui warcuquiztan ulanchiĉha. Jalla nuž ulanžcu Jerusalén watja ojkchiĉha, criichi jilanacžquin zalzjapa. Nekztan Antioquía wajt kjutñi ojkchiĉha.

²³ Jalla nekz tsjii kjaž tjuñi kamžcu, wilta ojkchiĉha. Galacia nižaza Frigia yokanacaran ojklaychiĉha. Jalla niiran iclizquiztan icliza ojklaychiĉha, criichi jilanaca tjurt'iñi kuzziz cjiskatzjapa.

APOLOS CJITA YOOZ TAKU PALJAYÑI

24 Jalla nii timpuqui tsjii judío žoñiqui Efeso cjita watja irantichiča. Apolos cjita tjuuchiztača. Niiqui Alejandría pajk wajtchiz žoñitača. Nižaza niiqui Yooz taku walja zuma paljayñitača. Nižaza cijjrta Yooz taku zumaž zizatča.

25 Nii Apoložquiz Yooz kamañ puntu walja tjaa-jintatača. Jaziqi walja tjapa kuztan Yooz taku parliñitača. Juanž bautistakaz cjenami Jesu-cristuž puntuquiztan walja kjana tjaajinchiča.

26 Nekztanaqui Efeso wajtquiz žejlcan, Apolosqui ajcz kjuyquiz tjurt'iñi kuzziz tsijtsiča, Yooz taku paljayzjapa. Niiž paljayta taku nonžcu, Priscilatan Aquilžtan jalla ninacaqui tsjii latu Apolos chjitchiča, Yooz kamaña puntu tsjan kjana tjaajinzjapa.

27 Jalla nekztanaqui Apoložquiz Acaya cjita yokaran ojklaz pecatča. Jalla nuž cjen jilanacaqui walja apoychiča, nižaza tsjii carta credencial apaychiča nii yokquin žejlñi jilanacžquiz, ninaca zuma risiwajo. Nii yokchiz jilanacaqui Yooz okzñiž cjen criičiča. Acaya irantiscuqui Apolosqui nii criichi jilanacžquiz zuma tjaajinchiča.

28 Nižaza zuma razunquiztan chiican, tjapa žoñinacž yujcquiz nii quintra judionacž pinsitanaca tjeeziča, anapan zumaž ninacž razunaqui. Ninaca atipchiča. Nii quintra judío žoñinacaqui ana kjaž cji atchiča. Cijjrta Yooz tawk jaru intintiskatchiča, Jesusaqui ninacaž tjewzta Cristuča, nižaza Yoozquiztan cuchanžquita Cristuča, jalla nii.

19

PABLUZ KAMTA EFESO CJITA WAJTQUIN

¹ Acayquiztan quejpžcu, Apolosqui Corinto wajtquiz želatčha. Pabluzti curunac yoka watžcu, Efeso watja irantichičha. Jalla nicju tsjii kjaž Yoozquin criichi žoñinacžtan zalchičha.

² Jalla nuž zalžcu, Pabluqui pewczičha, tuž cjican:

—¿Ančhuc criiz oraqui Espíritu Santuqui ančhuca kuzquiz luzzikay?

Ninacaqui kjaazičha, tuž cjican:

—Anaž. Nii Espíritu Santo puntuquiztan anawira nonzinčha.

³ Jalla nižtiquiztanaqui Pabluqui pewczičha, tuž cjican:

—Ančhucqui, ¿čhjul bautismo tanzinčhuctaya?

Ninacaqui kjaazičha:

—Juanž bautismo tanzinčha —cjican.

⁴ Nekztanaqui Pabluqui cjichičha:

—Walikazza. Juanqui kuz campiiñi žoñinacžquiz bautisñitačha. Pero nii Juanž wirquin tsjiiqui tjonchičha. Jalla niičha Jesusaqui. Niiqui Yooz Ejpžquiztan cuchanžquita Cristučha. Jalla niižquin criiz waquizičha. Jalla nižtazakaz Juanqui žoñinacžquiz chiižñitačha.

⁵ Jalla nii taku catokžcu, nii žoñinacaqui Jesu-cristo Jilirž tjuuquiz bautistatačha.

⁶ Nekztanaqui Pabluqui ninacž juntun kjaržtan lanchičha. Jalla nuž lanznan Espíritu Santuqui tjonchičha. Jalla nižtiquiztan yekja takunacžtan parli kallantichičha. Nižaza Yooziž zizkatta puntunaca parlichičha.

⁷ Jalla ninacaqui tsjii tuncapan žoñinacatakalčha.

⁸ Chjep jiiz Pabluqui jalla nicju kamchiča. Jalla nuž kamcan ajcz kjuya ojkñipantača. Nii ajcz kjuyquin zuma tjurt'iñi kuzziz paljayñipantača, Yooz mantita kamañ puntuquiztan intintiskatcan.

⁹ Yekjap žoñinacazti wira ana criichipanča. Ninacaqui chojru kuzziz cjissiča. Yooz kamañ quintra parlichiča. Jalla nižtiquiztan Pabluqui ninaczquiztan zarakchiča. Nižaza criichi žoñinaca chjitchiča tsjii escuel kjuyquin. Nii escuelchiz žoñiqui Tiranno cjita tjuuchiztača. Jalla nicju Pabluqui tjaajinchiča zapuru.

¹⁰ Jalla nuž tjaajincanaqui pizc wata kamchiča. Jalla nižtiquiztan tjapa nii Asia provincia yokquin kamñinacaqui Jesusa Jilirž liwriiñi quintu nonchiča. Judío žoñinacami, nižaza ana judío žoñinacami nii quintu nonchiča.

¹¹ Nižaza Yooz aztan Pabluqui wali pajk milajrunaca paachiča.

¹² Jalla nižtiquiztan žoñinacaqui pañumi zquitimi Pablužquiz lanskatchiča. Jalla nuž lanskatzcu, nii pañumi zquitimi chjitchiča, laa žoñinaczquin. Jalla nižtiquiztan nii laanacaqui chjetintatača, nižaza nii žoñinaca tanñi zajranacami ulanskatchiča.

¹³ Tsjii kjaž judío žoñinacaqui ojklayatča, zajranaca chjatkatcan. Jalla nuž chjatkatcan, nii žoñinacaqui Jesusa Jilirž tjuužtan ojklayz pecatča. Nekztanaqui zajranaczquiz cjichiča:

—Zajranaca, ančhuc ulnaj cjiwča, Pabluž parlita Jesús tjuuquiz.

¹⁴ Jalla nižta paachiča pakallawk judío jilazullacaqui. Ninacz ejpqui Esceva cjita tjuuchiztača. Niiqui judiuž timplu chawc jiliritatča.

15 Nii pakallawkw jilazullca nižta paan, tsjii žoñi tanñi zajraqui ninacžquiz cjichiča:

—Jesús pajuča. Nižaza Pablo pajuča. Ančhucqui žjectčhuctajo?

16 Jalla nižtiquiztan nii zajra tanta žoñiqui tsjii layžcu ninacžquiz tanziča, kijchjapa. Nii zajraž tanta žoñiqui walja azziztača. Jalla nii aztan ninaca atipchiča. Nižaza k'alapacha čhjojritchipanča. Nižtami chjojrichta ana zquitichiz atipassiča nii pakallawkw žoñinacaqui.

17 Jalla nekztanaqui tjapa nii Efeso wajtchiz žejlñi žoñinacaqui nii quintu zizziča, judionacami, ana judionacami. Jalla nekztan walja eksnatča. Nižaza Jesucristo Jilirž tjuu walja alawazziča.

18 Nižaza walja criichi žoñinacaqui ninacaž tuquita persun uj paatanaca pajžcu, kjanacama mazziča.

19 Nižaza yekjap žoñinacaqui ima Yoozquin crican, laykican ojklayñitača. Jalla ninacaqui ninacž layka ojklayz liwrunaca zjicchiča. Nekztan k'ala nii liwrunaca ujkatchiča tjapa žoñinacaž cheran. Pjijska tunc waranka pajk ultimu paaz, nuž valorchiztača nii liwrunacaqui.

20 Jalla nekztan nii criichi žoñinacaqui tjapa kjutñi Yooz taku paljayi ojklaychiča. Nekztan tsjan tsjan žoñinacaqui Yooz taku catokchiča.

21 Jalla niž wiruñ Pabluqui niž kuzquiz Macedonia nižaza Acaya yokanacquin tjonzpanž tantiichiča. Jalla nuž wattan Jerusalén watja iran-tispanž tantiichiča. Nižaza Pabluqui cjichiča:

—Jerusalén watja ojkžcuqui, wejtlaqui Roma watja irantistanča.

²² Jalla nižtiquiztanaqui Pabluqui pucultan yanapñinaca cuchanchičha Macedonia. Nii pucultanaqui Timoteotača, nižaza tsjiiqui Erastotača. Pabluzti tsjii kjaž majjapa eclichiča Asia yokquin.

ZOÑINACA APTJAPZTA EFESO WAJTQUIN

²³ Jalla nii timpuqui walja žoñinaca aptjapziča, Yooz kamañ jicz puntuquiztan paljaytaž cjen.

²⁴ Nii aptjapñi achaqui Demetrio cjitatača. Jalla niiqui paazquiztan yooznaca paañitača. Jalla nuž paatiquiztan walja paaz canchiča, nižaza parti nižta paañinacaqui. Diana cjiti žoñiž paata yooz timplu irata jalla nii paachiča ninacaqui.

²⁵ Nekztan Demetrio cjita žoñiiqui tjapa nii yooznaca paañi žoñinaca juntichiča, nižaza niž langzñi mazinaca juntichizakazza. Nekztanaqui tuž cjichiča:

—Jilanaca, ančhucqui zizza. Tii oficiuquiz langzcan, zuma paaz canča učumnacaqui, zuma kamzjapa.

²⁶ Tii Pabluqui ojklayča, “Žoñiž paata yooznacaqui anača ultim yoozqui”, cjican. Jalla nuž chiyan, walja žoñinacaqui niž taku criičha, tii Efeso wajtquinami, nižaza tjapa tii Asia provinca yokquinami. Niiž taku criižcu, učum yooznacquiztan zarakchiča. Jalla nii quintu nonchinčhucča, nižaza cherchinčhucča.

²⁷ Jalla nižtiquiztan tii učum langznacaqui anat cusa cjisnačhani. Nižaza učumž cansmi pertisnačhani. Anziqiu tjapa tii Asia provinca yokquin žejlñi žoñinacami nižaza tjapa tii

muntuquiz žejlñi žoñinacami naa yooz siñuri sir-wiñicha. Pero Pabluž cjen, Diana cjiti pajk yooz siñuri timplumi ana rispittat cječhani.

²⁸ Jalla nuž Demetriuž chiita taku nonžcu, walja žawjchi cjissiča. Jalla nuž žawjžcu, kjawchiča tuž cjican:

—¡Viva Diana yooz siñura! ¡Viva tii Efeso wajtchiz yooz! —nuž cjican kjawchiča.

²⁹ Nekztan tjapa nii wajtchiz žoñinacž kuz turwayskatchiča. Nižtiquiztan nii wajtchiz žoñinacaqui Gayžtan Aristarcužtan, jalla ninaca kichi tanziča. Nii pucultanaqui Macedonia yokquiztan Pablužtan chica ojkchitača. Jalla nii pucultan tanžcu, pajk parliz kjuya chjitchiča.

³⁰ Nižaza Pabluqui nii kjuya luz pecatča, žoñinacžquiz paljayzjapa. Criichi žoñinacazti Pablo atajchiča, ana luzkatajo.

³¹ Nižaza yekjap Asia jilirinaca želatča, Pabluž amigonacatakalča. Jalla ninacaqui tsjii žoñi cuchanžquichiča Pablužquin rocžinajo, nii parliz kjuyquiz ana luzajo.

³² Tampachquiztan juntazcu žoñinacaqui kjawchiča tjapaman razunanaca chiican. Aptjapziž cjen nekztan nižta kjawchiča žoñinacaqui. Ancha pajk ch'awjwa paatča. Jila manka žoñinacaqui čjul puntu ajcztažlaja ana zizziča.

³³ Yekjap žoñinacaqui nii ajczta puntu zumpacha intintiskatchiča Alejandružquiz. Nekztan ni-iqui tucquin tsijskatchiča, nii judionacžquiztan tjurt'ižinajo. Nekztanaqui Alejandruqui kjara waytižcu ch'uj cjeej cjichiča. Nekztanaqui niiqui

tjapa žoñinacž yujcquiz tjurt'iziñž tawkžtan chiiz pecatča.

³⁴ Parti žoñinacazti Alejandro judío žoñi cjican zizcu, wilta kjawchiča tsjii pizc ora. Tsjii joržtan tuž cjican:

—¡Viva Diana yooz siñura! ¡Viva tii Efeso wajtchiz yooz!

³⁵ Jalla nekztanaqui nii wajt secretariuqui žoñinaca ch'uj cjiskatžcu, paljaychiča tuž cjican:

—Efeso jilanaca, tii pajk yooz Diana siñura timplu tii Efeso wajtchiz žoñinacžquiz cumpjiitača. Nižaza arajpachquiztan tjojtžquichinča taa yooz siñuriqui. Tsjii maz cheechi tjonžquichinča.

³⁶ Jalla nii puntuquiztanaqui anaž jecmi nicasača. Jaziqui ch'ujča cjee. Ima zuma tantiyazcan anača čjulumi paa.

³⁷ Tii ančuca zjijcta žoñinacaqui ana čjulumi chiichiča naa Diana siñurijapaqui, anazaž naa quintra čjulumi paachiča.

³⁸ Demetriužtan niiž langžni mazinacžtan quijz pecčhaj niiqui, nijapa juez jilirinaca žejlča. Nii jilirinacžquinkaz ojkla, nii quija arreglisjapaqui.

³⁹ Tsjii yekja puntu parliz pecčhaj niiqui, zumpachaž ajczcuž parla.

⁴⁰ Tii aptjapzi puntuquiztan učhum chiiz razunanacaqui ana žejlča. Jaziqui učhum gobiernuqui učhumnac quintra uj tjojtNASAča, tii nooj aptjapztiquiztan.

⁴¹ Tii parlaqui žeržta cjila, —nuž cjichiča nii secretariuqui.

Nekztanaqui žoñinaca liwj cuchanchiča, persun kjuya okajo.

20

PABLUZ OJKTA MACEDONIA NIZAZA GRECIA

¹ Jalla nekztanaqui nii aptjapzta žoñinacaž ojktan, Pabluqui criichi žoñinaca kjawziča, ninacžquiz tjaajinzjapa. Nekztanaqui Pabluqui “Okaz” cjichiča, Macedonia yoka ojkzjapa.

² Jalla nii yokquin ojklaycan, criichi jilanacžquin zuma tawkžtan ancha p'ekinchaychiča, tjurt'iñi kuzziz cjeyajo. Nekztanaqui Grecia yoka irantichiča.

³ Jalla nicju čhjep jiiz žejlchiča. Nekztan warcu zalz pecatča, Siria yoka ojkzjapa. Warcu tanawc cjen, Pabluqui quintu zizziča, judionacaqui niž quintra parlassitaquiča, jalla nii. Jalla nižtiquiztan niž warcuquiz ojkz cjitaqui nužquiz tijsiča. Yokaranpacha ojkchiča. Nekztan Macedonia yoka irantichiča.

⁴ Nižaza Pablužtan chica ojkchiqui tinacatača: Sopatertača (niiqui Berea wajtchiztača), nižaza Aristarcutača, nižaza Segundutača (niiqui Tesalónica wajtchiztača), nižaza Gayutača (niiqui Derbe wajtchiztača), nižaza Timoteotača, nižaza Tiquicutača, nižaza Trofimutača. (Jalla Tiquicužtan Trofimužtan Asia provinciiztantača).

⁵ Jalla nii jilanacaqui wejtnaca tuqui okjaychiča. Jalla nuž okjayžcu Troas cjita wajtquin wejrnac tjewziča.

⁶ Wejrnacqui ana liwaturchiz t'anta lujlz pji-jsta paztan, Filipo cjita wajtquiztan zarakchinča tsjii warcuquiz. Tsjii pjijska tjuñquiztan Troas

watja irantichinča. Jalla nicju kamchinča tsjii simana.

PABLUZ KAMTA TROAS WAJTQUIN

⁷ Dominguqui wejrnacqui ajczinča, Santa Cena paazjapa. Jalla nuž ajczcu Pabluqui tjaajinchiča criichi jilanaczquiz. Jaka tažu zarakz cjen, chica aramacama tjaajinchiča.

⁸ Wejrnacqui tsewcta pisuquin ajczintača tsjii kjyquiz. Kjanzjapa wacchi michanaca tjeestatača.

⁹ Nižaza Eutico cjita tjowa ventanquiz julzi želatča. Pabluž ažkapacha chiyan, nii tjowaqui ancha tjaji tjonkatchiča. Nekztan nii ventanquiztan kossuc tjojtsiča, čhjep pisu kjyquiztan. Ticzi waytitatača nii tjowaqui.

¹⁰ Nekztanaqui Pabluqui chjijwžquichiča. Nii tjowžuntuñ chutjatžcu žcojrziča. Nekztanaqui parti jilanaczquin cjichiča:

—Anača tsucaquiča. Zejtča tiiqui.

¹¹ Jalla nekztanaqui Pabluqui wilta yawchiča tsewcta pisuquin. Nekztan Santa Cena paachiča. Jalla nuž paažcu, Pabluqui tirapan parličiča kjantatscama. Nekztan ojkchiča.

¹² Partinacazti zuma kuzta eclichiča. Nii tjowa vivož cjen, cuntintu nii tjowa chjitchiča.

¹³ Nekztanaqui wejrnacqui warcuquiz okjaychinča Asón yokacama. Pabluži kjojčuñ ojkz pecatča. Asón wajtquiztan Pablo zakaz warcuquiz ojkz tantiichiča. Jalla nuž cjican kaztatača.

¹⁴ Nekztanaqui Asón wajtquin Pablužtan zalzinča. Nekztanaqui Pabluqui wejtnacatan chica

warcuquiz luzziča. Nekztanaqui Mitilene kjutñi ojkchinča.

¹⁵ Mitilenequiztan ojkcan, jaka tažuqui Quío latuquin watchinča. Kat tažuqui Samos cjita watja irantichinča. Nekztanaqui Trogilio cjita wajtquin jeejsassinča. Niiž jaka tažuqui Mileto cjita watja irantichinča.

¹⁶ Jalla nuž ojkchinča, Asia yokquin ana wacchi tjuñi žejljapa. Efeso wajtquin ana ojkz pecatča. Antiz Jerusalén watja apura ojkz pecatča Pabluqui. Jalla nicju irantis pecatča ima Pentecostés tjuñi tjonan. Jaknužquiztanami irantisquizpanž pecatča.

EFESO ICLIZ JILIRINACZQUIN CHIIZINTA

¹⁷ Mileto wajtquiz žejlcan, Pabluqui Efeso icliz jilirinaca kjawžquiñi cuchanchiča.

¹⁸ Jalla nii jilirinacaž tjontan, Pabluqui ninačquiz tuž chiižinchiča:

—Weriž Asia yokquiz tjontan, nii tjuñquiztanpacha jaknužt ančucatan chica kamtučhaja, jalla nii ančucqui zizza.

¹⁹ Jalla nuž ančucatan kamcan, humilde kuzziz Yooz Jiliržquiz sirwichinča. Nižaza criichi žoñinacžquiztan wejt kuzquiz sint'itiquiztan anča kaachinča, nižaza anča pruebanacami sufrichinča.

²⁰ Tsjan zuma kamañchiz cjisjapa ančucaquiz tjapa zumanaca tjaajinčinča, tjup kuzziz. Plazquinami callquinami tjaajinčinča, nižaza ančuca persun kjuyquiztan kjuya tjaajinčinča.

21 Nižaza judionacžquizimi ana judionacžquizimi paljaychinča wejrqui, tuž cjican: “Ančhucqui persun uj pajžcu, kuznaca campiya. Jesucristo Jiliržquin tjapa kuztan criya”.

22 Anziqui wejrqui Jerusalén watjal okača. Espíritu Santuž mantital okača. Jalla nicju čhjulut watačaja, anal zizuča.

23 Jalla tii puntukal zizuča. Tjapa watjaran weriž ojklayan Espíritu Santuqui wejtquiz chichiča, tuž cjican: “Amqui carsilquiz chawctam cjequiča. Nižaza ancham sufraquiča”.

24 Pero nii mazintiquiztanaqui wejr anal turwasnuča. Tii muntuquiz žejtjapa anaž importiča wejrqui. Wejt wiraqui anaž chekanaqui. Jesucristo Jiliriž tjaata apóstol cargo, jalla nii cumplistanča chekanaqui. Yooziž tjaata kamañ jaru ojklayz pecuča, ticzcama. Liwriiñi Yooz taku parliz pecuča, Yooz zuma okžniča cjican.

25 “Yooz mantuquiz kamz puntuquiztan ančucaquiz mazzinča. Anziqui ančhucqui wejtta anaž iya zalaquiča tekztan nawjcchuc.

26 Jalla nižtiquiztan ančucaquiz chiyuča, tuž cjican: Anaž jecmi ančucaquiztan wejtquin uj tjojtNASAča, tuž cjican:

27 “Pabluqui anaž tjapa Yooziž tjaata taku tjaa-jinchiča” cjicanaqui. Wejrqui tjapa Yooziž tjaata takunaca ančucaquiz mazzinča.

28 Jalla nižtiquiztanaqui ančhucqui persunpachquiz cwitaza, nižaza parti ančuca iclizziz jilanaca cwitaquiča ančhucqui. Espíritu Santuqui ančhuc jilirižtakaz utchiča Yoozquin criichinaca cwitajo, nižaza Yooz tawk čhjeri tjajajo. Nii criichi jilanacž laycu Jesucristo Yoozqui

niiž persun ljoc tawkchiča, cruzquiz ch'awczcu. Jaziqui criichi žoñinacača Jesucristužtaqui.

²⁹ Tsjii zakal zizuča. Weriž ojktan, yekja žoñinacaqui ančhucaquin tjonaquiča ančhuc wichanzjapa, nižaza ančuca icliza akskatzjapa. Ninacaqui uuzi tanñi kitižtakaz luzcaquiča.

³⁰ Nižaza ančhucaquiztan toscara chiiñinaca želaquiča tsjii kjutñi criichi jilanaca chjitzjapa toscar tawkžtan.

³¹ Jaziqui ančhucqui zumpacha cwitaza. Wejrqui čhjep wata intiru majiñami weenami zapa mayni ančhucaquiz tjaajinchinča. Nižaza ančhucaquiz chiichiižincan, ancha kaachinča.

³² Jaziqui jilanaca, ančhucqui Yoozquin cumpjiyuča. Nižaza Yooz zuma taku zumpachaž catoka. Jalla nuž cjen ančhucqui tjurt'iñi kuzziz cjequiča. Nekztan Yoozquiztan irinsa tanznaquiča tjapa Yooziž t'akžta žoñinacžtan.

³³ Wejrpachača paazmi zquitimi anapan pecchintqui jeczquiztanami.

³⁴ Antiz wejrtča persun kjaržtan langziñtqui, čhjulut pecatučhaja, jalla niijapa, nižaza wejtan chica ojklayñi žoñinacžjapami. Jalla nii puntuquiztanaqui ančhucqui zumpachaž zizza.

³⁵ Jalla nužupan ančhucqui langz waquiziča, t'akjir žoñinacžquiz yanapzjapa. Jalla nuž kjana tjeezinča persuna langzcan. Nižaza Jesús Jilirž chiita taku cjuñzna. Jalla tuž cjiča nii chiitaqui: “Onanñi žoñinacaqui juc'ant cuntintuča tanzñi žoñinacžquiztanaqui”.

³⁶ Jalla nuž chiižcu, Pabluqui quillziča, tjapa nii žejlñi hermanonacžtan, Yoozquin mayizizjapa.

³⁷ Jalla nekztanaqui tjapa nii jilanacaqui kaachiča Pabluž ojkz cjen. Pablo žcojrziča, nižaza chjulziča.

³⁸ Pabluqui cjichiča:

—Wejrqui okača, jaziqui anaž iya wejr cher-aquiča. —Jalla nižtiquiztan nii jilanacaqui ancha llaquita cjissiča.

Jalla nekztanaqui warcu luzcama chica ojkchiča.

21

PABLUQUI JERUSALEN WATJA OJKCHICHA

¹ Jilanaca eccu, warcuquiz luzzinča. Nekztan Cos cjita yok tirichuc ojkchinča. Jaka tažuqui Rodas cjita yokquin ojkchinča. Jalla niwjctan Pátara cjita watja ojkchinča.

² Jalla nii Pátara wajtquiztan tsjii Fenicia kjutñi ojkñi warcu zalchinča. Nekztan nii warcuquiz luzcu ojkchinča.

³ Jalla nuž ojkcan Chipre cjita yoka ažkquin cherchinča. Chipre yokaqui zkar latuquintača. Tira ojkchinča Siria yoka irantizcama. Tiro cjita wajtquiz kuzi ecz želan, nekztan Tiro watja luzziča.

⁴ Jalla nicju criichi jilanaca kjurchinča, zalañcama. Nekztanaqui ninacžtan kamchinča tsjii simana. Ninacaqui Espíritu Santuž cjen chikatchiča Pablužquiz, tuž cjan:

—Amqui anatača ojkzqui Jerusalén watja.

⁵ Simanaž wattan, Tiro wajtquiztan ulanchinča. Nižaza tjapa nii wajtchiz criichi žoñinacaqui maatakanacžtanami ocjalanacžtanami wejtnacaquiz cumpant'ichiča

wajtž tjiya. Jalla nicju tsjii k'ara želatča, kot atquin. Nii k'arquiz quillžcu Yoozquin mayizassinča.

⁶ Nekztanaqui zumpacha kjara tansascu, jaljtassinča “Kjažllami okall” cjican. Nekztanaqui wejrnacqui warcuquiz luzzinča. Ninacazti kjuya quejpchiča.

⁷ Nekztanaqui Tiro wajtquiztan zarakchinča, Tolemada cjita watja irantiscama. Jalla nicju criichi jilanacžquin tsaani ojkchinča. Jalla nekztanaqui tsjii nooj kamchinča nii jilanacžtan.

⁸ Niiž jaka tažuqui Pablužtan wejtnacatan ulanchinča. Nekztan Cesarea cjita watja irantichinča. Jalla nii wajtquiz irantižcu Filipž kjuya ojkchinča. Jalla niitača liwriiņi Yooz taku parliņiqui jalla nii oficiuchiztača. Niiž tuqui Jerusalenquin pakallawk jilanaca illztatača, Yooztajapa langzjapa. Tsjiiqui nii Felipitača. Jalla niiž kjuyquin kamchinča.

⁹ Nii Felipiqui pajkpaltan ana zalzi tjunmatanacchiztača. Nižaza ninacaqui Yoozquiztan zizta taku parliņi profetanacatača.

¹⁰ Jalla ninacž kjuyquin tsjii kjaž maj kamžcu, tsjii Agabo cjita žoņiqui tjonchiča Judea cjita yokquiztan. Nii žoņiqui Yooz taku parliņi profetatača.

¹¹ Jalla nii žoņiqui wejrnac tjonzņi tjonchiča. Nekztanaqui Pabluž jweranta kojch aptichiča. Nii kojchtan persun kjojcha kjara jwersiča tuž cjican:

—Espíritu Santuqui tuž cjiča: “Jalla nižtapacha Jerusalén wajtquin judío žoņinacaqui tii kojch tuyņi

žoňi jwernaquiča. Jalla nuž jweržcu, yekja wajtchiz žoňinacžquiz intirjaquiča”. —Nuž cjichiča Agabo cjita profetaqui.

¹² Jalla nuž nonžcu, wejrnacmi nižaza nii Cesarea wajtchiz criichinacami tjappacha Pablužquiz rocassinča ana Jerusalén watja okajo.

¹³ Pabluzti kjaaziča, tuž cjican:

—¿Kjažtiquiztan ančhuc kaajo? ¿Kjažtiquiztan ančhuc wejr llaquizkatjo? Wejrqui Jesucristuž cjen listučha čejlta cjisjapami nižaza Jerusalén wajtquin ticzjapami.

¹⁴ Jaziqui wejtnaca razunžtan Pabluž taku ana atipi atchinča. Jalla nuž cjen ana tira chiichinča. Tiikazza cjichinča:

—Yooz Jilirž munañpaj cjila.

¹⁵ Jalla nekztanaqui ojkzjapa tjaczinča. Nekztan Jerusalén wajt kjutñi ojkchinča.

¹⁶ Nižaza yekjap Yoozquin criichi jilanacaqui wejtnacaquiz cumpant'ichiča. Tsjii ninacžquiztan Mnasón cjita žoňi želatča. Niiqui Chipre cjita wajtchiz žoňitača. Ažk wata Yoozquin criichipantača. Niiž kjuyquin alujazjapatača Jerusalén wajtquin.

PABLUQUI JACOBZQUIZ TJONZICHA

¹⁷ Jerusalén watja irantižcu, Yoozquin criichi jilanacaqui wejrnac ancha cuntintu risiw't'ichiča.

¹⁸ Niiž jaka tažu Pabluqui wejtnacatan Jacobžquin tjonzñi ojkchiča. Jalla nicju tjapa nii Jerusalén icliz jilirinacaqui želatča.

¹⁹ Pabluqui jilanacžquiz tsaanžcu, tjappacha niiž ojklayta quint'ichiča. Yoozqui Pablužquiz

wali pajk obranaca paakatchiĉha ana judío ŝoñinacž yokaran ojklayan. Jalla nii quint'ichiĉha Pabluqui.

²⁰ Jalla nii takunaca nonžcuqui, Yooz honora chiichiĉha. Nižaza Pablužquiz cjiĉiĉha:

—Jila, walikazza niiqui. Nižaza tekzi tsjii kjaž warank judionacaqui Jesucristužquin criichizakazza. Jalla nii zizzamĉha. Nižaza tjapa ninacaqui cjichipanĉha, “Moisés lii jaru ojkstanĉha” jalla nii.

²¹ Nižaza ninacaqui nonziĉha tii quintu: Amqui yekja yokquin kamñi judionacžquiz tjaajinñamĉha, “Moisés mantita lii ana cumplis waquiziĉha”, jalla nii. Nižaza ninacaqui am puntuquiztan tuž nonziĉha: Amqui “Lucmajch wawanaca ana chimputa cjis waquiziĉha”, cjican tjaajinñamĉha. Nižaza amqui “Uĉhum judío cuzturumpinac jaru ana paaz waquiziĉha” cjican tjaajinñamĉha. Jalla nuž am puntuquiztan nonziĉha tekz žejlñi hermanonacaqui.

²² Anziqui nii hermanonacaqui am tjonchi zizcu ajcznaquiĉha. Jaziqui, ¿jaknužum cjeequi?

²³ Amqui jalla tužum paaĉhaj. Tii Jerusalén wajtquiz pajkpaltan ŝoñinaca žejlĉha. Ninacaqui compromitta taku cumplistanĉha.

²⁴ Amtan chica ninaca chjiĉha. Nekztan ninacžtan chica am uĉhum cuzturumpi paa. Nižaza ninacž gasto pacna, ninaca persun ach chara k'ala murta cjisjapa. Jalla nižtiquiztan tjappacha intintiskataquiĉha, amqui uĉhumnaca cuzturumpi ana quintraĉha, jalla nii. Jalla nuž chiiĉiñinacaqui toscara cjitaž cjequiĉha. Ampachazakazim uĉhum lii jaru paaĉha. Jalla nuž intintaquiĉha tjappachaqui.

25 Nižaza wejrnacqui nacjuñta wajtchiz ana judío criichinacžquiz cjjrchinča, tuž cjican: “Zoñiž paata yoozquiz wilana jawkta chjizwi anača lujlsqui. Nižaza jora zkenzcu conta animal chjizwimi anača lujlsqui. Nižaza luctakžtanami maatakžtanami anača adulteriuquiz ojklayzqui”. –Jalla nuž Pablužquiz chiichiča nii icliz jilirinacaqui.

PABLUQUI PRESO TANTATACHA

26 Jalla nekztanaqui Pabluqui nii pajkpaltan zoñinaca chjitchiča. Niiž jaka tažuqui ninacžtan chica cuzturumpi paachiča. Nekztanaqui timpluquin luzziča čhjulatorat nii cuzturumpi paaz tjuñinaca žerznačhaja, jalla nii mazjapa. Nii cuzturumpi paaz tjuñinaca žerztan, Pabluqui persunjapami ninacžtajapami ofrenda tjaastanča. Nii puntu zakaz timpluquin mazñi luzziča.

27 Nii pakallawk cuzturumpi paaz tjuñinaca žeržmayatača. Jalla nii ora tsjii kjažt judionacaqui želatča Asia provinciquiztan tjonchi. Ninacaqui Pablo cherchiča timpluquiz žejlñi. Jalla nuž cheržcu, ninacaqui tjapa zoñinaca aptjapchiča Pabluž quintra. Nižaza Pablo tanzjapa jirchiča.

28 Nekztan kjawchiča tuž cjican:

–Israel wajtchiz zoñinaca. Yanapt'alla. Tiiča anawal zoñiqui. Tiiqui tjapa kjutñi ojklaycan, zoñinacžquiz tjajjiñča učum nación quintrami, nižaza Moisés lii quintrami, nižaza tii timplu quintrami. Nižaza anziqui tii timpluquiz ana judío zoñinaca chjitchiča. Jalla nižtiquiztan tii Yooz timplu quintraž pača. Učum alajakazza tii

arajpach Yooz timpluquiz luzpanqui. Ana judío zoñinacaqui ana luztanča. —Jalla nuž kjawchiča Pabluž quintra.

²⁹ Niiž tuquilla Pabluqui Trófimo cjita zoñžtan želatča. Trofimuqui Efeso wajtchiz zoñitača. Niiž pucultan chica cheržcu, nii judío zoñinacaqui tuž pinsatča, Pabluqui timpluquin nii Trófimo chjitchizłani, cjan. Jalla nižtiquiztan Pabluž quintra kjawchiča.

³⁰ Tjapa zoñinacaqui Pabluž quintra žawjchi tjo-jktichiča. Zati pariju tjonchiča timplu kjutni. Nekztanaqui Pablo tanchiča. Timplu kjuyltan tanžcu zawncchuc joochiča. Nekztanaqui nii timplu zanami chawjcziča.

³¹ Ninacaqui Pablo conzmayatača. Nekztan zoñinaca walja aptjapzi cjen, zultatž jiliržquin maztatača.

³² Jalla nii quintu zizcu, walja apura zultatunaca juntasiča ninacz sargentunacžtan. Nekztan zati pariju jirchiča jakziquin tama zoñinaca želatčaja, jalla nicju. Nekztanaqui zoñinacaqui nii zultatunaca sargentunacžtanpacha cherchiča. Nuž cheržcu Pablo kijtž cjen nužquiz apatatchiča.

³³ Jalla nekztanaqui nii zultatž jiliriQUI mac-jatžcu Pablo preso tanchiča. Nižaza mantichiča, pizc carinžtan chelajo. Nekztanaqui zoñinacžquiz pewcziča:

—¿Ject teejo? ¿Chjulu paachita tii zoñejo?

³⁴ Nii zoñinacazti tjapaman puntunaca chiican kjawchiča. Ancha altu joržtan arnan, nii zultatž jiliriQUI ana intintasi atatča. Jalla nižtiquiztan mantichiča, cuartilquin chjicha, cjan.

³⁵ Zultatž cuartil guardanacžquiz macjatžcan, zultatunacaqui Pablo waytižcu chjitchiča, ana nii žoñinacžquiz kijchkatzjapa.

³⁶ Niiž wirquiz tama žoñinacaqui apzquichiča, kjaw jawi:

—¡Ticzla tiiqui! ¡Panj ticzla! —cjican.

PABLUQUI PERSUNA TJURT'ICHICHA

³⁷ Nekztanaqui Pabluqui cuartilquiz makawc cjen zultatž jiliržquiz paljaychiča, tuž cjican:

—Wejrqui tsjii chiiz pecuča. ¿Wejr chiyasaya?

Nekztanaqui nii zultatž jiliriqui kjaaziča tuž cjican:

—¿Amqui griego taku chiiñam jaa?

³⁸ Jaziqui amqui anaž nii anawal egipt wajtchiz žoñimča. Niiqui ažk tjuñinaca gobiernuž quintra žoñinaca tjojtiskatchiča. Ch'ekti yokquin tsjii pajkpic warank guerrillero juntichiča gobierno niiž puestuquiztan chjatkatjapa. ¿Ana nii egipto žoñimya?

³⁹ Nekztanaqui Pabluqui kjaaziča, tuž cjican:

—Wejrqui judío žoñtča. Cilicia cjita yokquin Tarso cjita wajtquin nassinča wejrqui. Nii pajk wajtchiz žoñtča wejrqui. Jalla nižtiquiztan tii žoñinacžquiz paljayskatalla. —Nuž permiso may-chiča.

⁴⁰ Nekztanaqui zultatž jiliriqui permiso tjaachiča, žoñinacžquiz paljayajo. Nekztanaqui Pabluqui tsijtsiča nii gradanac juntuñ. Nižaza kjara waytižcu žoñinaca ch'ujquizkatchiča. Jalla nuž žoñinaca ch'ujquizkatžcu, Pabluqui hebreo tawkquiztan paljaychiča, tuž cjican:

22

¹ –Jilanaca, ejpnaca, wejrqui personal tjurt'ača. Wejt takuž nonžna.

² Jalla nuž hebreo tawkžtan paljayan, walja ch'uj žejlchiča nii žoñinacaqui. Nekztanaqui Pabluqui paljaychiča, tuž cjan:

³ –Wejrqui judío žoñtča. Nawjc Cilicia cjita yokquin Tarso cjita wajtquin nassinča. Pero tekzi tii Jerusalén wajtquiz pajkchinča. Gamaliel cjita maestruqui wejr tjaajinchiča, učum atchi ejpnacž tuquita lii jarupanča tjaajinchiqi. Nižaza wejrqui tjapa kuztan Yoozquin sirwiñpanča, jaknužt ančhucqui tjapa kuztan učum cuzturumpi jaru paačhaja, jalla nuž.

⁴ Tuquiqui wejrqui Yooz jiczquiz ojklayñi žoñinaca taniñtača, conañcama. Nižaza Yoozquin criichi luctaka cjiñimi maataka cjiñimi preso tanžcu, cheliñtača carsilquiz chawjckatzjapa.

⁵ Nižaza timplu jilirinacami tjapa wajt jilirinacami zizza, weraral chiyučha, nii. Ninacaqui wejtquiz carta credencial tjaachiča, Damasco wajtquin učum judío jilanacžquiz tjeezjapa. Nekztan nicju ojkchinča, Yoozquin criichi žoñinaca tanzjapa. Tekzi Jerusalén wajtquiz zjicžcu, casticz pecchinča. Jalla tii weriž ojklayta puntuquiztanaqui tii Jerusalén jilirinacaqui kjanacama declarasača.

PABLUQUI JESUCRISTUZTAN ZALCHICHA

⁶ 'Carta credencial tanžcu, wejrqui Damasco watjal ojkchinča. Nižaza taypur ora irantiz cjen, tiripintit arajpachquiztan tsjii wali pajk ispijužtakaz kjanžquichiča wejt muytata.

⁷ Wejrqui yokquin tjojtzinča. Jalla nuž tjojtžcu tsjii jora nonziča, tuž cjican: “Saulo, Saulo, ¿kjažtiquiztan am wejt quintramjo?”

⁸ Jalla nekztanaqui wejrqui pewczinča, tuž cjican: “Wejt Jiliri, ¿ject amya?” Jalla nekztanaqui wejtquiz kjaaziča, tuž cjican: “Wejrtča Jesusitqui. Nazaret wajtchiz zoñtča. Amqui wejt quintram paača”.

⁹ Wejttan chica cumpant'iñi zoñinacaqui walja tsucchiča. Nižaza nii kjanžquiñi cherchizakazza. Pero nii wejtquiz chiizquiñi jora ana nonziča.

¹⁰ Nekztanaqui wejrqui cjichinča: “Wejt Jiliri, ¿čhjulu wejr paajum cjii amya?” Nekztanaqui wejt Yooz Jiliriqiu kjaaziča, tuž cjican: “Zaažna. Tiraka amqui Damasco watja oka. Jalla nekz amquiz mazinta cjequiča čhjulut paasalaj, jalla nii”.

¹¹ Jalla nii kjanaž cjen zuranzinča. Jalla nekztanaqui wejt cumpant'iñi zoñinacaqui wejt kjarcu tanžcu Damasco watja irantizcama chjitchiča.

¹² Jalla nii wajtquin tsjii Ananías cjita zoñi želatča. Jalla niiqui Moisés lii jaru walja cumpliñitača. Nižaza tjapa nii Damasco wajtquin kamñi judionacami nii zoñž puntuquiztan “Zumapanča nii zoñiqui” cjiñitača.

¹³ Nekztanaqui Ananiasqui wejtquiz tjonžni tjonchiča. Jalla nuž tjonžcu wejt latuquiz tsijsiča. Nekztan wejtquiz cjichiča: “Saulo jila, wila cherñim cjequiča”. Jalla nii orapacha wejrqui cherñi cjissinča. Nekztan Ananías kjutñi cherzinča.

14 Jalla nekztanaqui Ananiasqui wejtquiz cjichiča: “Tuquitanpacha učum ejpnacž Yoozqui am illziča, niž pinsita zizajo, nižaza niž anča zuma Majch cherajo, nižaza niž jora nonžnajo.

15 Nižaza amqui niž puntuquiztan paljayaquiča tjapa tii muntuquiz žejlři zoñinacžquiz. Nižaza ninacžquiz amiž chertanaca, nižaza amiž nonztanaca declaraquiča.

16 Jaziqui apura žaažna, Yooz Jiliržquin tjapa kuztan cjee, am ujnaca pertunta cjisjapa. Nižaza bautista cjee”.

17 Wiruñaquí Jerusalén watja quejpchinča. Jalla nuž quejpžcu, timpluquin ojkchinča Yoozquin mayizizjapa. Jalla nuž mayizican Yoozqui tsjii chjuužtažokaz wejt kuzquiz tjonskatchiča.

18 Nekztan Yooz Jiliri cherchinča. Nižaza Yooz Jiliriqui wejtquiz cjichiča: “Tii Jerusalén wajtquiztan apura ulna. Amiž wejt puntuquiztan chiita takunaca anaž nonz pecča”.

19 Nekztanaqui wejrqui cjichinča: “Wejt Jiliri, ninacaqui zizza weriž ojklaytanacaqui. Tjapa ajcz kjuyaran ojklayiñtača, amquin criichinaca kjurcan. Jalla nii criichinaca wachtiquiztan, wejrqui ninaca wjajtkatchinča.

20 Nižaza am puntu declarři Esteban conan, wejrqui nicju tsijtsi želatuča. Nižaza wejt kuzmi tjapa kuztača nii conan. Nižaza nii conři zoñinacž zquitinaca cwitichinča”.

21 Pero Yooz Jiliriqui wejtquiz chiižinchiča, tuž cjican: “Oka amqui. Ažkquin nacjuñta wajtchiz

žoñinacžquin am cuchnača”.

PABLUZTAN COMANDANTI JILIRZTAN

²² Jalla niicama žoñinacaqui Pabluž paljayta taku nonziča. Nekztanaqui kjawi kallantichiča, tuž cjican:

—¡Ticzla tii žoñiqui! ¡Ana žejtz waquiziča!

²³ Jalla nuž tirapan kjawcan, persun zquitinaca wewcwewczinchiča, polvo žketinchizakazza.

²⁴ Jalla nižtiquiztan zultatž jiliriqiu mantichiča, Pablo cuartelquin majkžnajo. Nižaza mantichiča, Pablo wjajtžcu mazkatzjapa, “¿Kjažtiquiztan nii žoñinacaqui niž žuintra nižta kjaw?” jalla nii puntuquiztan zizjapa.

²⁵ Pablo wjajtžjapa čejlžtaž cjen, Pabluqui nekz žejlñi tenientižquiz paljaychiča, tuž cjican:

—Ima zumpacha zizcan, ¿tsjii roman žoñi wjajtž waquiziya? Anapaž waquiziča.

²⁶ Jalla nii taku nonžcu, nii tenientiqui niž comandantižquiz ojkchiča, nii puntu mazjapa. Jalla nekztanaqui tuž cjichiča:

—Tii žoñiqui roman žoñipanzača. Anaž čhjulumi nižtaqui kjaž cjila.

²⁷ Nekztanaqui nii comandante jiliriqiu Pablužquin macjatžquichiča. Nekztan pewcziča, tuž cjican:

—¿Roman žoñim panj amya?

Pabluqui kjaaziča, tuž cjican:

—Jesalla.

²⁸ Nekztan nii comandantiqui cjichiča:

—Wacchi paaz wejrqui pacchinpanča roman wajtchiz žoñi cjisjapaqui.

Nekztan Pabluqui kjaaziča, tuž cjican:

—Wejrqui nastiquiztanpacha roman wajtchiz zoñtcha.

²⁹ Jalla nuž Pabluž taku nonžcu, nii Pablo wjajtajo mantita zultatunacaqui nužquiz wir kjutñi atziča. Nižaza Pablo roman zoñi zizcu, nii comandantiqui nii wjajtzjapa čhejlchiž cjen, tsucchi quirchiča.

*PABLUQUI JUDIO JILIRINACZQUIZ
PRISINTISKATCHIČHA*

³⁰ Niiž jaka tažuqui nii comandantiqui ancha ziz pecatča Pabluž puntuquiztan. Ultimu, ¿kjažtiquiztan nii judío zoñinacaqui Pablo conkatz pecatjo? Jalla nekztan Pablo čhejlta carina apakžinčiča. Nižaza timplu chawc jilirinacami wajt jilirinacami juntjapznajo mantichiča. Jalla nuž juntjapztiquiztan nii comandantiqui Pablo ninacž yujcquin prisintisjapa chjitchiča.

23

¹ Nekztanaqui Pabluqui nii ajczy jilirinacž kjutñi cherziča. Jalla nuž cheržcu, tuž cjichiča:

—Jilanaca, wejt kuzquiz zizuča, tii noojcama wejrqui Yooz yujcquiziqui walika kamchinča, nii.

² Nuž chiitiquiztan, Ananías cjita chawc jiliriqui Pabluž žcati žejlñi zoñžquiz mantichiča Pabluž atquiz kijchnajo.

³ Pabluzti kjaaziča, tuž cjican:

—Pizc kuzziz zoñi, Yoozqui am casticaquiča. Amqui tekz julzamča, učum lii jaru wejr jusjizjapa. Jaziqui, ¿kjažtiquiztan amqui učum lii quintra wejr kijchnajo mantichamtajo?

⁴ Jalla nii žejlñi zoñinacaqui kjaaziča, tuž cjican:

—¿Jalla nuž Yooz chawc jiliriqúi chayskazkaya?

⁵ Nekztan Pabluquí cjichiča:

—Jilanaca, anal wejrquí zizatuča tiíquí Yooz chawc jilirižlaja, jalla nii. Cjijrta Yooz takuquí tuž cjiča: “Tsjii wajt jilirž quintraquí anača chiizquí”.

⁶ Jalla nekztanaquí Pabluquí naaziča, parti ajczñi žoñinacaquí saduceo partiquiztantača, nižaza parti ajczñi žoñinacazti fariseo partiquiztantača. Jalla nižtiquiztan altu joržtan nii žoñinacžquiz paljaychiča, tuž cjian:

—Jilanaca, fariseo parti žoñtča wejrquí. Wejt familiaquí fariseo partizakazza. Tsjii noojíquí ticzi žoñinacaquí jacatataquíča. Jalla nii tjuñi wejrzakal tjewznuča. Jalla nii puntuquiztan ančhucquí wejr jusjiča.

⁷ Jalla nuž chiitiquiztan fariseo partinacžtan saduceo partinacžtan porapat aptjapziča. Nekztanaquí nii ajczñi žoñinacaquí t'akziča.

⁸ Nii saduceo žoñinacazti cjiñitača, “Ticziquiztanaquí anaž wira jacatatasacha. Nižaza anaž anjilanacami zajranacami želasacha”, nuž cjiñitača. Nii fariseo žoñinacazti jacatatz puntumi anjilanacž puntumi, zajranacž puntumi, tjapa nii puntunaca criñitača.

⁹ Jalla nižtiquiztan altu joržtan ch'aasi kallantichiča. Nekztan tsjii kjaž lii tjajjiñi maestronacaquí tsijsiča. Ninacaquí fariseo partiquiztantača. Ninacaquí paljaychiča tuž cjian:

—Tii žoñžquiz ana čjul ujmi wachuča wejrnacquí. Čunamit tsjii anjilača Pablužquiz chiižinchini, už ispirituzlaj tižquiz chiižinchi.

¹⁰ Juc'ant juc'ant ch'aascan aptjapsičha. Jalla nuž cjen comandante jiliriqúi eksnatčha Pablo chjojritžta cječhaj, jalla nii. Nekztan nii comandantiqui zultatunacžquiz mantichičha nii judionacž taypiquiztan Pablo jwescu wilta cuartilquin chjichajo.

¹¹ Niiž jaka zeztažu nii arama Yooz Jiliriqúi Pablužquiz jeczquichičha, tuž cjican:

—Pablo, tjup kuzziz cjee. Jaknuž tii Jerusalén wajtquiz wejt puntuquiztan paljayčhamžlaja, nižaza Rom wajtquin wejt puntuquiztan paljaystančha.

PABLO CONZ KAZTA

¹² Jalla niiž jaka tažuqúi tsjii kjaž judío žoñinacaqúi Pablo conzjapa juramentužtan tsjii acuerduquiz asiptassičha. “Pablo ana ticznaquičž niiqui, wejrnac contal cjeečha”. Nuž cjican asiptassičha. Nižaza ninacaqúi palt'assičha ninacpora, tuž cjican:

—Anaž čjul čjherimi lujls, Pablo conañcama, — jalla nii.

¹³ Jalla nii parla asiptiñi žoñinacaqúi pusi tunc jilatačha.

¹⁴ Nižaza ninacaqúi mazñi ojkchičha timplu chawc jilirinacžquinami nižaza wajt jilirinacžquinami. Ninacžquiz mazzičha tuž cjican:

—Tsjii acuerduquiz asiptassinčha tuž cjican: “Pablo ana ticznaquičž niiqui, wejrnac contal cjeečha”. Nižaza palt'assinčha wejrnacpora, tuž cjican: “Anaž jecmi čjul čjherimi lujls, Pablo conañcama”, jalla nii.

¹⁵ Jaziqui ančhucqui parti jilirinacžtanami nii comandante jiliržquiztan nii Pablo mayaquiča, tuž cjican: “Wilta Pablo cuchanžcalla wejtnacaquin. Wejrnacqui Pabluž puntuquiztan tsjan zumpacha intintiz pecasuča”. Jalla nuž cjican Pablo mayaquiča. Wejrnacqui listuž cjeeča Pablo conzjapa. Ima ančucaquiz irantižcan, wejrnacqui nii Pablo conača. —Jalla nuž cjichiča.

¹⁶ Jalla nekztanaqui Pabluž cullaca majchqui Pablo conz puntuquiztan nonziča. Jalla nii nonžcuqui cuartilquin ojkchiča Pablužquiz mazñi.

¹⁷ Nekztanaqui Pabluqui tsjii zultatž teniente kjawziča, tuž cjican:

—Tii tjowa chjicha comandantižquin. Tiiqui quintuchizza.

¹⁸ Nekztanaqui nii teniente nii tjowa chjitchiča tuž cjican:

—Nii Pablo prisita žoñiqui wejr kjawziča. Nekztan wejtquiz chiichiča tii tjowa amquin chjichajo. Tiiqui amquiz quint'iz pecča.

¹⁹ Nekztan nii comandantiqui kjarcu tanžcu nii tjowa tsjii latu chjitchiča. Jalla nekztan pewczyča, tuž cjican:

—¿Chjulum amqui wejtquiz chiiz pecya?

²⁰ Jalla nekztanaqui tjowaqui kjaaziča tuž cjican:

—Judío žoñinacaqui tsjii acuerduquiz asiptas- siča. Jaka wenz amquiztan mayaquiča Pablo chjitzjapa judío jilirinacž yujcquin. Jalla tuž

mañžtan mayaquiča, “Wejrnacqui Pabluž pun-tuquiztan tsjan zumpacha intintiz pecasuča”. Jalla nuž cjican mayaquiča.

²¹ Amzti ana ninacžquiz juyzu paaz waquiziča. Tsjii pusi tunc jil žoñinacaqui juramentužtan tsjii acuerduquiz asiptassiča, tuž cjican: “Pablo ana ticznaquiž niiqui, wejrnac contal cjeeča”. Nižaza ninacpora palt’assiča, tuž cjican: “Anača čhjeri lujls Pablo conañcama”. Nii žoñinacaqui čhjojziž tjewža Pablo irantisquizcama. Anzpacha listuča, amiž asiptita takukaz tjewža.

²² Jalla nii quintu nonžcu nii comandantiqui nii tjowa cuchanchiča. Nižaza mantichiča:

—Anaž jeczquizimi amiž quint’itaqui čhiichiyaquiča, —jalla nuž cjican cuchanchiča.

PABLUQUI FELIX CJITA JILIRZQUIN CUCHANTA

²³ Jalla nekztanaqui nii comandantiqui pucultan teniente kjawziča. Jalla nuž kjawžcu tsjii ortina mantichiča, tuž cjican:

—Zultatunaca tuž tjaczna, paa patac zultatu kjojchiñ ojkñijapa, nižaza pakallawk tunca zultatu cawallquiz yawchi ojkñijapa, nižaza paa patac zultatu lanzižtan ojkñijapa. Ispir ora listu tjaczta cjequiča Cesarea watja ojkzjapa.

²⁴ Nižaza tsjii cawallu tjaczinaquiča Pablo yawchi chjitzjapa. Nižaza Pablo čhjaquiča ana čhjulu kjaž cjižcu. Nekztanaqui Félix cjita chawc jiliržquiz intirjaquiča. —Jalla nuž mantichiča nii comandantiqui.

²⁵ Nižaza nii Pablo čhjichñi zultatunacžtan tsjii carta apaychiča, tuž cjican:

²⁶ “Al señor excelentísimo chawc jiliri Félix: Wejrqui amquin tsaanučha; Claudio Lisias wejrtčha.

²⁷ Judío žoñinacaqui tii žoñi preso tanchičha. Nižaza konz cjichitakalčha. Jalla tiiqui roman žoñičha. Jalla nii zizcu, wejrqui zultatunacžtan ojkchinčha, tii liwrii. Wejr irantan, judío žoñinacaqui tii konzmayatačha.

²⁸ Wejrqui ziz pecatučha, ultimu kjažtiquiztan nii judío žoñinacaqui tii conkatz pecatjo, jalla nii. Nižtiquiztan judío jilirinacž yujcquin chjitchinčha.

²⁹ Nekztanaqui zizzinčha nii judionacž lii puntuquiztankaz tii quintra uj tjojtunchičha. Anaž konz razunami nižaza ana carsilquiz chawjcz razunami želatčha tii judionacžquiztanaqui.

³⁰ Jalla nekztanaqui nii judío žoñinacaqui tsjii acuerduquiz asiptassitakalčha tii Pablo konzjapa. Jalla nii zizcu, nekztan wejrqui amquin apura cuchanžcučha. Nižaza nižta quintra žoñinacžquiz mantichinčha, am yujcquiz parlajo, čhjul puntuquiztan quintra aptazaja, jalla nii. Jalla nužukazza”.

³¹ Jalla nekztanaqui ortin jaru zultatunacaqui ween Pablo chjitchičha, Antípatris cjita watjacama.

³² Niiž jaka tažuqui kjojchiñ ojkñi zultatunacaqui cuartilquin quejpžquichičha. Cawallquiz ojkñi zultatunacakaz tira Pablužtan ojkchičha.

³³ Cesarea watja irantižcu, carta tjaachičha chawc jiliržquiz. Nižaza nii jiliržquiz Pablo intirjichičha.

³⁴ Carta liižcu, nii chawc jiliri qui Pablo pewczičha, jakzi wajtchiz žoñitažlaja, jalla nii.

Cilicia wajtchiz žoñi, nii zizcu,

³⁵ tuž cjichiča:

—Am quintra aptazñi žoñinacaž tjonchiž cjen, am puntuquiztanaqui wejrqui atintača.

Nekztanaqui nii jiliri qui mantichiča Herodes pajk kjuyquiz Pablo zuma wijilta želajo.

24

PABLUQUI FELIX YUJCQUIZ PRISINTICHICHA

¹ Nekztan pjijska tjuñquiztan, Ananías cjita timplu chawc jiliri qui Cesarea watja irantichiča Jerusalén wajt jilirinacžtanami nižaza tsjii Tértulo cjita tjurt'iziñi awjatžtan. Jalla ninacaqui chawc jilirž yujcquin prisintichiča Pabluž quintra chawc uj tjojtunzjapa.

² Tsjii audiencia cjetžtanaqui jilirž yujcquiz Pablo chjichtatača. Nekztan nii Tértulo tjurt'iziñi awjatuqui Pabluž quintra chii kallantichiča tuž cjican:

—Wejt excelentísimo chawc jiliri: Walikazza wejt watjaqui, nižaza cuntintu kamasuča. Sparaquiča amquin. Am walja zizñiž cjen zuma irpiñamča wejtnacaquiz. Chjul necesidad žejlčhaja, jalla nii atintichamča.

³ Tjapa watjanacquin amiž uchta obranacquiztan ancha sparaquič žjiwča, zuma excelentísimo Félix. Nižaza tjapa žoñinacaqui nuž amquiz sparaquiča cjiñipanča.

⁴ Wejrqui am ana ancha molistis pecuča, tii puntuquiztankaz am atintalla. Nižaza tsjii ratu wejt taku nonžnalla.

⁵ Nuc ažka kamcan, wejrnacqui zizzinča, tii žoñiqui wira anawalipanča. Nižaza tjapa kjutñi judío žoñinacaž aptjapča, t'aka t'aka. Nižaza ti-iqui walja achača nii nazaren cjita t'akquiztan.

⁶ Nižaza wejtnaca timpluquin yekja wajtchiz žoñi luskatz yanchičha. Jalla nižta anawalipanča. Jalla nižtiquiztan wejrnacqui tii preso tanchinča. Nižaza wejtnac lii jaru tii žoñi castic-skatz pecatuča.

⁷ Nii Lisias cjita comandantizti fuerziižcu wejtnacaquiz mitissiča. Tama zultatunacžtan tii kjañchiča.

⁸ Nekztanaqui nii comandantiqui wejrnacqui tii žoñž uj tjeezjapa tekzi am yujcquiz tjonkatča. Jazic amza tii pewcžna. Jalla nekztanaqui tiižquiztanpacha zizaquiča wejrnaca ultim werara chiichinča, wejtnacaž tjojunta uj puntuquiztan zumpacha zizaquiča. Tii žoñiqui walja ujchizza.

⁹ Nii žejlñi judío žoñinacaqui cjichizakazza:

—Tiiž chiita takunaca werarača.

¹⁰ Nekztanaqui nii chawc jiliri qui kjara waytižcu Pablo chiikatchičha. Jalla nuž cjen Pablo paljaychiča, tuž cjican:

—Nuc ažk wata tekz tii nacionquiz amqui jiliri tsijsamča. Jaziquiz wejrqui ancha cuntintučha am yujcquiz tjurt'izjapaqui wejt puntuquiztan.

¹¹ Ampacham wejt puntuquiztan averiguasača. Tuncapan tjuñikaz weriž irantisquitaqui, nii Jerusalén wajtquin Yoozquin sirwizjapa tjonchintača.

12 Anaž jec žoñimi wejr žoñžtan ch'assñi cherchiqui, nižaza wejrqui ana žoñinaca aptjapchinča, Jerusalén wajtquizimi.

13 Tii wejt quintra žoñinacaqui anaž čjul ujmi amquiz tjeezñi atča.

14 Jalla tiičha ultim weraraqui. Wejrqui wejtnac ejpnacž Yoozpacha sirwuča Yooziž tjeezta kamaña jaru. Jalla nii Yooz kamañaqui yekjaž t'aka cjiča tinacaqui. Nižaza wejrqui criyuča tjapa Moisés cijjrta liimi, nižaza tjapa profetž cijjrta Yooz takunacami.

15 Nižaza criyuča Yoozqui ticziquiztan jacatatskataquiča zuma kamñi žoñimi ana zuma kamñi žoñimi. Jalla nii jacatatz tjuñi tjewznuča, tinacami nižazakaž tjewža.

16 Jalla nuž tjewžcan, Yooz yujcquizimi žoñž yujcquizimi wejt kuz zuma iwjt'ican persunpacha cwitasučha, ana ujchiz cjisjapa.

17 'Tsjii kjaž watanaca yekja nacionaran wejr cjklayžquichinča. Jalla nuž ojklajžcu wejrqui wejt persun yoka quejpchinča, limosnami ofrendanacami timpluquin uchjapa.

18 Jalla nuž paan, tsjii kjaž Asia provinciaquiztan tjonchi judionacaqui wejttan zalchiča. Timpluquin žejlchinča judiož cuzturumpi jaru paacan. Timpluquin žoñinacaqui anatača wacchi, nižaza anatača čjulumu aptazzi.

19 Jalla nii Asiaquiztan tjonchi judionacaqui jalla ninacžla tekziqui am yujcquiz prisintisquizlani wejt quintraqui, čjul uj paatučhaja, jalla nii. Ninacaqui tsjii uj tjeeznačhaj niiqui, tekz am yujcquiz tjeezla.

20 Jalla nii ana atchucažlaj niiqui, tii žejlñi

žoñinacaj weriž paata uj kjanacama chiilalla. Wejr judío jilirinacž yujcquiz želan, uj paachinžlaj ni-iqui kjanaj chiilalla.

²¹ Judío jilirinacž yujcquiz žejlcan, tiikaz altu joržtan chiichinča: “Ticziquiztan jacatatz tjuñi tjewznuča. Jalla nižtiquiztan tonj ančhucqui wejr jusjiča”. Jalla niikazza weriž chiitaqui. – Nuž cjican Pabluqui chiichiča.

²² Jalla nuž nonžcu, Félix chawc jiliriqiu nii cjetžta audiencia nužquiz suspintiskatchiča. Nii jiliriqiu Yooz jicz puntuquiztan zuma zizziča. Jalla nižtiquiztan Pabluž quintra žoñinacžquiziqui ana juyzu paachiča. Nekztan cjichiča:

–Chjulorat Lisias comandante tjonačhaja, jalla nekztanž tii ančuca quijaqui wilta atintita cjequiča. Nii nooj azquitžta cjequiča.

²³ Nekztanaqui Félix chawc jiliriqiu teniente capitanzquin mantichiča Pablo tira kjuyquiz chawjcta cwitajo. Pero Pabluž amigonacžquiz permiso tjaachiča, Pablo atintizjapa.

²⁴ Tsjii kjaž majquiztan Félix chawc jiliriqiu Drusila cjiti tjunatan tjonžquichiča Pabluž taku nonzjapa. Jalla naaqui judioquiztan žontača. Nekztanaqui Pablo kjawzñi mantichiča. Niiž yujcquiz prisintižcu, Pabluqui Jesucristužquin kuzziz puntuquiztan paljaychiča.

²⁵ Nii jiliriž nonznan, Pabluqui parličiča tii čhjep puntuquiztan: Yooz zuma kamaña puntuquiztan, nižaza persun kuz zuma irpiz puntuquiztan, nižaza Yooz casticz tjuñi puntuquiztan. Jalla nii parlita nonžcu Félix chawc jiliriqiu muzpa tsucchiča. Nekztanaqui cjichiča:

—Oka amqui. Wejttaž timpu želan, wilta am kjawznača.

²⁶ Félix chawc jiliriqúi “paaz pac jaa” cjican jalla nuž Pablužquiztan pecatča. Paaz pactiquiztan Pabluqúi cuctaž cjitasača. Jalla nižtiquiztan nii jiliriqúi kjaž wilta Pablo kjaw kjawatča, “Cunamiž paaz pacasa jaa” cjican. Pablo kjawžcu, nižtan parličiča.

²⁷ Félix jiliriqúi judionacž kuz wali cjiskats pecatča. Jalla nižtiquiztan Pablo preso ecchiča. Pizc wata nuž watchiča. Jalla nekztanaqúi Félix chawc jiliriqúi niž puestuquiztan ulanchiča. Nii puestuquiz tsjiizuñ luzziča, Porcio Festo cjita tjuuchiztača.

25

PABLUQUI FESTUZ YUJCQUIZ PRISINTICHICA

¹ Festuqúi chawc jilirž puestuquiz luzcu, niž čhjep majquiztan Cesarea wajtquiztan Jerusalén watja ojkičiča.

² Jalla nicju timplu chawc jilirinacami walja acha wajt jilirinacami, jalla ninacaqúi Pabluž quintra quijčiča.

³ Nižaza rocchiča:

—Tsjii favora paalla —cjican. —Tii Jerusalén watja Pablo cuchanžcalla.

Nii oraqúi ninacž kuzquiz pinsičiča, Pablo jiczquiz tjonan conzjapa.

⁴ Nekztanaqúi Festo chawc jiliriqúi kjaaziča, tuž cjican:

—Pabluqúi Cesarea wajtquin preso žejlča. Tsjii kjaž majquiztan wejrpachal quepača nicju.

⁵ Jaziqui ančuca jilirinacaqui wejttan chica Cesarea ojkla. Jalla nicju nii žoñiqui ujchizpanžlaj niiqui, jalla niiž uj tjeezpanikazza ančhucalaqui.

⁶ Nii Festo jiliriQUI quinsakal tjuñizlaj už tunca tjuñizlaj, jalla nuž žejlchiča Jerusalén wajtquiz. Jalla nekztanaqui Cesarea watja quejpchiča. Niiž jaka tažuqui niiž jusjiz oficinquiz luzziča. Jalla nekztan Pablo zjijcajo mantichiča.

⁷ Pablo zjijctiquiztan Jerusalén wajtquiztan tjonchi judionacaqui jusjiz oficinquiz luzzizakazza. Pabluž muytata tsijtsucu, wali chawc ujnaca tjojtunchiča. Pero ana čhjul uj tjeezñi atchiča.

⁸ Jalla nekztanaqui Pabluqui persuna tjurt'ican takunaca chiichiča, tuž cjan:

—Wejrqui ana čhjul ujmi paachinpanča, ana judionacž lii quintrami, nižaza ana timplu quintrami, nižaza ana roman chawc jilirž quintrami. Anapan uj paachinča.

⁹ Nekztanaqui Festo jiliriQUI judionacž kuz wali cjiskatzjapa tsjii favora paaz pecatča. Jalla nižtiquiztan Pablužquiz pewcziča, tuž cjan:

—¿Jerusalén watjam okasaya? Jalla nicju am quintra quijta puntuquiztan atintasacha.

¹⁰ Jalla nižtiquiztan Pabluqui kjaaziča, tuž cjan:

—Roman chawc jilirž jusjiz oficinquiz želuča. Tekzpacha wejrqui jusjita cjistanča. Amqui zumpacham zizza wejt puntuquiztan. Wejrqui ana čhjul ujmi paachinča tií judionacž quintrami.

¹¹ Jaziqui wejrqui ujchizpančhalaj niiqui, casticta cjis anal jiwjatuča. Nižaza uj paachiž cjen

ticz waquizičhaj niiqui, ticzmi anal jiwjatučha. Pero wejt quintra tjojtunta ujnacami ultimu ana tjeezkattačha. Nižtiquiztan anaž nii judionacz kjarquiz wejr intirjita cjesačha. Jaziqui roman chawc jiliržquinpan watz mayučha wejt puntuquiztan zumpacha arreglita cjisjapa.

¹² Jalla nekztanaqui Festo jiliriqui niž tantiiñinacztan palt'ichičha. Jalla nuž palt'izcu, Pablužquiz chiichičha, tuž cjican:

—Amqui roman chawc jilirizquin watz maychamčha. Jaziqui jalla nii jiliržquinpanikam watačhani.

PABLUQUI AGRIPZ YUJCQUIZ PRISIN-TICHICHA

¹³ Jalla tsjii kjaž majquiztan tsjii Agripa cjita chawc jiliriqui Cesarea watja tjonchičha Berenice cjiti tjunatan. Jalla ninacaqui tjonchičha Festo tsaanzjapa.

¹⁴ Jalla nicju tsjii kjaž maj kaman Festo jiliriqui ninaczquiz quint'ichičha Pabluž puntuquiztan, tuž cjican:

—Tekz tsjii pres žoñi žejlčha, Félix jiliržquiztanpacha.

¹⁵ Wejrqui Jerusalén wajtquiz želan, timplu jilirinacami wajt jilirinacami jalla ninacaqui tii žoñž quintra quijchičha. Ninacaqui wejtquiz tii žoñi conkatz pecatčha.

¹⁶ Jalla nižtiquiztan wejrqui kjaazinčha tuž cjican: “Romanž liiqui tuž cjičha: Quijta žoñžtan quijñi žoñžtan pucultan declarskatzpanikazza, čhjulut watčhaja, jalla nii. Nekztan nii quijta

žoñiqui persun takunacžtan tjurt'asača werarquiztanaqui. Nekztan chawc ujchizlaj niiqui, contaž cjesača”.

¹⁷ Jalla nižtiquiztan ninacaž tiwc tjonchiž cjen, ana timpu pertižcu, niiž jaka tažuqui quija atintichinča wejt jusjiz oficinquiz. Nii quijta žoñi zjijcajo mantižcu zuma atintichinča.

¹⁸ Nii quijñi žoñinacaqui prisintichizakazza. Wejrqui pinsichintača, ninacac chawc ujan nii žoñžquiz tjeeznaa, cjican. Ultimu ninacazti ana čjul chawc ujmi tjeezkati atchiča.

¹⁹ Nii žoñž quintra chiichiča religiún puntuquiztankaz. Tsjii Jesusa cjita žoñiqui ticziča. Pabluzti “Zejtča niiqui” cjiñitakalča.

²⁰ Wejrqui nižta quija atintizjapa anal zuma zizatuča. Jalla nižtiquiztan Pabluzquiz pewczinča, tuž cjican: “¿Jerusalén watja okasay? Jalla nicju tii am quintra quij puntuquiztan atintasača”. Jalla nuž chiichinča wejrqui.

²¹ Jalla nekztanaqui niiqui maychiča roman chawc jiliržquin watzjapa. Jalla nižtiquiztan Augusto cjita chawc jiliržquin watajo mantichinča. Nižaza tirapan preso želajo mantichinča, čjulorat chawc jiliržquin mantichuca cječhaja, jalla niicama.

²² Jalla nekztanaqui Agripa jiliriui Festo jiliržquiz cjichiča:

—Wejrzakal nii žoñž razuna nonz pecučha.

Festo jiliriui kjaaziča, tuž cjican:

—Jakapacham nonznaquiča.

²³ Niiž jaka tažuqui Agripa cjita jiliriui Berenice cjiti tjunatan pajk audiencia kjuyquin luzquichiča, ancha zuma honorchiz.

Zultatž jilirinacžtanami wajt jilirinacžtanami luzzizakazza. Nekztanaqui Festo jiliriqúi Pablo zjijcajo mantichiča.

²⁴ Pablo zjijctiquiztan Festo jiliriqúi tuž paljay-chiča:

—Agripa chawc jiliri, nižaza tekz ajczi zuma žoñinaca. Tekziča tii žoñiqúi. Walja judionacaqui tii žoñž quintra chiichiča Jerusalén wajtquinami tii Cesarea wajtquizimi. Jalla ninacaqui wejr ro-crocchiča tii žoñi conzjapa, “Tii žoñiqúi ana žejtz waquiziča” cjican.

²⁵ Wejrpacha tii zuma pewcpewcžcu, anapan čhjul uj wači atchinča, ticzkatajo. Nižaza tiiqúi roman chawc jiliržquin watz maychiča jusjita cjeajajo. Jalla nuž maytiquiztan tantiižcu, watajo mantichinča.

²⁶ Wejrqui roman chawc jiliržquin čhjul puntut tii žoñž puntuquiztanaqui cijjras? Anal zizuča. Jalla nižtiquiztan am yujcquiz prisintiskatuča, señor Agripa, wejt chawc jiliri. Nižaza tjapa ančhucaquiz prisintiskatuča. Jaziqúi ančhucqui tii žoñi zumpachaž pewcžina. Nekztan wejrqui aptačhani čhjul puntut cijjras, nii.

²⁷ Tii pres žoñž quintra puntuquiztan kjana-pacha cijjrz waquiziča. Ana nižta cijjraquiž niqúi, anapal cuchni atasacha. —Jalla nuž paljay-chiča Festo jiliriqúi.

26

*PABLUQUI TJURT'INĪ TAKUNACA WILTA CHI-
ICHICHA*

1 Jalla nektanaqui Agripa jiliriqúi Pablužquíz tuž cjichiča:

—Amqui am persunquíztan zuma tjurt'iz taku chiya.

Jalla nektanaqui Pabluqui kjara chjinžcu paljají kallantichiča, tuž cjican:

2 —Excelentísimo Agripa, chawc jiliri, ancha cuntintuča wejrqui, am yujcquíz wejt puntu-naca werara chiizjapa. Judío žoñinacaqui wejt quintra ujnaca tjojtunchiča. Jaknižlaj nii werara chiyasača.

3 Amqui tjappacha učum judionacž cuzturrumpinaca zumam zizza. Nižaza učumpora čjul puntu ch'aasaj, nii ch'aastanacami zizza amqui. Jalla nižtiquízтанаqui wejrqui ancha cuntintuča, am yujcquíz tjurt'izjapaqui. Zuma pasinsistanž nonžnalla.

4 'Tjapa judionacaqui weriž kamta zizza. Wejt yokquíz ojklajtami nižaza Jerusalén wajtquíz ojklajtami jaknuž ocjalquízтанpacha kamiñtažlaja, nii zizza tjapa judionacaqui. Ninacžtan kamiñtača.

5 Tjowanstiquízтанpacha fariseo t'akquíz žejlchinča. Nii fariseo t'akaqui učum judionacž lii jarupan walja estricto kamñiča yekja judionacž t'akanacquízтан cjenami. Jalla nii ažktan zizza nii wejt quintra judionacaqui. Jaziqui ninacakaj declarla, declarz pecčhaj niiqui.

6 Tuquiqui Yoozqui učum tuquíta ejpnacžquíz taku ecchiča, ticziquízтан jacatatz puntu, jalla nii. Jalla nii jacatatzpan tjewznuča. Jalla nuž weriž tjewztiquízтан, judionacaqui wejt quintra quijchiča.

7 Pero Israel wajtquiziqui wejtnac tuncapan t'akanacaqui Yooziž ecta taku cumplis zakaz tjewža. Jalla nižtiquiztan Yoozquin rispitiñicha, nižaza majiñami weenami nižžquin sirwiča. Wejt chawc jiliri, jalla niipan tjewzñiž cjen judionacaqui wejt quintra tjojtichiča.

8 Ančhucmi zakaz criičhani, Yoozqui ticziquiztan žoñinaca jacatatzquiča, nii.

9 Tuquiqui wejrqui pinsiñtača, nii Nazaret wajtchiz Jesusižquin criichi žoñinacž quintra čjul anawalinacami paaz waquiziča.

10 Jalla nuž wejrqui criichinacž quintra anawalinaca paachinča Jerusalén wajtquin. Učhum timplu jilirinacž mantita jaru walja criichinaca carsilquiz chawjjskatchinča. Nižaza criichinaca conajo, wejr zakal taku utchinča.

11 Nižaza kjaž wilta criichi žoñinaca sufriskatchinča, Jesucristuž quintra čiikatzjapa, nižaza Jesucristužquiztan quejpskatzjapa. Wejrqui nižtapacha paachinča judionacž ajcz kjuyquizimi. Nižaza walja žawjwiñtača nii criichinacž kjutñi. Jalla nuž žawjžcu wejrqui criichinaca tani ojklayiñtača yekja watjaranami.

12 Jalla nijapa Damasco watja ojkchinča, timplu chawc jilirinacž mantita jaru. Nižaza ninacaqui wejtquiz carta credencial tjaachiča, nii criichi žoñinaca tanzjapa.

13 Jiczquiz okan, taypur ora tiripintit arajpachquiztan tsjii wali pajk ispijužtakaz kjanžquichiča, tjuñ siiquiztan juc'anti. Wejt muytatami wejt cumpant'iñi žoñinacž muytatami kjančiča.

14 Niiž cjen, wejrnacqui yokquiz tsucaña tjojtsinča. Nekztanaqui wejrqui tsjii jora nonzinča. Hebreo tawkquiztan wejtquiz paljayžquichiča, tuž cjican: “Saulo, Saulo, ¿kjažtiquiztan am wejt quintramjo? Ampacha persun quintra paača. Tsjii wacaqui ar parž quintra llawkžcu, persun janchiž quintra paača, jalla nižta irata am persun quintra paača”. Jalla nuž paljayžquichiča nii tsewctan chiiñi joraqui.

15 Nekztanaqui wejrqui pewczinča, tuž cjican: “Wejt Jiliri, ¿ject amya?” Nekztan Yooz Jiliriqui wejtquiz cjichiča: “Wejrtča Jesusitqui. Amqui wejt quintram paača. Wejrtča niitqui.

16 Zaažna. Tsijsna. Amqui wejr sirwaquiča. Nižaza tii amiž chertanacami declaraquiča muzpa žoñinacžquiziqui. Wiruñauqui iyam cheraquiča wejt puntuquiztan. Jalla nekztan tjapa wejt puntuquiztan parlaquiča. Jalla nižtajapa am illzinča. Jalla nuž cjen amquiz pariscuča.

17 Jaziqqui am cuchnača ana judío žoñinacžquin wejt puntuquiztan parližcajo. Nekztanaqui amiž parlan, wejrqui am cwitača, judionacžquiztanami, nižaza nacjuñta žoñinacžquiztanami.

18 Nacjuñta žoñinacžquiz am cuchnača, wejt puntuquiztan parlajo. Jalla nuž amiž parlitiquiztan nii žoñinacž kuzqui cjetžintaž cjequiča wejt puntu intintazajo, nižaza ana zumchiquiz kamajo, antiz zuma kamañquiz kamzjapa. Nižaza amiž parlitiquiztan ninacaqui liwriita cjequiča, Satanás cjita diabluz mantita jaru ana ojklajajo, antiz Yooz mantita jaru ojklajajo. Nižaza we-

jtquin criyaquiča, ninacž ujnaca pertunta cjisjapa, nižaza Yooz kamaña tanzjapa parti Yooz ilzta žoñinacžtan”.

¹⁹ ‘Nekztanaqui, Agripa chawc jiliri, nii arajpachquiztan paljayta takunaca catokchinča, nii jaru kamzjapa.

²⁰ Primiraqui Damasco wajtquin žejlñi žoñinacžquiz liwriiñi Yooz taku parli kallantichinča. Nekztanaqui Jerusalén wajtquin nii Yooz taku parlichinzakazza. Niiž jaru Judea yokaran parlichinča. Niiž jaru nacjuñta žoñinacžquin Yooz taku parlichinča. Judío žoñinacžquizimi ana judío žoñinacžquizimi tjappachquiz parlichinča, ninacž kuznaca campiyajo, Yooz sirwiz quejpnajajo, nižaza Yoozquin quejptiquiztan zuma kamaña tjeežnajo.

²¹ Jalla nižta Yooz takunaca parlitiquiztan judío žoñinacaqui wejr preso tanchičha timpluquiz, wejr conajo.

²² Anzcama Yoozqui wejr yanapča. Jalla nižtiquiztan wejrqui tjurt'iñi kuzziz tii zuma Yooz taku parluča humilde žoñinacžquizimi pajk jilirinacžquizimi. Tuquitan Yooz taku parliñi profetž chiita tawk jaru nižaza Moisés chiita tawk jaru, jalla niicama parluča. Jalla ninacaqui maz-inčičha, tuž cjican:

²³ “Cristuqui sufristanča ticzcama. Nekztan ticziquiztan jacatatstanča. Jalla niiqui primer ticziquiztan jacatatchi žoñičha. Jalla nii Jesucristuž cjen tii zuma liwriiñi Yooz takuqui parlita-pantača učhum wajtchiz žoñinacžquizimi yekja wajtchiz žoñinacžquizimi”. Jalla nii liwriiñi taku

zaka wejr parluča.

PABLUQUI AGRIPZQUIZ CHIIZINCHICHA

²⁴ Pablo jalla nuž tjurt'iñi taku paljayan, Festo jiliriqiu altu tawkžtan cjichiča:

—Pablo, ¡lucuratažtakazza amqui! Zmali istu-tiižcu, jalla nižtiquiztan lucurata cjissamčhalani amqui.

²⁵ Pabluqui kjaaziča, tuz cjican:

—Festo, zuma chawc jiliri. ¡Wejrqui anača lucuratqui! Antiz weriž paljayta takunacača razunaqui, nižaza werarača.

²⁶ Tekzimi Agripa chawc jilirimi žejlča. Niimi zumaž tii puntuquiztan zizza. Jalla nižtiquiztan wejrqui tjup kuztan tiiž yujcquiz chiižinuča. Tii Agripa chawc jiliriqiu tjapa weriž paljayta puntunacaqui zizzipanča. Nižaza tii puntunacaqui watchiča tjapa žoñinacaž zizan, anača tsjii chjo-jzak watchi quintu.

²⁷ Señor Agripa, chawc jiliri, ¿profetaž parlita takum criya? Amqui criiž caa kal cjiwchiya.

²⁸ Agripa chawc jiliriqiu Pablužquiz kjaaziča, tuž cjican:

—¿Tsjii koluc takunacžtankam wejr cristiano cjiskatz pecya?

²⁹ Nekztanaqui Pabluqui cjichiča:

—Tsjii kjaž takunacžtan už wacchi takunacžtan wejrqui ančhuc tuž cristiano cjiskatz pecuča. Ammi nižaza tjapa tonj nonzñi žoñinacami wejr irataj cjisla. Jalla nuž Yooz munañpaj cjeequi. Wejr irata Yoozquin criichej cjisla, pero ana tižta carinžtan mokta.

³⁰ Jalla nuž Pabluž chiitan, tjappacha nii julzi žejlñi jilirinacaqui tsijsiĉha, Agripa chawc jilirimi, niŕzaza Festo jilirimi, niŕzaza Berenice cjiti tjunmi.

³¹ Nekztanaqui ninacaqui Pabluž puntuquiztan parlizjapa tsjii latu ojkĉiĉha ninaccama palt'i. Jalla nekztanaqui ninaccama kazziĉha:

—Tii ŕoñiqui ana ĉjul ujmi paachiĉha, konkatajo. Anaŕ conta cjesaĉha. Niŕzaza anaŕ carsilquizimi chawjĉta cjesaĉha.

³² Niŕzaza Agripa chawc jiliriĉqui Festo jilirŕquiz cjichiĉha:

—Tii ŕoñiqui ana roman jilirŕquin watz may-tasaŕ niiqui, cutztaŕ cjitasaĉha.

27

PABLUZ QUIJAQUI ROMA TJATZTACHA

¹ Jalla nekztanaqui nii jilirinacaqui tantiĉiĉha, Pabluž quija roman chawc jilirŕquin tjatzjapa. Jalla niŕtiquiztan Pablumi parti presonacami intirjitataĉha tsjii Julio cjita capitanŕquiz, Italia watja ĉhjitzjapa. Nii capitanaqui Augusto cjita batalionquiztan jiliritaĉha. Wejrĉqui Pabluŕquiz cumpant'ichinĉha.

² Adramitio cjita wajtquiz tsjii warcu ŕelatĉha. Nii oraqui nii warcuqui ojkzpachataĉha Asia kjutñi. Jalla nuž cjen nii warcuquiz luzzinĉha. Niŕzaza wejtnacatan Aristarco cjita ŕoñitaĉha. Ni-iqui Tesalónica wajtĉhiz ŕoñitaĉha. Tesalónica watjaqui Macedonia yokquintaĉha.

³ Jaka tažuqui Sidón cjita wajtquin irantichinča. Jalla nicju Julio capitanaqui Pablužquiz tsjii favora paachiča, Pablužquiz permiso tjaachiča niž mazinacžquin tjonznajo atintita cjisjapa.

⁴ Nekztanaqui Sidón wajtquiztan ulanžcu Chipre cjita zkolta yoka watchinča. Zkar latu watchinča tjamiž cjen.

⁵ Jalla nekztanaqui Cilicia nižaza Panfiliaž niž waruñ chawc kota kajkchinča Mira cjita watjagama. Mira watjaqui Licia cjita yokquintača.

⁶ Jalla nicju zultatž capitanaqui tsjii Italia ojkñi warcu zalchiča. Nii warcuqui Alejandría wajtquiztan ulnatča. Jalla nii warcuquiz capitanaqui wejrnac luzkatchiča tira ojkzjapa.

⁷ Nekztanaqui tsjii kjaž maj ojkchinča zumat. Ancha tjamiž cjen ch'aman irantichinča Gnido cjita yokž wartuñtan žcati. Nižaza nii ancha tjamiž cjen Salmón cjita yok žcati watchinča. Nekztanaqui Creta yok žcati irantican tajachuc muytižcu ojkchinča.

⁸ Tjamiž cjen, ch'aman ojkcan Creta cjita yok žcati ojkchinča. Nižtami wejrnacqui irantichinča Buenos Puertos cjita watja, Lasea wajtž žcati.

⁹ Jalla nicju irantizjapaqui walja timpuqui pertitača. Auti timpu irantisquiz cjen, tjamiqui tirapan tjamchiča. Jalla nižtiquiztan anawaliča chawc kotquiz ojkzqui. Jalla nižtiquiztan Pabluqui chiižinčiča,

¹⁰ tuž cjican:

—Jilanaca, wilta ojkzqui anawaliž cjequiča. Warcumi cargami pertisnačhani nižaza

uĉhummiž ticznasaĉha.

¹¹ Nii zultatž capitanažti Pabluž chiita ana cazziĉha. Warcuchiz tuyñumi, nižaza warcuž capitanaami, jalla ninacž takukaz nonziĉha.

¹² Nii wajtquiz auti timpu watzjapa, warcužtaqui anataĉha cuza. Jalla nižtiquiztan jos tjappacha ninacaqui pinsatĉha nawjctan ojkz tsjan cusa, nii. Fenice cjita wajtquin irantis pecatĉha jaknužumi. Fenice watjaqui Creta yokquinzakaztaĉha. Nii wajtquiztan cheržtaqui pajk kota tjenĉha warutuñtan, užatuñtan. Jalla nicjuñtaĉha waliqui auti timpu watzqui.

PAJK KOTQUIZ ANAWALI WATCHICHA

¹³ Jalla nekztanaqui warutan zuma queržcan ninacaqui pinsichiĉha, tira ojkzjapa. Jalla nekztan ninacaqui zarakchiĉha. Creta yok tjiyaranpan ojkchiĉha.

¹⁴ Tsjii kjaž majquiztan tsjii walja pjursanti tjamiqui tjonchiĉha užatan tuwantan cheechi.

¹⁵ Nekztanaqui tjamiqui warcu chjitchiĉha chawc kot mor kjutñi. Tjamž kjutñiqui anataž wira ojkchuca. Jalla nižtiquiztan jakzichuckat tjamiqui uĉhum chjichaĉhani, jalla nicjupankaz okaĉhani.

¹⁶ Jalla nekztanaqui Clauda cjita kolta yokž waruñ watchinĉha. Jalla nicjuñ watan tjamiqui anataĉha ancha pjursanti. Tsjii kolta warcuqui pajk warcuž wirquiz mojkžtataĉha. Ana ancha tjamiž cjen nii kolta warcuqui pajk warcuquiz tewziĉha ch'aman.

¹⁷ Jalla nuž tewžcu, nii pajk warcu kojchnacžtan zumpacha t'ejžtataĉha, ana cjacsnažo. Jalla niiran yok pjila želatĉha Sirte cjita. Tjamiž cjen nii

yok pjilquiz julz eksnatĉha. Jalla niŹtiquiŹtan nii pajk pañuz cherchi pajk tultu apakĉiĉha warcu tsewctan. Nekztanaqui tjamŹquiz warcu chjitskatchiĉha.

¹⁸ NiiŹ jaka taŹuqui nii tjam queraqui tira walja pjursantitaĉha. Jalla niŹtiquiŹtan nii warcuquiz Źejlñi kuzinacaqui pajk kotquiz tjojtataĉha.

¹⁹ Jalla niipa taŹuqui warcuŹ cusasanaca kot kjazquiz tjojtchinĉha wejtnaca kjarŹtan.

²⁰ Tsjii kjaŹ majquiztan ancha ch'orawitaĉha. Jalla nuŹ ch'orawiŹ cjen anaŹ tjuñimi warawarami tjenatĉha. NiŹaza nuŹ ch'orawiŹ cjen wejrnacqui “Ticznaĉhani. AnaŹ jaknuŹumi liwriyasaĉha”, nuŹ cjican chiichinĉha.

²¹ Tsjii kjaŹ maj ana ĉjheri lujlchi cjen Pabluqui ninacŹ taypiqueiz tsijtsiĉha, tuŹ cjican:

—Jilanaca, anataĉha uĉhumqui Cretquiztan ulansquiz, wejt taku cazpantaĉha anĉhucalaqui. NiŹaza anaŹ carganacami pertitasaĉha, niŹaza uĉhumqui anaŹ tiŹta sufritasaĉha.

²² Anziqui anĉhucqui tjup kuzziz cjisna, anaĉha llaquiza. Tii warcuŹ katanami, anaŹ jakziltami ticznaquiĉha.

²³ Wejrqui Yooz sirwuĉha, niŹaza Yooz partitĉha. Zez ween Yoozqui tsjii anjila wejtquiz cuchanŹquichiĉha. Nii anjilaqui wejtquiz jecŹquichiĉha,

²⁴ tuŹ cjican: “Pablo, ana eksna amqui. Roman chawc jilirŹ yujcquiz prisintistanĉha amqui. Jaziqui amiŹ cjen tjapa amtan chica ojkiñi Źoñinaca Źetaquiĉha”.

²⁵ Jilanaca, anaĉha llaquiza. Wejrqui Yoozquin tjapa kuztanĉha. JaknuŹ nii anjilaqui chiitĉhaja,

jalla niicamaž cumplisnaquičha.

²⁶ Kot taypiquiz tsjii kolta yoka žejlčha. Jalla nii yoka irantiž cjen warcuqui yokquiz čhjakžcu, tsijtsnaquičha kjazquizpacha. —Jalla nuž paljaychičha Pabluqui.

²⁷ Jalla nekztanaqui pizc simana ojktiquiztan, Adria cjita kot kjazquiz želan, tjamiqui warcu chjichatčha. Jalla nii ween chica arama warcu joojooñinacaqui pinsichičha, yokquin irantičhani, cjican.

²⁸ Jalla nižtiquiztan kjazquiztan kozzuc yokquin tupžcu, zizzičha quinsa tunc sojtan metro. Nižaza tsjii kjažtapacha ojžžcu wilta tupzizakazza. Jalla nuž tupžcu, zizzičha paatunc pakallakun metro.

²⁹ Kjaz kostan maz akji želačhani cjican pinsichičha. Nekztan warcu wirquiztan tsjii pajkpic pajk jirunaca quijtsičha ana nii maz ajkquin čhjakajo. Ekscan tjuñi tjewks tjewznatčha.

³⁰ Jalla nuž tjewžcan, nii warcu joojooñinacaqui pinsichičha, warcuquiztan atipasjapa. Jalla nuž pinsižcu, nii tewžta kolta warcu kjazquiz chjijwnatčha. Jalla nuž chjijuncan nii pajk jirunaca quijžtažokaž cjetčha nii warcuž yujcquiztan.

³¹ Jalla nuž cheržcu, Pabluqui zultatž capitanžquiz paljaychičha nižaza zultatunaczquizimi, tuž cjican:

—Nii warcu joojooñinacaqui ana tii warcuquiz eclaquiž niiqui, ančhucqui ticznasačha.

³² Nuž nonžcuqui zultatunacaqui nii kolta warcu mojka kojchnaca pootžinchičha kolta warcu kjazquin tjojtsnajo.

³³ Jalla nii kjantati Pabluqui taku tjaachiĉha ĉhjeri lulajo, tuž cjican:

—Pizc simana tjontaĉha anĉhucmi kuz turwayzi ana tjaĉhi nižaza ana lujlchi.

³⁴ Nižtiquiztan anĉhucqui ĉhjullamekaz lujlznalla, azi tanzjapa. Anaž jecmi wira apt'isnasaĉha. Nižaza ana zinta ĉhjojrichta cjequiĉha.

³⁵ Jalla nuž chiižcu Pabluqui tsjii t'anta tanziĉha. Nižaza Yooz Ejpžquin sparaquiž cjichiĉha tjapa nii žejlŋi žoñinacž yujcquiz. Jalla nekztanaqui nii t'anta kjolžcu lujlchiĉha.

³⁶ Jalla nižtiquiztan tjapa nii žoñinacaqui lujl-squin kuzziz cjissiĉha. Nekztan lujlchizakazza.

³⁷ Nii warcuquiz paa patac pakallawk tunca sojtan žoñinacataĉha.

³⁸ Jaknužt zapa mayni pecĉhaja jalla nuž lujlchiĉha. Jalla nuž lujlžcu nii parti trig kuzinaca kjaz kotquin tjojtchiĉha nii warcu cježu cjejajo.

WARCU KJAZQUIZ KATCHICHA

³⁹ Tjuŋi tjewktanalla, warcu joojooñinacaqui nii yoka cheržcu ana pajatĉha. Pero tsjii puj atquin pjila iŋžta k'ar yoka želatĉha. Nii yokquin warcu tsijskatz pecatĉha.

⁴⁰ Jalla nekztanaqui nii pajk quijtžta jirunacžquiz mojka kojchmi pootchiĉha. Kjazquizpacha cutziĉha. Nižaza kochnaca jweržcu, warcu irpiŋi maderanaca cutsiĉha. Nekztan pajk tultu, warcu juntuñ tucquin tsjijpsiĉha tjami tanzjapa. Jalla nižtiquiztan warcuqui puju iŋžta yoka žcatžinchiĉha.

⁴¹ Jalla nuž žcatžincan, pizc curinti ojkn̄i kjaz jalla nekc cjissiĉha. Jalla nižtiquiztan nii warcuqui kjaz koztan yokquiz quijsiĉha. Warcu tucquiztanaqui pjilquiz luzzitaĉha. Ana jaknužquin kissiĉha. Nižaza warcu wirquiztanaqui kjaz ljojkikaž warcu kjolatĉha.

⁴² Jalla nuž cjen preso itzñi zultatunacaqui preso žoñinaca konz pecatĉha, ana atipskatzjapa kjazquiz narcen.

⁴³ Zultatž capitanazti Pablo liwriiz pecatĉha. Jalla nižtiquiztan presonaca conawc cjen atajichiĉha. Nekztan mantichiĉha, tuž cjican:

—Kjazquiz narñi zizñi žoñinaca, anĉhucqui primiraqui kjazquiz luzna, yokquin irantizjapa.

⁴⁴ Parti žoñinaca, anĉhucqui tabla tanžcu kjazquiz zakaz luzna. —Jalla nuž mantichiĉha nii capitanaqui.

Jalla nuž tjappacha yokquin irantichiĉha. Ana zinta ticziĉha.

28

PABLUZ MALTA YOKQUIN KAMTA

¹ Jalla nuž yokquin ulanžcu, nii kolta yokž tjuu zizzinĉha Malta cjitatakalĉha.

² Jalla nii yokquin žejlñi žoñinacaqui wejrnaca ancha wali atintichiĉha. Nižaza tsjii pajk uj taazinĉha wejrnac kutnajo. Chijniž cjen zaquiz cjen wejtnacaltajapa uj taazinĉha.

³ Nekztanaqui Pabluqui kjoñ žup aptichiĉha. Nii žup ujquin tjojtan, tsjii zkoraqui uj kjakiž cjen ulanžquichiĉha Pabluž kjarquin ch'atzi chejchipacha.

⁴ Jalla nuž cheržcu nii yokchiz žoñinacaqui tuž cjeyassiča:

—Tii žoñiqui žoñi conñizlani. Kot kjazquiztan liwriitaž cjenami Yoozqui anat munčhani, tiiž žejtzmi.

⁵ Pabluqui kjarquiztan zkora tsajttsajtsiča ujquiz. Zkoraž ch'attaž cjenami anapan kjaž cjissiča Pabluqui.

⁶ Tjapa nii žoñinacaqui Pabluž kjarat tjuwačhani cjican chekznatča. Nižaza tsjii ratuquiztan ticzit cjee tiiqui, jalla nuž pinsatča nii žoñinacaqui. Jalla nuž ažk tjewžcu, Pablo ana kjaž cjissi cherziča. Jalla nižtiquiztan pinsita campiižcu, nii žoñinacaqui cjichiča:

—Tii Pabluqui cheka Yoozzalani —cjican.

⁷ Ulanta yok žcati nii yokchiz jilirž yokanaca želatča. Nii jiliriqi Publio cjitatača. Jalla niiqui wejrnaca zuma risiwchiča. Chjep maj wejrnac zuma atintichiča.

⁸ Publiož ejpqui laa želatča, tsjii ch'ujlñi conžtan, nižaza jawžtan. Pabluqui niižquin tjonzñi ojkchiča. Nekztanaqui Pabluqui nii laa žoñžta Yoozquin mayizichiča, čhjetinzjapa. Nekztanaqui niižuntuñ kjaržtan lanžcu, čhjetinchiča.

⁹ Jalla nižtiquiztan parti nii yokquiz žejlñi laanacaqui tjonchizakazza, jalla ninacami čhjetintatača.

¹⁰ Nuž čhjetintiquiztan nii žoñinacaqui wejtnacquiz walja rispitchiča. Chjep jiižquiztan wilita tsjii warcuquiz luzzinča. Ima nii warcu luzan, nii žoñinacaqui walja zuma žaka cjižinchiča, wejrnaca ojkzjapa.

PABLUQUI ROMA WAJTQUIN IRANTICHICHA

¹¹ Warcuqui nii yokquiz auti timpu watchičha. Alejandría wajtquiztan tjonchitačha. Nii warcuž tucquin pizc yooznacchiztačha. Cástor y Pólux cjitatačha nii pizc yooznacaqui.

¹² Nekztanaqui warcuquiz ojkcan, Siracusa wajtquin irantichinčha. Jalla nicju čhjep maj kamchinčha.

¹³ Jalla nekztan warcuquiztan tira ojkchinčha. Nekztan yok žcatiran ojkcan, Regio cjita wajtquin irantichinčha. Niiž jaka tažuqui wartan queržquichičha. Jalla nuž queržcan pucmajquiz irantichinčha Puteoli wajtquin.

¹⁴ Jalla nicju tsjii kjažultan Yoozquin criichi jilanacžtan zalchinčha. Jalla ninacaqui wejtnacaquiz invitchičha ninacžtan tsjii simana kamajo. Jalla nekztanaqui Roma wajt kjutñi zarakchinčha.

¹⁵ Roma wajtchiz Yoozquin criichi jilanacaqui wejtnacaž tjonz quintu zizzitakalčha. Jalla nekztan wejtnacatan zali ulanžquichičha. Jalla ninacaž nuž zalzquichiquiztan, Pabluqui Yoozquin sparaquiž cjichičha. Nižaza juc'ant tjup kuzziz cjissičha. Wejrnacqui ninacžtan zalchinčha Foro de Apio cjita yokquin, nižaza Tres Tabernas cjitazakaztačha.

¹⁶ Jalla nekztanaqui Rom watja irantitanaqui nii capitanaqui preso žoñinaca intirjichičha roman zultatž jiliržquiz. Pero nii capitanaqui Pablo kamkatchičha yejkquin tsjii guardiñi zultatžtan.

PABLUZ KAMTA ROMA WAJTQUIN

¹⁷ Čhjep majquiztan nuž irantižcu, Pabluqui kjawzkatchičha Roma žejlñi judío jilirinaca. Jalla

nuž Pablužquin tjončan, Pabluqui ninacžquin pal-jaychiča, tuž cjan:

—Jilanaca, wejrqui roman zultatžquiz preso intirjitatača Jerusalén wajtquin, ana čhjulumi judionacž quintra paachi cjenami. Nižaza ana čhjulumi učum tuquita ejpnacž cuzturumpi quintra paachi cjenami.

¹⁸ Wejr zumpacha pecunžcu, ninacaqui wejr cuts pecatča. Wejt quintra ana čhjul ujmi watchiča, wejr conzjapaqui.

¹⁹ Judío partinacazti ana munchiča. Jalla niz-tiquiztan roman chawc jiliržquin wejt quija tjaz-najo maychinča. Jalla nuž cjenami, wejrqui wejt wajtchiz žoñinacž quintra ana čhjul uj tjeeskatz pecuča.

²⁰ Jalla nižtiquiztan ančhuc kjawzkatuča ančuca cherzjapa, nižaza ančhucatan parlizjapa. Učumqui Israel wajtchiz žoñinacžhumča. Jalla učumqui Yooziž cuchanžquita žoñi tjewža. Jalla nii tjewžta žoñi sirwiñiž cjen wejrqui tii carinžtan čhejlta želuča.

²¹ Jalla nekztanaqui nii judionacaqui cjichiča:

—Wejrnacqui am puntuquiztan ana čhjul cartami risiwchinča Judea wajtquiztan. Nižaza nii nawjctan tjonchi judío jilanacami anaž am quintra chiiča.

²² Wejrnacqui amiž pinsita takunaca nonz pecuča. Tjapa wajtquizimi tii ew yekja t'akž quintra chiiča. Jalla nuž zizuča.

²³ Jalla nekztanaqui tsjii tjuñi citchiča. Jalla nii citta tjuñquiziqui walja žoñinacaqui tjonchiča jakz-iquin Pablo alujassi želatčhaja, jalla nicju. Jalla

nuž žoñinacáž tjonžcu Pabluqui ninacžquiz paljaychiča wenstanpacha zezicama Yooz mantita kamañ puntuquiztan. Pabluqui ninaca zumpacha intintiskatz pecatča Jesucristuž puntuquiztan. Moisés liiquiztanami nižaza profetanacáž cjiirta liwrunacžquiztanami punta punta chiižinchiča, ninaca zuma intintazajo Jesusiž puntuquiztan.

²⁴ Yekjapanacaqui Pabluž nuž chiita takunaca catokchiča. Yekjapanacazti niiž takunaca ana nonziča.

²⁵ Jalla ninacpora Jesucristuž puntuquiztan ch'aascan, nužquiz ninacaqui wichanzi kallantichiča. Ima okan, Pabluqui cjichiča:

—Espíritu Santuqui Isaías cjita profetžquiz paljaychiča učum tuquita ejpnacžjapa. Ančuca puntuquiztan werarapan chiichiča, tuž cjican:

²⁶ “Oka, tii žoñinacžquiz paljayžca, tuž cjican:
Ančhucqui nonžñeeka nonznaquiča,
pero ana intintazasača. Nižaza
chekzñeeka chekznaquiča, pero ana
cumrintasasača.

²⁷ Jalla nuž cjequiča. Tii žoñinacž kuznacaqui walja tjupiča, ana Yooz taku intintizjapa. Nižaza oñižtakazza ninacaqui, Yooz taku ana nonzjapa. Nižaza zuražtakazza Yooz paatanaca ana chertzjapaqui. Jalla nižtakaz žejlča ana intintiñi kuzziz cjisjapa. Nižaza ana wejtquin cut'iscaquiča, liwriita cjisjapa”.

²⁸ Jalla tekztan nawjcchuc tii liwriiñi Yooz takuqui parlitaž cjequiča ana judío žoñinacžquin. Jalla nii ziza ančhucqui. Nii yekja wajtchiz žoñinacaqui tii liwriiñi Yooz taku nonznaquiča.

²⁹ Jalla nuž Pabluž chiitiquiztan, judionacaqui ojkchiča, ninacpora ancha ch'aascan.

³⁰ Pabluqui pizc wata intiru nii aquilta kjuyquiz kamchiča. Jakzilta nižquin tjonzñi žoñimi zuma risiwñipanikaztača.

³¹ Jalla ninacžquin parličiča Yooz mantita kamañ puntuquiztan, nižaza Jesucristo Jilirž puntuquiztan. Tjapa kuztan kjana tjajnatča. Nižaza anaž jecmi Pablo atajčiča, Yooz taku ana paljayajo.

clix

Ew Testamento: Chipay Tawkquiztan New Testament in Chipaya (BL:cap:Chipaya)

copyright © 2009 Wycliffe Bible Translators, Inc.

Language: Chipaya

Translation by: Wycliffe Bible Translators, Inc.

Chipaya [cap], Bolivia

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chipaya

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 18 Apr 2025 from source files
dated 29 Jan 2022

baeaa6d6-fcc1-578f-afbd-04a9c5c14184